

YEEZU TUIMTOMDŌMA TUIMANA GBANKA

¹⁻² Teofilos, m poom liŋ ŋmarisi te fu a weeni Yeezu ale jam bo ale ti a piilim wa tuimana dii ale sak nuruba me alege a yaa cheŋ wenŋmazuk la. Wa yaa weeni wa tuimtomdŋ baai ate wa lueri a te wa dek la, ale pa Naawen Chiika pagrimu a sak ba ba le ba a tom dii la. ³ Wa ale kpi la, ŋaŋ nyiŋ ku ale jam paari daa pisinaansi la, wa yaa pa wa dek a sak ba ate ku paari dii choa ayen ku sak ba ayen wa vua kama. Wa yaa sak ba Naawen naamu wie. ⁴ Wa ale jam boro ale ba la, Yeezu a yaa ŋman weeni ba ale nin muna ayen, “Ni kan ŋman basi Jerusalem abe ni cheŋ tɛŋ ka choa. Ni limsi ate ni nya m Kowa tiirim buui ate wa puulim ayen wa le pa a te ni la. Nama dek abe бага teeri ayen m poom weeni nyaku de a sak ni kama. ⁵ Jɔɔn a pa ka nyiam a so nuruba, alege ku kan beni ate Naawen pa wa chiika ase soka la a sueri ni suniimana.”

⁶ Da yeŋ ate Yeezu ale wa tuimtomdŋma a jam kala ale chaab ate ba yaa a bek wa ayen, “Ti Nyɔɔ, yɔgyɔgla de fi le basi ate Juuma a soa ba dega?”

⁷ Yeezu a weeni ba ayen, “Mi Kowa ale dak da ŋaai ate wie ayen ŋa nyɛ la, ni waai niŋ a karo. ⁸ Naawen a le pa wa chiika a sueri ni suniimana ate ka basi ate ni ta pagrim yegayega ate ni cheŋ Jerusalem ale Judia ale Samaria ale tɛŋka

meena nuruma jigi a sak ba mi wie.” ⁹ Yeezu ale biisi a nueri la, Naawen a yaa pa wa a ta jueli wenɲmazuk. Ba yaa za a nya wa ale a jueli la, ate chinɲmari a jam lik wa ta jueli ate ba an ɲman nya wa.

¹⁰ Ba ale za a nya la, nuruba baye a deri jam a za ba niɲ. Ba jam jo ka garuk peeta, ¹¹ a yaa weeni ba ayen, “Nama Galili demma, ka boa ate ni diem za a nya chinɲmanni po? Ase nama ale nya Naawen ate wa pa Yeezuwa de a ta jueli wenɲmazuk dii la, da yeɲ po wa le ɲman siɲ teɲzuk de ka dila degadega.”

¹² Tuimtoma yaa nyini guuk kuui ate ba a wi ayen Olivi Guuk la zuk a siɲ a chen Jerusalem teɲka. Ku jam yalima ase ka meɛli geli la ale Jerusalem. ¹³ Ba ale jam paari la, ba yaa ga jueli ɲmazuk dokku po ate ba poom boro la. Ba jam ka Piita, ale Joɔn, ale Jeemsi, ale Andiru, ale Filip, ale Tomasi, ale Batolomiu, ale Matiu, ale Jeemsi (Alfiyus biika), ale Simon waai ale jam a nye ayen Juuma a nya ba dek zuk la, ale Judas (Jeemsi biika). ¹⁴ Nyaba de meena, ale nipooma ale Yeezu mawa Meeri ale Yeezu suaataɲa a kasim jam wari ka Naawen puusika ale popola yena.

¹⁵ Da yeɲ ate baai meena ale ta siaka ale Yeezu la, a yaa jam jigi yeɲ ayen ba nye tuka. Ba jam paari ka nuruba kook ale pisiye. Piita yaa yiri zaani a piilim biik ayen, ¹⁶ “M suaata ku a fe kama ayen Naawen Chiika ale weeni Deevide ayen wa ɲmarisi dii a nyo Naawen gbanɲka po la, a chim wensie. Deevide a jam ɲmarisi magsi chaab ale ka Judas. Wa jam ka Judas, a dak Yeezu a sak nuru boanni ate ba yik wa. ¹⁷ Wa jam ka

tama po wanyi a jam a tom dii ate Yeezu lueri wa ayen wa me a tom la.”

¹⁸ (Ligi ŋaai ate ba jam tuni wa ale ge ate wa tom wabioku de la, Judas jam pa ŋa a da ka talim. Ku ŋaanŋnyin ate wa lo ate wa puuka meena a na di sunsunka po ate wa nyuaatana meena a yaa nyini peelim. ¹⁹ Waai meena Jerusalem tenka po a jam wom wannu de kama ate ba yaa jam a wi talim bula tenka ayen Akeldama. Ku kiri ale Ziimu tenka.)

²⁰ “Boan nyinŋa, ba ŋmarisi Naawen gbanƙa po gbanƙanyi ate ba a wi ayen yiila gbanƙa la ayen, ‘Basi ate wa yenni a chim yeri korok.

Basi ate nuru kan bo di po.’

Ba ŋmarisi me ayen,

‘Basi ate nuru yon a tagri wa a tom wa tuimana.’

²¹ “Dila nyin la, nuru waai ale maa va tama diipo meena wuu ate Nyɔnɔwa a jam a nyiem ale tama la, ²² a piilim a ta nyini diipo ate Joɔn Sokateerɔwa a jam boro la a ta jam paari jinla dannu ate Naawen yaa jam ta wa a cheŋ la, ku a fe kama ayen nuru wala choa a maa bo ale ti a chim waai le wa weeni sak nuruba a magsi chaab ale Nyɔnɔwa ale yiri kum po la.”

²³ Ba yaa lueri nuruba baye ayen ba yaa lueri bala po wanyi. Nuruma de jam ale Josefi. Wa jam ta ka yue ŋaye me, ate ba wi ayen Baasabas yaase Jasitus. Wa choawa yoi me ale Matayas.

²⁴ Ba yaa puusi Naawen ayen, “Nyɔnɔ, fi seba nuru meena sunum po ale ka dii la kama. Be sak ti nuruma de bayewa po, fi ale lueri ka waai

²⁵ ayen wa tagri tuimtomdo wa Judas tuim ŋaai

ate wa basi ale chen juijui ate wa nyini la a tom.”
²⁶ Ba yaa nak gban ayen ba lueri nuru wala ate gbanka a yaa lueri Matayas ate ba yaa pa wa a gum tuimtomdoba pi ale wanyiwa po.

2

¹ Juuma dakpeeni dannii ate ba a wi ayen Pentekos ale jam paari la, Yeezu njaanviirima meena a yaa tigi chaab jigi yey. ² Ba ale jam bo jigi yey la, ba yaa wom chiok ase nmoruk viok la a deri nyini wenmzak a jam sueri yenni juijui meena ate ba jam kala la. ³ Ba yaa nya bolimniak a sin jam kala ba zuimaja zuk togatoga a nye ase gingelunja la. ⁴ Ate Naawen Chiika a jam sueri ba sunimaja a te ba pagrim ate ba deri a biisi bisii ale kan daa ba dek tansa biisa la.

⁵ Juuma yegayega baai nina ale muni ale wensiuku vaka la a poom jam nyini tenka meena po a jam Jerusalem tenka po kama. ⁶ Ba ale wom dii ale nye la, nuru boanni yegayega a yaa tigi chaab ate ku yaa cha ba nna yegayega, dii nyin la ba wom ba ale a biisi ale ba dek tansa biisa la. ⁷ Ku jam ka wakperikaliik ba jigi ate ba yaa weeni chaab ayen, “Nuru baai ale a biisi nna la, daa Galili demma? ⁸ Ku nye ka se ate tama бага a wom ba ale a biisi ti wanyi wanyi tansa biisa? ⁹ Tama ka Patiya dem, ale Miidi dem, ale Iilam dem, ale Mesopotamiya dem, ale Judia dem, ale Kapadosia dem, ale Pontus dem, ale Asia dem, ¹⁰ ale Firijiya dem, ale Pamfiliya dem. ale Ejipiti dem, ale Libia dem baai ale kala moata Sairini la. Ti ba gela ka Juuba, ti ba gela daa Juuba a va Juuma wensiuku la a yaa

chim nicham a nyini Aroom tenka la. ¹¹ Tama ba gela ka Kariti dem ale Arab dem. Tama a biisi ka biisa togatoga, alege tama a wom ba ale a biisi ale ti dek tensana biisana a magsi chaab ale Naawen tuimkperisana wie ale ka dii la kama.” ¹² Ku jam ka wakperikaliik ba meena jigi ate ba jam tuim a yaa a weeni chaab ayen, “Ka nyaku de kiri ale boa?”

¹³ Alege mbala me a yaa nye Yeezu njaanviirima a la ale a weeni chaab ayen, “Nuruma de a nyu ka daam a yib.”

¹⁴ Alege Piita yaa ale za ale mbala pi ale wanyiwa la yaa weeni ale lueluk kpion ayen, “Nama Juuma ale baai meena ale bo Jerusalem tenka la, ni meena a lagri ni tujen a wom dii ate m tara ayen m weeni a sak ni la. ¹⁵ Ni basi ate m weeni a sak ni ayen, ni a poli kama ayen nuruma de a nyu ka daam a yib, alege ku daa wensie. Nama kan nya ku ale diem ka saliuik ban m neok wa? ¹⁶ Naawen biisiteerowa Joel jam nmarisi Naawen gbanka po ayen Naawen a weeni ayen,

¹⁷ “Tenka meena kpeglimka a dan moata, m le nye ka nna.

M le kpiiri Naawen Chiika a nyo nuru meena suniima po.

Ni nidoabilisa ale ni nipoabilisa le biisi Naawen wienja ase ba ka Naawen biisiteeroba la, ni bipaaluku me le nya wie ase ba goa a daasim kama la,

ni nisomma me le goa goadaasima.

18 Wensie, m le poom basi me ate ka jam nuru baai ale a tom a te mu la jigi, nidɔaba ale nipooba.

M le basi ate m Chiika jam ba jigi ate ba chim m biisiteerɔba a yaa weeni mi ale a biisi dii la a sak nuruba.

19 M le nyɛ wakperikaliisa wennyamazuk ale tɛnzuk de ate nuruba nya.

Ba a le nya ziim, ale bolim ale nyuisa nna kpito,

20 wenbinni le sobri,

ate chiika tagri a muni nna ase ziim la.

Nyaɲa de meena a le nyɛ kama alege ate Nyɔɔwa Dakpeeni a yaa jam.

21 Dila powa waai abe ale a wi Nyɔɔwa yonni la, le nya varibasika.'

22 "Izirali demma, ni lagi tue a wom wienja de. Naawen lueri Yeezu Nazaret denowa kama. Wa be va ka wala nyinj a nyɛ wakpeema ale wakperikaliisa ayen ku sak ni ayen ka wa ale lueri wa. Wa abe nyɛ wienja de ka nama nimbie po. Ni be seba nyaku de a chak kama nalimnyiini. 23 Yeezuwa de ate nama a yik a te tuimbaata nyam ayen ba ko wa. Ni be ale nyɛ dii la, ka Naawen ale poli ku ayen ku nyɛ dila.

24 Alege Naawen a vari wa kama kum po a basi a yaa nak wa a yiri kum po dii nyinj la wa jam daa waai ate kum a бага yik wa a tara. 25 Boan nyinjɲa, ti kokpienka Deevide a nmarisi Naawen gbanƙa po kama a magsi chaab ale wa ayen, 'Mi kasim jam a nya Nyɔɔwa kama ale wa bo ale mu.

Wa kasim moata mu kama ate yɔgsum kan yik mu.

26 Dila nyinj m sui a jam peenti kama
ate m biika meena po supeentik a kasim
boro.

M seba ayen m le kpi kama
alege mi a vuusi kama ale yiila,

27 boan nyinjɲa, fi kan zeri mu a basi ate m chen
kpilunɲɔa,
yaase fi basi ate fi welensa nuruwa a puak
vorumu po.

28 Fi sak mu nyeboka siuku kama.

M le bo ale fu dii la a basi kama ate m sui
peenti yegayega.’ ”

29 Piita yaa nman biisi ayen, “M suaata, ni
basi ate m biisi lak a sak ni ayen ni kokpienka
Deevid a kpi kama ate ba gu wa. Wa boosuku
abe diem boro kama a jam paari jinla. 30 Wa jam
ka Naawen biisiteeroma wanyi a seba Naawen
ale puulim dii ale wa la. Naawen jam puulim
kama ayen wa le nyɛ ate Deevid njanbisanja po
wanyi a chim naab ase Deevid dek ale jam ka
naab dii la. 31 Deevid abe jam nya Naawen ale
jam ayen wa nyɛ dii la kama, ate wa yaa biisi a
magsi chaab ale waai ate wa lueri la le wa kpi
abe wa yiri kum po la, Deevid yaa biisi ayen,
‘Naawen an jam yuk wa a basi kpilunɲɔa.

Wa be an jam puak vorumu po me.’

32 Naawen abe nak Yeezuwa de a yiri kum po
kama. Tama abe nya wannu de kama a yaa weeni
a sak ni. 33 Naawen zak wa kama a kali wa
dek juga geɲ ate wa yaa tuesi Naawen Chiika wa
Kowa Naawen jigi ase wa ale jam puulim dii ayen
wa a le pa Naawen Chiika a te wa la. Ni be ale a
nya ale a wom dii yɔgyɔgla de la, ka wa tiirimu

ate Yeezu a pa kpiiiri sueri tama. ³⁴ Boan nyinṅa Deevidek an jueli wenṅmazuwa, alege weeni ti Naawen Gbanṅka po ayen, 'Nyɔṅɔwa a weeni mi Nyɔṅɔwa ayen, Kali dela, mi juga gen

³⁵ ate ku ga paari diipo ate m le basi ate fi dachaasaṅa a chim fi yom la.'

³⁶ "Nama Izirali demma ku a fe kama ayen ni seba a chak ayen ka Yeezuwa de ate ni yik wa a kpi jabarimu nyinṅ la ate Naawen basi ate wa chim Nyɔṅɔ ale waai ate wa lueri la."

³⁷ Nuruma ale jam wom Piita biika de meena a nueri la, yɔgsum yaa yik ba nalimnyini, ate ba yaa bek Piita ale tuimtomdɔ mbala, ayen, "Ti suaata, ti be ti nyɛ ka se?"

³⁸ Piita yaa tulisi ba ayen, "Ni meena basi ni tuimbaataṅa tomka abe ni tuesi soka Yeezu Kirisita yoi nyinṅ ate wa vonṅ ni wabaataṅa a te ni ate ni yaa nya Naawen tiirimu buui ale ka Naawen Chiika la. ³⁹ Dii nyinṅ la, Naawen jam puulim kama ayen wa ale pa tiirimu de a te nama ale ni bisa ale baai me ale yalima la ale waai meena ate Nyɔṅɔwa tama Naawenni a wi ba a te wa dek la."

⁴⁰ Piita jam biisi ka wa boari nna yegayega ale denṅi ba kpa a weeni ayen, "Ni vari ni dek a ta nyini ninam buui ale cheena nyeka tuem nyamma jigi la." ⁴¹ Nuruba yegayega a jam siak a te wa ale biisi dii la kama ate ba yaa tuesi soka. Waai meena ale jam ta siaka a maa gum ba po da dila dannila, a jam paari ka nuruba tusa ṅata. ⁴² Ba kasim jam pa ka ba dek a te tuimtomdɔma sinsanṅa, ba an jam poori chaab ale ba popola

ale ba ḡanta ba nyeboka meena po, ba jam pa ba dek meena a te Nyɔnɔwa ḡandiintanḡa deka. Ba jam pa ba dek me a te ka Naawen puusa.

⁴³ Yɔgsum nna yegayega ale jam yik waai meena. Naawen a jam va ka tuiptomdoma nyin a nyɛ wakperikaliisa nna yegayega ale nyɛ wie me ḡaai ale a sak ba ayen wa bo ale ba kama la. ⁴⁴ Baai meena ale ta siaka a va wensiuku la, a kasim jam boro ale ka chaab ba popola ale ba tuima jigi a pa ba ḡantanḡa a maari chaab ⁴⁵ a pa ba ḡantanḡa a da a pa ligranḡa a chari chaab a magsi ale ba wanyi wanyi ale sum a yaali dii la. ⁴⁶ Daa meena ba kasim a nyɛ ka tuka ale popola yena Juuma Puusika Yenni po. Ba maa chaab me ba yeenḡa po a de ba ḡandiintanḡa ale supeentik ale chaab ⁴⁷ ale a pak Naawen, ale ta supeentik ale nuruba meena. Daa meena Nyɔnɔwa a ta ka nuru baai ale a nya varibasika la jam a gum ba po.

3

¹ Da yenḡ ate Piita ale Jɔɔn a yaa yiri wenbalini (ban buta) a chenḡ Juuma Puusika Yenni ayen ba puusi Naawen. Diipo ate tenḡ kala nuruba ga a puusi Naawen la ale la. ² Juuma Puusika Yenni a jam ta ka noa bɔari. Nɔanni dinyi yoi ale Nalim noai. Nuru ale jam chim gbaruk a ta nyini wa biamu dannɔ ate ba yaa kasim ta wa daa meena a jam a dueni Puusika Yenni nɔanni ate ba a wi ayen Nalim Noai la. Ba yaa nyiem ta wa jam ayen wa a juisi nuru baai ale a jo Juuma Puusika Yenni po la. ³ Wa ale jam nya Piita ale Jɔɔn ale ba cheena ayen ba jo la, wa yaa juisi ba ayen ba

te wa jaab. ⁴ Ba yaa nya wa nina po nna ziim, ate Piita yaa weeni wa ayen, “Nya tama.” ⁵ Wa yaa kasim a nya ale a yiili ayen wa ale nya ka jaab ba jigi. ⁶ Alege Piita yaa weeni wa ayen, “Mi ka ligra, alege m le te fu ka mi ale ta jaab buui la. Yeezu Kirisita Nazaret denowa yonni nyinj ate mi a weeni fu ayen fi yiri zaani cheŋ.” ⁷ Piita yaa yik wa juga nisana a maa maari wa ate wa yiri. Nuruwa nansaŋa a le kunaŋa a deri ta pagrim nna nwuli ⁸ ate wa yok jueli wein a jam zi a yaa va ba a maa bo Juuma Puusika Yenni po a cheŋ ale yok a zi a pak Naawen ⁹ ate nuruma meena a nya wa ale a cheŋ ale a pak Naawen la ¹⁰ ate ba yaa miŋ ayen wa ka waai ale a kali Nalim Nɔanni a juisi la. Ku yaa chim wakperikaliik nna yegayega a te ba.

¹¹ Piita ale Joon a yaa pilim jam bo ka Yenni po juijui ate ba a wi ayen Solomon Posuk la. Nuruwa ale jam bobi Piita ale Joon nna kenken a ta la, ku yaa cha nuruma meena ate ba yaa chali cheŋ Piita ale Joon jigi. ¹² Piita ale nya nuruma la wa yaa weeni ba ayen, “Izirali demma, ka boa ale soa ate ni basi ate wannu de a cha ni? Be ka boan me ale soa ate ni a nya ti dila? Nama poli ayen ku ka tama dek pagrim nyinj yaase ti dek wein siuk tuima nyinj ale soa ate tama nye ate nuruwa de a baga a cheŋ? ¹³ Aawo, ku ka Abraham ale Aizik ale Jakob ale ti kokpiensaŋa Naawenni ale te zula wa tomteerowa Yeezu. Alege nama ale yik wa a te Gominawa Paalot a yaa zeri wa wa niŋ. Paalot jam poom a yaali ayen wa vari wa a basi kama alege nama zeri. ¹⁴ Yeezu a jam ka welensa ale wayorisima nyɔnɔ, alege nama

zeri wa kama alege weeni Paalot ayen wa yeeri nuru koorowa a te ni. ¹⁵ Nama be ko ka nyuvuri teerowa. Naawen abe nak wa yiri kum po kama. Tama be nya wannu de kama a yaa weeni a sak ni. ¹⁶ Ku be poom ka wala yonni pagrim nyinj ale siaka wa yonni nyinj ate nuruwa de ate ni seba wa la a nya nyinjogsa ate ni a nya wa ate wa ta pagrim. Ni ale a nya dii nna la, ku ka siaka Yeezu yonni nyinj ate nuruwa a tara a yaa nya nyinjogsa nalimnyiini nama meena nimbie po.

¹⁷ “Yogyogla de m suaata, m seba ayen nama ale ni kpanja ale nye Yeezu dii la, ni ze kama, ate ni nye. ¹⁸ Alege, nama ale nye dii la, ku ka Naawen ale pa te wa biisiteeroma meena dila po dila powa a yaa weeni ayen, ku a fe kama ate waai ate wa lueri la a nam. Ku sum jam chim ka wensie. ¹⁹ Dila nyinj ni be tagri a basi ni tuimbaatana ate Naawen a von a te ni. Ni dan nye dila supeentik ale nyini Nyonowa jigi a jam ni jigi ²⁰ ate wa basi ate Yeezu waai ale ka Kirisitawa ate wa poom lueri wa a te ni la a yaa jam ni jigi. ²¹ Wa ale kasim bo ka wenmazuk ate ku ga paari diipo ate wa le jam nye wie meena a magsi ase Naawen ale jam pa wa biisiteero welensana a biisi dii dila po dila po la. ²² Boan nyinja, Moosis a weeni kama ayen, ‘Nyonowa fi Naawenni a le tom ate biisiteero jam ase mi la. Biisiteerowa de a chim ka ni dekanuru. Ku be a fe kama ayen ni siak a va wari meena ate wa a weeni ni ayen ni nye la. ²³ Nuru waai abe ale kan a va dii ate biisiteerowa de a weeni la, ku a fe kama ayen Naawen poori wa nuruma po a kaasi wa.’ ²⁴ Biisiteeroma baai meena ale biisi a

ta nyini Samuel la, ale baai me ale pa saɲ wa la, bala meena a biisi magsi chaab ale ka wie ɲaai ale nyɛ daaɲa de la. ²⁵ Nama be ka biisiteerɔma de bisa. Naawen abe ale jam nyɛ noayɛnka dila po dila po ale ni kokpiɛnsaɲa la, nama abe maa ta noayɛn kala me kama ase wa ale jam weeni Abraham ayen, ‘M le va ka fi ɲaanbisaɲa nyiɲ a niak waai meena tɛɲzuk.’ ²⁶ Dila nyiɲ ate Naawen lueri wa yomowa de niɲ tom wa nama jigi ayen wa te ni niaka. Niaka de ale wa a le nyɛ ate nama waai meena a basi wa gaasa suitaɲa vaka.”

4

¹ Ba ale jam boro a biisi ale nuruma la, Juuma Puusika Yenni kpaɲɲa ale Juuma Puusika Yenni limsidɔma kpagini ale nuru baai ate ba a wi ayen Sajusi la, a yaa maa chaab a jam ba jigi ² ale supuurim dii nyiɲ la Piita ale Joɔn a jam a sak nuruma kama ayen Yeezu a yiri kum po kama. Dila abe a sak kama ayen baai ale kpi la a le yiri kum po kama. ³ Dila nyiɲ ba yaa yik Piita ale Joɔn a lik ate vari veenti dii nyiɲ la, ku jam poom deri ka junɔai. ⁴ Alege baai yegayega ale wom ba sinsaɲa la, a jam siak a te ɲa kama ate ba meena a gum chaab paari nidɔaba tusa ɲanu.

⁵ Vari ale veenti la, Juuma nalimaɲa ale nisomma ale Juuma Sinsaɲa sagraɔma a jam tigi chaab Jerusalem tɛɲka. ⁶ Ba jam tu chaab ale ka Anasi waai ale ka Juuma Puusika Yenni kpagi kpeeni la, ale nuru baai ate ba a wi ayen Kayafas ale Joɔn ale Alezanda la ale baai meena ale ka Anasi dɔkdemma po la. ⁷ Ba yaa yik

tuimtomdoma a zaani ba niŋ a bek ba ayen, “Ka boan jaab pagrim nyiŋ a yaase ka wana yoi nyiŋ ate nama nyɛ nna?”

⁸ Naawen Chiika abe ale jam sueri Piita la, wa yaa tulisi ba ayen, “Nuruma kpaga ale nisomma, ⁹ Nama a dan a bek tama jinla a magsi chaab ale wamaŋ kaai ate ti nyɛ a te gbaruku la ale jaab buui nyiŋ ate nuruwa de a nya nyiŋyɔgsa la, ¹⁰ ku a fe kama ayen nama meena ale Izirali tɛŋka demma meena a seba ayen ka Yeezu Kirisita Nazaret denowa waai ate ni yik kpi jabarimu nyiŋ ate Naawen nak wa yiri kum po la, wala yonni nyiŋ ate nuruwa de ale za ni niŋ la a nya nyiŋyɔgsa. ¹¹ Ba ale ŋmarisi dii Naawen gbanƙa po la ka wensie a magsi chaab ale Yeezu ayen, ‘Tintain dii ate seeroma a zɛri la a chim ka tintain maŋ ŋa meena po.’

¹² Varibasika a va ka wala nyiini nyiŋ a jam. Nuru ka tɛŋzɔk de ate Naawen a te ti ate kula nyɔŋowa a бага vari ti a basi. Ka wala nyiini.”

¹³ Ba ale jam nya ale Piita ale Joɔn a ta pagrim a бага biisi nna alege ba an zamsi gbanƙa paari niŋ la, ku yaa cha ba nna yegayega ate ba yaa miŋ ayen ba jam boro ale ka Yeezu. ¹⁴ Alege ba jam ka wari a weeni, dii nyiŋ la, nuru waai ate ba tebi la a jam za ale ka Piita ale Joɔn. ¹⁵ Ba yaa weeni ba ayen ba nyini kpaŋŋa dɔkku po a nyini peelim. Piita ale Joɔn ale ga nyini la, kpaŋŋa yaa deri piilim a biisi ale chaab ayen, ¹⁶ “Ti бага a nyɛ nuruma de ka se? Wakperikaliika de ate ba nyɛ nna ate waai meena Jerusalem tɛŋka po a nya la? Ti be an бага a nak nampaga me ale di me. ¹⁷ Ti be dan a yaali ayen wanni de a kan

ɲman tagli jigi meena, ni basi ate ti kaam ba ayen ba kan ɲman pa Yeezu yonni nyiɲɲa a biisi wari ale waaiya.”

¹⁸ Ba yaa wi Piita ale Joɔn a kaam ba ayen ba kan ɲman pai Yeezu yonni nyiɲ a biisi a yaase ba sak waaiya. ¹⁹ Alege Piita ale Joɔn a yaa tulisi ba ayen, “Nama deka a be weeni nyaku de ase ka ku kuna deka ale magsi Naawen jigi ase ka ti zuli nama yaa ti zuli Naawen ya? ²⁰ Boan nyiɲɲa, tama an baga basi dii ate tama deka a nya ale wom la biiga.” ²¹ Kpaɲɲa a yaa ɲman kaam ba ale nin muna a gum du a yaa basi ba ate ba cheɲ, dii nyiɲ la ku jam pagra kama ate ba nya siuk a te ba waalika, boan nyiɲɲa, nuruma meena a kasim jam a te ka Naawen pimpauk ale dii ale nyɛ la. ²² Dii nyiɲ la, nuru waai ate wakperikaliika de a jam nyɛ wa jigi ate wa nya nyinyɔgsa la, a jam gaam bena pisinaansi kama.

²³ Ba ale jam pa Piita ale Joɔn a basi la, ba yaa pilim ɲman cheɲ ba Kirisita bisa vaanchaama jigi a weeni a sak ba Juuma Puusika Yenni kpaɲɲa ale nisomma ale weeni ba dii la. ²⁴ Ba ale wom la, ba yaa maa chaab a puusi Naawen ayen, “Ti Nyɔɔɔ, fi waai ale nyɛ wennmazuk ale tɛɲ ale nyakpeemu ale ɲanta baai meena ale bo ba po, ate fi soa ba la, ²⁵ fi va Naawen Chiika nyiɲ a pa biisi ale ti kokpienka Deevide waai ale ka fi tomteero la ate wa yaa weeni ayen,

‘Ka boa ale soa ate nuru baai ale kan daa Juuba la sue a puuri nna yegayega?

Ka boa ale soa ate nuruma ta popola kayaata?

²⁶ Tɛŋka meena nalimaŋa gomsɪ ba dek a magsi ka kpaliŋ.

Ninɗeeroma de meena abe nyɛ ka tuka ayen ba nyɛ kpaliŋ ale Nyɔnɔwa Naawen ale Kirisitawa ate Naawen a weeni ayen wa le tom wa la.'

²⁷ Ku be sum ka wensie, Naawa Ayerod ale Gominawa Pontios Paalot a nyɛ tuka kama tɛŋka de po ale Izirali dem ale baai ale kan daa Izirali dem la a maa chaab a zok ayen ba nyɛ Yeezu waai ale ka tomteero welenka ate fi nyɛ wa ate wa chim Kirisitawa la wari. ²⁸ Ba tu ka chaab ayen ba nyɛ wannɪ de, alege ba ŋman ze ayen ka fi dek ale fi pagrim popola ayen di la nyɛ. ²⁹ Yogyɔgla de, Nyɔnɔ, nya ba ale a nyigsi ti dii ale popola ŋaai ayen ba nyɛ ti jigi la. Be basi ate tama fi tomteeroma a ta pagrim a biisi fi wamaŋsaŋa abe ti kan a chali yɔgsum.

³⁰ Pa fi pagrimu a tebi nuruba, abe fi te siuk ate ti pa fi tomteero welenka Yeezu yonni a nyɛ wakperikaliisa ate nuruba nya."

³¹ Ba ale jam puusi a nueri la, juijui ate ba jam kala la, a yaa jam a choa. Naawen Chiika a jam sueri ba meena suniimaŋa kama ate ba yaa deri piilim a biisi Naawen wamaŋsaŋa ale nyinpagra.

³² Baai meena ale jam ta siaka ale Yeezu la, a jam ta ka noai yeŋ ale popola yena. Ba waai jam karo a weeni ayen wa ŋanta baai ate wa ta la ka wa dek wa nyiini ŋanta, alege ba meena a pa ba ŋantaŋa a chari ka chaab. ³³ Tuimtomdoma a yaa jam a sak kama ale pagrim ayen ba nya Yeezu ale yiri kum po la kama. Naawen a jam

niak ba kama nna yegayega. ³⁴ Nuru a jam ka ba po a nam a yaali jaaboa. Baai meena ale jam soa tenja ale yie la, a pa da kama, a ta ligraña ³⁵ a jam a te tuimtomdoma. Ligraña de ba yaa pa kama a chari ba meena a magsi chaab ale ba wanyiwanyi ale sum a yaali ligra dii la.

³⁶ Nuru wanyi ale jam boro. Wa yoi ale Josefi. Wa jam ka Livai deno ate ba biak wa tenj kaai ate ba a wi ayen Saipurur la. Tuimtomdoma a jam te wa ka yoi ayen Banabas. Di kiri ale nuru waai ale a denji nuruba kpa la. ³⁷ Nuruwa de waai ale jam ka ba po la, a yaa jam pa wa tenj a da a yaa ta ligraña a jam te tuimtomdoma.

5

¹ Alege nuru ale jam boro. Wa yoi ale Ananaiyas. Wa powa yoi ale Safira. Ba yaa maa chaab a pa ba njanta a da. ² Ba yaa maa chaab a poori ligraña ña gela a ta ba dek ale ge njala a te tuimtomdoma.

³ Ba ale ta ligraña a jam tuimtomdoma jigi la, Piita yaa bek wa ayen, “Ananaiyas, ka boa ale soa ate fi basi ate Sitaana paasi fu ate fi velim ale Naawen Chiika alege a yaa tali tenjka ligraña gela? ⁴ Diipo ate fi an diem pa ka a da la, daa fi ale jam soa ka? Fi be ale pa ka me a da la, ligraña me daa fi ale soa? Be ka boa ale soa ate fi poli a nye wanni de? Nya de, fi an velim ale daa nurubiiga, fi velim ale ka Naawen.”

⁵ Ananaiyas ale wom nna la, wa yaa deri lo tenj a kpi ate yogsum nna yegayega a yaa yik baai meena ale jam wom nyaku de la. ⁶ Nidoa paaluk

baai ale jam bo dula la a yaa pa garupali a vili wa nyinka a ji wa ta nyini chen a ga gu.

⁷ Ku ale ga beni maga dek la, wa powa a yaa jam jo. Wa jam ze dii ale nye la. ⁸ Piita a yaa weeni wa ayen, “Weeni a sak mu, fi ale fi chorowa ale pa ni tenka da la, ka ligrana meena ale la ate nama a ta jam?”

Nipowa yaa tulisi Piita ayen, “Mm, na meena ale la.”

⁹ Piita yaa bek wa ayen, “Be ka boa ale soa ate fi ale fi chorowa a maa chaab ayen ni nye Nyonowa Naawen Chiika a nya? Nya de, nidɔa baai ale ta fi chorowa a ga gu la, a nman cheena kama dokku noai yogyogla de. Ba be a le ji fi me kama a ta nyini ga gu.”

¹⁰ Wa yaa deri lo Piita nanɔa ten a kpi. Nidɔa paaluku a yaa jam jo a nya ale wa kpiya ate ba yaa ji wa a ta nyini a ga gu wa chorowa ten.

¹¹ Yogsum nna yegayega a yaa jam yik Kirisita bisana meena ale baai meena me ale jam wom wienɔa de la.

¹² Tuimtomdoma kasim jam a nye ka wakperikaliisa nna yegayega nuruma po. Baai ale ta siaka la, a kasim jam a nye tuka ale chaab ka Solomon Posuku jigini Juuma Puusika Yenni po.

¹³ Nuru waai ale jam kan daa ba po la a jam a chali ka yogsum ayen wa pa wa dek a gum ba po. Alege nuruma a kasim jam a te ba ka pimpauk nna yegayega. ¹⁴ Nuru bɔari nna yegayega nidɔaba ale nipooba baai ale jam ta siaka ale Nyonowa la a kasim jam a gum ba po.

¹⁵ Tuimtomdoma ale jam a nye dii la a basi kama ate nuruba ji yogyeeensa ale gaduaata ale taasa

a ta ba nyini suitaŋa niŋsa ayen Piita a dan va a taam abe wa yisuŋku a jogi va ba zuk a taam. ¹⁶ Nuru boari nna yegayega a jam nyini teŋ sii ale kala gilim Jerusalem teŋka la a ta nuru baai ale a yuak a yaase chichiribaata a bo ba zuima po la a jam. Ba meena jam nya nyinyoŋsa kama.

¹⁷ Alege Juuma Puusika Yenni kpagi kpeeni ale wa vaanchaama meena Sajusi demma a yaa jam a de nyuri ale tuimtomdoma. ¹⁸ Dila nyiŋ la, ba yaa yik tuimtomdoma a lik doƙ kuui po ate ba a lik waai meena ku po la. ¹⁹ Yok kuui ate ba lik ba la, Naawen sabiilo a yaa jam lak likka diinaŋa noaŋa a ta tuimtomdoma a nyini a yaa weeni ba ayen, ²⁰ “Ni cheŋ a ga jo zaani Juuma Puusika Yenni po a weeni nuruma nyuvuri paalini de kiri ale ka dii la.” ²¹ Tuimtomdoma yaa siak wa noanni a yaa yiri saliuk yokyok a ga jo Juuma Puusika Yenni po a sak nuruma.

Dila powa Juuma Puusika Yenni kpaŋŋa kpagi kpeeni ale wa vaanchaama yaa wi Juuma nisomma meena ate ba jam jigi yeŋ a nye tuka. Ba yaa tom nuruba ayen ba cheŋ likka diinaŋa a ga ta tuimtomdoma a jam ba niŋ. ²² Alege nuruma baai ate ba tom ayen ba ga ta ba a jam la a yaa cheŋ ga a paari alege tuimtomdoma ka likka doƙku po ate ba pilim ŋman jam a weeni a sak ba ayen, ²³ “Tama ale ga a paari likka doƙku la ku jam lik kama nalimnyiini ate baai ale za a limsi la a diem za a limsi. Alege tama ale ga lagi doƙku noanni la, tama an nya nuru du.” ²⁴ Juuma Puusika Yenni limsidoma kpagini ale Juuma Puusika Yenni kpaŋŋa ale ga wom dila

la, ba yaa tuim ate ba a poli jaab buui ate wannu de le ta jam la. ²⁵ Nuru wanyi a yaa jam jo ba jigi a weeni ba ayen, “Ni wom de, nuru baai ate ni yik a lik la, a za Juuma Puusika Yenni po a sak nuruma.” ²⁶ Puusika Yenni limsidoma kpagini ale wa nuruma a yaa maa chaab a chery a ga ta tuimtomdoma a nman jam. Ba an jam nye pagrim a yik ba dii nyiny la ba jam a chali ka yogsum ayen nuruma nin zaan yuk ba ale tintana.

²⁷ Ba yaa ta tuimtomdoma a jam zaani kpanya nin ate Juuma Puusika Yenni kpagi kpeeni a yaa bek ba ayen, ²⁸ “Tama an weeni ni ale nin muna ayen, ni kan pa Yeezu yonni nyiny a sak nuruba? Alege nama dek abe nya ni ale kasim a pa ni sinsanya a sueri Jerusalem tenka po dii la. Ni be a yaali kama ayen ni weeni ayen ka tama ale soa ate wa kpi?”

²⁹ Piita ale tuimtomdo mbala a yaa tulisi ayen, “Ku a fe kama ayen ti siak a te Naawen noai a gaam nurubiik noai. ³⁰ Ni ale yik Yeezu a kpi jabarimu nyiny a ko wa la, tama ale ti koma Naawenni a nak wa a yiri kum po kama. ³¹ Naawen zak wa kama a kali wa dek juga ase Nindeero ale Varibasido la ayen ku te Izirali demma siuk ate ba basi ba wabaatana tomka ate ba nya wabaatana vondeka. ³² Naawen Chiika waai ate Naawen a pa a te baai ale a zuli wa noai la, ale a weeni wienya de. Tama abe maa nya wienya de kama ate ti weeni a sak nuruba.”

³³ Kpanya ale wom nna la, ku yaa puuri ba sue nalimnyiini ate ba jam a yaali ayen ba ko ba. ³⁴ Alege kpanya po wanyi a jam ka Farisii.

Wa yoi ale Gamaliil. Wa jam ka Juuma Sinsan̄ṅa sagro. Waai meena a kasim jam a te wa zula ka nna yegayega. Wala a yaa yiri zaani kpan̄ṅa po a weeni ayen ba ta tuimtomdoma a nyini peelim ate ku nye maga dega. ³⁵ Wa yaa weeni tuka demma ayen, “Izirali demma, ni kpesi ni dek ale ni ale ni nye dii nuruma de jigi la. ³⁶ Nama dek бага teeri ayen nuru waai ate ba a wi ayen Teudasi la a jam pa wa dek a sak kama ayen wa ka nuru kpion̄ nna yegayega ate nuruba yaa jam paari nid̄aba kobsinaansi a pa ba dek a te wa. Alege Aroom demma ko wa kama ate wa ṅaan̄viirima meena a jam waan̄ chaab ate wa wann̄i me a be. ³⁷ Dila ṅaan̄nyin̄ ate Judas Galili denowa me a jam jam diipo ate ba jam boro a chiini nuruma la. Wa ale jam jam la, nuru boari ale jam va wa me. Alege ba ko wa me kama ate wa nuruma meena a waan̄ chaab. ³⁸ Dila nyin̄ ate mi a weeni ni ayen ni kan nye nuruma de wariya. Ni basi ba ba dek ba nyiini. Boan nyin̄ṅa, ba ale poli dii ale a nye ba nyeka la, ku dan nyini ka nurubiik dek popola jigi, ku a le murum be kama, ³⁹ alege ku dan nyini ka Naawen jigi, ni an бага ale nak a yiak ba. Ni be kpesi ni dek ate ni kan kpalim chaab ale Naawen ya.”

Gamaliil ale weeni dila a ga nueri la, ba yaa deri pa wa sinsan̄ṅa, ⁴⁰ a yaa wi ate tuimtomdoma jo ate ba nak ba ale weeni ba ale nin muna ayen ba kan pa Yeezu yonni nyin̄ a biisi wariya, alege basi ba ate ba chen̄. ⁴¹ Tuimtomdoma ale jam basi ba la, ba sue a jam peenti kama dii nyin̄ la, ka Naawen ale pa ba a chim nuru baai ale magsi ayen ba nam a nya

chivie Yeezu yonni nyinj la. ⁴² Daa meena Juuma Puusika Yenni po ale nuruba yie po ba kasim jam bo ka ŋa po a sak nuruba ayen Yeezu ka Kirisitawa (waai ate Naawen a weeni ayen wa a le tom ate wa jam la).

6

¹ Va ŋala po ate Yeezu ŋaanviirima a yaa jam piisi a gum du la, kpalinj a yaa jam yiri ba sunsun, Juuma baai ale jam a biisi Giriki demma biika la, ale baai me ale jam a biisi Juuma biika la. Baai ale jam a biisi Giriki biika la, a jam a ŋuuni kama ayen ba pukonŋa a kan jam maari a nya ligi ŋaai ate nuruba jam pa a chari daa meena la. ² Tuimtomdoma pi ale bayewa a yaa wi ŋaanviirima meena ate ba jam jigi yenj ate ba weeni ba ayen, “Ku an magsi ayen ti basi Naawen wamanŋaŋa sakka abe ti ta ligra tuima. ³ Dila nyinj m suaata, ni lueri nuruba bayopoi baai dek ate nama a seba ayen Naawen Chiika ale yam, sueri ba kama la, ate tama yaa pa ligra tuimaŋa de a nyo ba nisima po. ⁴ Abe tama dek a pa ti dek a te Naawen puusa ale wa wamanŋaŋa sinsaga ase ti ale kasim a nye dii la.”

⁵ Ba meena sue a yaa kasim jam peenti kama ale tuimtomdoma ale weeni dii nna la. Ba yaa lueri Sitiven waai ale jam ta siaka nalimnyiini la ale ta Naawen Chiika me la. Baai ale pa sanj la ale: Filip, ale Porokorus, ale Nikano, ale Timon, ale Paminas, ale Nikolasi. Wa jam nyini ka Antiok a yaa tagri wa dek dila po dila po maa va Juuma wensiuku alege wa daa Juu. ⁶ Ba yaa

pa ba a sak tuimtomdoma ate ba puusi Naawen a te ba a pa ba nisima a vi ba zuk.

⁷ Naawen wannu a yaa kasim jam a tagli Jerusalem meena ate n̄aan̄viirima ale bo dula la a jam piisi a gum du. Juuma Puusika Yenni kpan̄na yegayega me a jam ta siaka ale sinsan̄na kama.

⁸ Sitiven abe jam ka waai ate Naawen a te wa niaka nna yegayega ate pagrim a sueri wa la. Wa jam tom ka wakperikaliisa nna yegayega nuruma sunsun̄. ⁹ Alege tuka d̄ok kunyi po nuruba ale jam boro a te ba dek yue ayen An̄mandaayom. Juuma ale jam maa nyini Sairini ale Alezandiria ale Silisiya, ale Asia t̄an̄san̄a la a yaa jam maa bo ba po. Nya ba de meena a yaa jam maa chaab a ta nampaga ale Sitiven. ¹⁰ Alege Naawen Chiika a jam te Sitiven ka yam ate wa dan jam biisi wari, ba an бага a tulisi wa. ¹¹ Ba yaa biisi ale noamasim ale nuruma ayen ba weeni ayen ba wom ale wa a le Moosis ale Naawen. ¹² Ba ale nye nna la, ku yaa te nuruma ale nisomma ale Juuma Sinsan̄na sagroma nyin̄pagra ate ba yik Sitiven ale pagrim a ta wa a chen̄ tuka kpan̄na jigi. ¹³ Ba yaa ta nuruba ba gela a jam jo ayen ba velim a te wa a weeni ayen, “Nuruwa de a kasim a le ti Juuma Puusika Yeri Welen̄ka ale Moosis Sinsan̄na kama. ¹⁴ Tama wom kama ale wa weeni me ayen Yeezuwa de a le daasi Juuma Puusika Yenni a lonsi abe wa tagri kisi tii meena ate Moosis a te ti la.” ¹⁵ Baai meena ale kali kpan̄na tuka d̄okku po la, a yaa kasim jam a nya Sitiven nna zii, a yaa nya ale wa nimbidiaka a

nyagsi nna ase Naawen sabiilo nimbidiak la.

7

¹ Juuma Puusika Yenni kpagi kpeeni yaa bek Sitiven ayen, “Nuruma ale a weeni dii la ka wensie?”

² Sitiven yaa tulisi wa ale biik ayen, “M suaata ale m koba, ni lak tue a wom mi ale ta dii ayen m biisi la. Naawen waai ate ku magsi ayen nuruba a zuli wa la, a jam pa wa dek a sak ti kowa Abraham kama. Dila powa, Abraham diem jam bo ka Mesopotamiya tenka. Wa an diem jam cheŋ Yaran Naawen yaa jam jam wa jigi Mesopotamiya tenka po ³ a weeni wa ayen, ‘Basi fi tenka ale fi dokdemma abe fi cheŋ tenka kaai ate mi ayen m dak a sak fu la.’

⁴ “Abraham yaa basi Kaldiya tenka ale ge cheŋ a ga bo Yaran tenka. Abraham kowa ale ga kpi la, Naawen yaa weeni Abraham ayen wa jam tenka de ate ni boro yogyogla nna la. ⁵ Dila powa Naawen an jam te Abraham tenka de juijuiya ayen Abraham dek abe soa dela ale fiifiik me la. Alege Naawen jam puulim kama ayen wa a le pa ka a te wa ate wa ale wa ŋaŋbisa meena a soa ka. Diipo ate Naawen weeni Abraham nna la, wa jam diem ka biiga. ⁶ Naawen ale weeni wa dii la ale nna ayen, ‘Fi ŋaŋbisaŋa a le cheŋ ka saten a ga chim nicham ate ba deri pa ba a chim yom dula jigini. Tenka kala demma le basi ate ba nam ate ku ga paari bena kobsinaansi. ⁷ Alege tenka kala ate ba tom a te la, mi le bo ka buusa. Dila ŋaŋnyin ba a le basi tenka kala abe ba nyini a jam dela jigini a te mi zula.’ ⁸ Naawen yaa

weeni Abraham ayen wa gebi wa yoanni ate ku sak ayen wa ale Abraham a yaa ta ka noai yen ale chaab. Abraham a yaa biak Aizik a gebi wa me yoanni wa biam da naaniŋ dai. Aizik me yaa biak Jakob ate Jakob me a yaa chim wa bisa pi ale bayewa ko. (Bisaŋa de ale se Izirali yezuima pi ale ŋayewa.)

⁹ “Jakob bisaŋa yaa a de nyuri ale ba suoku Josefi a deri yik wa a da ate wa chim yomo Ejipiti teŋka. Alege Naawen a jam bo ale wa kama ¹⁰ a maa maari a vari wa a basi nalimnyiini ale dii meena wuu ale a daani wa la. Josefi ale din jam a zaani Ejipiti nakpionku niŋ la, Naawen yaa te wa nye maŋ ale yam ate ku peenti Ejipiti naawa poi ate wa deri nye Josefi ate wa chim Ejipiti ale wa Yenni Gomina a nya teŋka ale wa Yenni zuk. ¹¹ Kom a yaa jam jam Ejipiti ale Keenan teŋsaŋa ate ninam nna yegayega a yaa jam. Ti kokpiensaŋa an jam бага a nya ŋandiinta. ¹² Jakob ale wom ayen ŋandiinta a bo Ejipiti teŋka la, wa yaa tom wa bisaŋa ti koma ayen ba cheŋ dula jigini. Ba piilim chelim ale la. ¹³ Ba ale ŋman pilim cheŋ dii a nye buye la, Josefi a yaa basi ate wa suaataŋa a miŋ wa, ate Naawa a yaa seba Josefi dokdemma. ¹⁴ Josefi yaa te tuntomiŋ wa kowa Jakob a weeni wa ayen wa ale wa dokdemma meena nuruba pisiyopoi ale banuwa a jam Ejipiti teŋka a maa boro ale wa. ¹⁵ Jakob a yaa koalim cheŋ Ejipiti teŋka a bo dula a yaa kpi ate ti kokpiensaŋa me kpi ¹⁶ ate ba yaa pa ba a ta jam teŋka de juijui ate ba a wi ayen Sikiim la a gu ba. Ba jam gu ba ka vorub buui

po ate ba gu Abraham la. Abraham dek ale jam da vorumu ale ligra Ayaamo bisanja jigi Sikiim tenka po.

¹⁷ “Alege Naawen ale jam puulim dii ale Abraham la a jam moata kama. Ti nuruma a yaa nmasi jam a piisi a gum du Ejipiti tenka po.

¹⁸ Naawa ale jam kpi la ku njaanynin ate naab wa choa a yaa nman jam soa Ejipiti tenka a nya. Dila po wa Josefi a jam poom kpi kama ate ku beni. Napaalika de jam ze Josefi. ¹⁹ Wala a jam ta ka gaasa nna yegayega ale ti kokpiensanja a fe ba ayen ba pa ba biluaatana a ta nyini peelim a dueni ate ba kpi. ²⁰ Dila powa ale ba jam biak Moosis. Wa jam nala ka nna yegayega. Wa jam bo ka wa kowa yenni ate ba a nya wa zuk ate ku ga paari chiisa sita. ²¹ Ba ale jam maa pa wa a dueni peelim ayen wa kpi la, naawa le ale jam pa wa ate wa chim wa dek biik a yaa a nya wa zuk. ²² Ba jam sak wa kama Ejipiti demma Yammu meena ale ka dii la ate wa yaa chim nuru kperikaliik wie po ale wa biik po.

²³ “Moosis ale chim paari bena pisinaansi la, ku yaa jam wa popola po ayen wa chen ga nya wa suaatana Izirali bisanja. ²⁴ Wa yaa nya ale Ejipiti deno wanyi ale wa a nye Izirali deno wanyi gaasa nna yegayega. Moosis yaa ga ayen wa maari wa suoku Izirali denowa. Wa yaa nye dila a deri ko Ejipiti denowa. ²⁵ Wa jam poli kama ayen wa dek nuruma le min ayen Naawen le pa ka wa a vari ba a basi, alege ba an jam minya. ²⁶ Vari ale veenti la Moosis yaa nya ale Izirali demma baye a ta chaab ate wa yaa pii nyin ayen wa gaari ba.

Wa yaa weeni ba ayen, 'Nidoaba, ni wom de, ni ka suaata, ka boa ale soa ate ni a kpaliŋ chaaba.'

²⁷ Alege nuru waai ale jam a namsi wa choawa la a yaa tusi Moosis ate wa taam nakpiak ale ge bek Moosis ayen, 'Ka wana ale ti an bobi fi naam ate fi a biisi tama biisa?' ²⁸ Fi a yaali ayen fi ko mi me kama ase deemwa ate fi ko Ejipiti denowa dii la?' ²⁹ Moosis ale wom nna la, wa yaa basi Ejipiti tenka ale yiri chali cheŋ a ga bo Midian tenka. Dula jigini wa yaa biak bisa baye.

³⁰ "Bena pisinaansi ale ga taam la, Naawen sabiilo a yaa jam Moosis jigi sagini po guuk kuui ate ba a wi ayen Sinaai Guuk la ten. Sabiilowa a jam a pa wa dek a sak Moosis bolimu po ate Moosis yaa nya bolimu ale bu a nye nna ase bu a de tiib la. ³¹ Moosis ale jam nya dila la, ku yaa cha wa ate wa yaa forisi paari ayen wa nmasi nya chak. Wa yaa jam wom Nyɔɔwa lueluk ale ku a weeni ayen, ³² 'Mi ka fi kokpiensaŋa Naawen, Abraham ale Aizik ale Jakob Naawen.' Yɔgsum yaa yik Moosis ate wa nyinŋa a gok ate wa an nman jam baga a pa wa nina virin a nya bu. ³³ Ti Nyɔɔwa yaa weeni wa ayen, 'Yeeri fi nuensaŋa, dii nyin la, fi ale za juijui la, ka welensa ten. ³⁴ M nya m nuruma ale bo Ejipiti tenka a nam dii nna yegayega la kama. M be wom ba funfobla me kama ate m sin jam ayen m vari ba a basi. Gomsfi fi dek yogyogla de ate m tom ate fi cheŋ Ejipiti.'

³⁵ "Moosiswa de ate ba jam zeri wa ale a bek wa ayen, 'Ka wana ale ti an bobi fi naam ate fi a biisi tama biisa?' Ka Naawen dek ale tom wa ba jigi. Wa jam basi ate ka Sabiilowa waai ale jam jam wa jigi tiimu ale a de la po la a maa

maari wa ayen wa soa ba a nya ba zuk abe wa chim ba varibasido? ³⁶ Wa sum jam de nuruma niŋ kama a ta ba a nyini Ejipiti teŋka po a nyini a nye wakperikaliisa ale wie ŋaai ale a sak ayen Naawen bo ale wa kama Ejipiti teŋka po ale mogi kpeeni dii ate ba a wi ayen Nyamonuŋ la po, ale sagini po ate ku ga paari bena pisinaansi. ³⁷ Moosiswa de abe ale weeni Izirali demma ayen, ‘Naawen a le tom ka wa biisiteero ase mi la ate wa nyini ni po.’ ³⁸ Moosiswa de abe ka waai ale jam bo Izirali demma po diipo ate ba jam tigi chaama sagini po la. Wa jam boro kama diipo ate Naawen sabiilowa a jam biisi ale wa Sinaai Guuku zuk la. Wa be tuesi Naawen tuntomiŋ kaai ale a te ti nyuvuri la kama yaa pa ka a te ti.

³⁹ “Alege ti kokpiensaŋa a zeri wa noai kama. Ba tusi wa a basi ka nakpiak ale a yiili ba suniima po ayen ba dan бага abe ba pilim cheŋ Ejipiti teŋka. ⁴⁰ Ba yaa weeni Moosis suoku Aaron ayen, ‘Nye bogluk tii a le ti de ti niŋ la a te ti. Moosiswa de waai ale ta ti nyini Ejipiti teŋka po a nyini la, ti ze jaab buui ale nye wa la.’ ⁴¹ Ka dila powa ate ba nye bogluk ate ku a neensi naabiik ate ba yaa a kaab ku, a nye ŋandiinta tiga a te ku zula, jaab buui ate ba nye ale ba dek nisima la. ⁴² Dila nyiŋ Naawen yaa pa wa ŋaŋ a te ba a pa ba basi ayen ba a zuli chiŋmarisaŋa ase ba ale ŋmarisi dii Naawen biisiteero ma gbaŋka po kaai ale bo Naawen gbaŋka po dii la ayen,
 ‘Izirali demma, diipo ate ni jam bo sagini po ate
 ku ga paari bena pisinaansi la, daa mi ate
 ni jam kaab duŋsaŋa a te la.

⁴³ Ni jam pa ka bogluk kuui ate ba a wi ayen Molok la viuku a ji.

Ni jam maa pa ka ni chinmarika bogluku ate ba a wi ayen Arifan la jameemu a ji a ta cheŋ me.

Bala meena ka bogluta ate ni nye a yaa te ti zula.

Dila nyiŋ m le basi ate nuruba a ta ni cheŋ gaam Babilon teŋka a be.'

⁴⁴ "Ti kokpienŋa ale jam bo sagini po la, ba jam ta ka viuk kuui ate ba pa garuku a nye ku ate ba бага kpiti ku a a ta a cheŋ jigi meena ate ba a yaali la. Naawen Sinsanŋa piika ate wa jam ŋmarisi ŋa la a jam bo ka viuku de po. Ba jam nye viuku kama ase Naawen ale weeni Moosis ale sak wa me ayen ba nye ku dii la. ⁴⁵ Ku ŋaanŋyiŋ ate ti kokpienŋa a tuesi ku ba koma jigi la, a jam ji ku kama diipo ate ba jam va Josua ate ba jam tuesi teŋ sii ate Naawen a jam yiaŋ ka nuruma alege ate ba a cheŋ la. Ba jam ta Viuku ka dila teŋ sila po ate ku ga paari diipo ate Deivid jam la. ⁴⁶ Naawen sui jam peenti ale wa kama ate wa bek Naawen ayen wa basi ate wa se yeri a te wa Naawen waai ale ka wa kokpienka Jakob Naawen la. ⁴⁷ Alege Naawen jam basi kama ate Deivid biika Solomon a se yenni a te Naawen.

⁴⁸ "Alege ni basi ate m weeni a sak ni ayen wiŋa de meena wuu po Naawen kpeeni ka daa yie po ŋaai ate nurubisa a pa ba nisima se la, ase Naawen biisiteerowa ale weeni dii ayen Naawen weeni ayen,

⁴⁹ 'Wenŋmazuk ale mi zukpaglik kpeenka,

tɛŋzuk de abe ale juijui ate m pa m nanŋsaŋa
a tabi ka zuk a vuusi la.

Ka boan jaab yeri ate nama ale se a te mi?

Ka be ate mi a le boro?

⁵⁰ Daa mi dek ale nyɛ nyaba de meena?’ ”

⁵¹ Sitiven yaa ŋman biisi a cheŋ a weeni ayen,
“Ni ka tukpara nyam. Ni a nyɛ ase ni daa
Naawen nuruba la. Ni nyiem kasim a zeri
Naawen Chiika kama. Ase ni kokpiɛnsaŋa ale
nyɛ dii la, nama me a nyɛ ka dila degadega.

⁵² Naawen biisiteerɔma wanyi me la a jam boro
ate ni koma an basi ate wa namya? Ba jam
maa ko ba baai me ale jam mooli sak ayen
Wayɔrisima Nyɔŋɔ a cheena la. Wayɔrisima
Nyɔŋɔwa de abe ale nama bobri sak ate ba yik
wa a ko la. ⁵³ Nama abe ale jam tuesi Naawen
Sinsaŋa. Naawen sabiiloma dek abe ale jam pa
ŋa a te ni. Alege ni an siak a te ŋa.”

⁵⁴ Kpaŋŋa ale wom Sitiven ale a biisi dii la, ku
yaa te ba supuurim nna yegayega ate ba ŋobi
nyina. ⁵⁵ Alege Sitiven sunummu ale poom jam
sueri ale Naawen Chiika la wa yaa zak zuk a nya
wennmazuk a yaa nya Naawen nyagsika a yaa
nya me ale Yeezu za Naawen juga geŋ. ⁵⁶ Sitiven
yaa weeni ayen, “Ni nya de, mi nya kama ale
wennmazuk a lagi ate Saalobiika a za Naawen
juga geŋ.”

⁵⁷ Kpaŋŋa a yaa kaari nna yegayega a weeni
ayen ba kan ŋman a yaali ayen ba wom wa. Ba
yaa chali cheŋ wa jigi ⁵⁸ a yik wa a ta nyini tɛŋka
po a nyini a yaa pa tintana a yuk wa ayen ba
ko. Seeroma me a yeeri ba kasautana a dueni
bipaalik kanyi ate ba a wi ayen Sool nanŋa tɛŋ

ayen wa a nya. ⁵⁹ Ba ale jam a yuk wa la, Sitiven a kasim jam a wi ka Nyɔɔɔ ayen, “M Nyɔɔɔ Yeezu, ɲɔa m chiika.” ⁶⁰ Wa yaa kpi duna tɛɲ a weeni ate ku jueli ayen, “M Nyɔɔɔ, kan teeri wabioku de ate fi bek ba.” Wa ale weeni nna la, wa yaa deri kpi.

8

¹ Sool a jam maa ka baai ale siak ayen ba ko Sitiven la po wanyi.

Da dii dannu ate ba ko Sitiven la, Kirisita bisaɲa ale a tu chaab Jerusalem tɛɲka la a deri piilim ninam nna yegayega nyaka. Baai ale ta siaka ale Yeezu la, a yaa jam waanɲ chaab Judia ale Samaria tɛɲsaɲa meena po. Ka tuimtomdoma nyiini ale jam kan waanɲ chaaba. ² Nuru baai ale ɲmasi jam yaali Naawen siuku nna yegayega la, ale jam ta Sitiven a ga gu ale a kaari nna yegayega.

³ Alege Sool a jam diem pii ka nyinɲ a nyiem gilim a cheɲ yeeɲa dinyi dinyi a basi ate Kirisita bisaɲa ale a tu chaab la a nam a dari ba meena nidɔaba ale nipooba a yuk basi likka diinaɲa po.

⁴ Baai meena ale ta siaka ate ba waanɲ jigi meena la, a yaa jam nyiem a cheɲ jigi meena a sak Naawen wamaɲsaɲa. ⁵ Filip jam cheɲ ka Samaria tɛɲkpienka dek po a sak nuruba. Varibasidɔwa ate Naawen weeni ayen wa le basi ate wa jam la wie. ⁶ Nuru boanni ale jam nya wakperikaliik sii ate Filip nyɛ la, ba yaa ɲmasi lagi ba tuenɲa nalimnyiini a wom wa sinsaɲa. ⁷ Wie ɲaai ale jam nyɛ la gela ale, nuruba yegayega baai ale jam ta chichiribaata ba zuima

po la, a kaari ate ti a nyini, ale baai nan̄sa ale ba nisima ale jam kpi la, a jam nya nyinyoḡsa kama. ⁸ Dila nyin̄ la, supeantik nna yegayega a jam bo tɛŋ kala po kama.

⁹ Nuru wanyi ale jam bo tɛŋ kala po. Wa yoi jam ale Simon. Wa jam ka tiita nyɔ̄nɔ. Wa jam pa ka tiita a nyɛ wakperikaliisa nna yegayega ate ŋa cha Samaria demma. Wa jam pa wa dek a chim ka nuru kpion̄. ¹⁰ Waai meena nuru kpeenta ale nuru fiisa tɛŋ kala po a jam a wom wa ka nna yegayega a weeni ayen, “Nuruwa de ta ka Naawen pagrim kpiem buui ate ti a wi wa ayen Pagrim kpion̄ la.” ¹¹ Ba jam a wom wa kama nalimnyiini dii nyin̄ la, wa wakperikaliisaŋa a jam cha ba beni ka nna yegayega. ¹² Alege ba ale jam wom Filip sinsan̄ŋa a magsi chaab ale Naawen Naamu ale Yeezu Kirisita pagrimu wie la, ba meena nidɔaba ale nipooba a jam tuesi ka soka. ¹³ Simon dek a jam maa ta siaka kama. Ba ale jam te wa soka a ga nueri la, wa yaa jam maa boro ale Filip ate ku kasim jam a cha wa ate wa nya Naawen ale pa wa nyɛ wakperikaliisa ale wie ŋaai ale a sak ayen Naawen bo ale wa kama la.

¹⁴ Tuimtomdɔma ale jam bo Jerusalem la a yaa wom ayen Samaria demma a tuesi Naawen Wanni kama la, ba yaa tom Piita ale Joɔn ayen ba cheŋ ba jigi. ¹⁵ Ba ale jam cheŋ a ga paari la, ba yaa puusi Naawen a te baai ale ta siaka la ayen ba tuesi Naawen Chiika. ¹⁶ Dii nyin̄ la, Naawen Chiika an diem jam sin̄ ba waai zuwa. Ba jam tuesi ka soka nyiini Nyɔ̄nɔwa Yeezu yonni nyin̄.

17 Piita ale Joon a yaa pa ba nisimaŋa a vi ba zuk ate Naawen yaa te ba Naawen Chiika.

18 Simon ale nya ayen tuimtomdoma a pa ba nisima a vi ba zuk ate ba tuesi Naawen Chiika la, wa yaa pa ligra ayen wa te Piita ale Joon, 19 a weeni ba ayen, “Ni te mi me pagrimu de choawa ate mi me a dan pa m nisimaŋa a vi nuru zuk, abe wa me a tuesi Naawen Chiika.”

20 Alege Piita a yaa tulisi wa ayen, “Fi ale fi ligraŋa meena maa chaab a kpi, boan nyinŋa, fi a poli kama ayen fi baga a da Naawen tiirimu ale ka ligra! 21 Fi niŋ a maa ka ti tuimaŋa po dii nyin la, fi sunummu a ka nyemagsika ale Naawenya.

22 Dila nyin, ku a fe kama ayen fi tagri fi popola baataŋa de abe fi puusi ate Nyonowa a vonj a te fu fi ale poli wanni de choawa la nyin. 23 Dii nyin la, m nya kama ale fi sunummu a kasim sueri ale ka nyuri ate ku basi ate fi an baga a chala be fi wabaataŋa jigiya.”

24 Simon a yaa weeni Piita ale Joon ayen, “Mi a saalim, ni puusi a te Nyonowa a te mu ate wienja de meena ate ni biisi la a kan jam mi jigiya.”

25 Piita ale Joon ale biisi soa se ba ale seba Yeezu a soa dii la, ale maa sak ba Naawen wamaŋsaŋa a ga nueri la, ba yaa pilim nman cheŋ Jerusalem tenka. Ba ale jam bo siuku po a cheŋ la, ba jam sak Naawen wamaŋsaŋa Samaria tenfiisaŋa yegayega po kama.

26 Nyonowa sabiilo a yaa weeni Filip ayen, “Gomsi fi dek a yiri cheŋ a va yenin gala nyin a va siuk kuui ale dua Jerusalem ale Gaza tenka sunsuŋ la.” (Ku ka siuk kuui ale va sagini po a cheŋ la.) 27-28 Filip a yaa yiri a cheŋ. Wa

ale jam bo siuku po a cheŋ la, wa yaa ga tu Itoopiya teŋka kpagi kpien dinyi. Wa me a jam bo ka siuku po a kuli. Wa jam a nya ka Itoopiya teŋka nipok Naawa ligraŋa zuk. Kpagi kpeeni de jam cheŋ ka Jerusalem teŋka ayen wa puusi Naawen a yaa puusi nueri a kuli. Wa jam kala ka jaab po ate wusuma dari ta a cheŋ. Wa ale kala wa jaamu po a cheŋ la, wa jam a karim ka Naawen biisiteerowa Azaya ale ŋmarisi dii Naawen gbaŋka po la. ²⁹ Naawen Chiika a yaa weeni Filip ayen, “Yiri a ga pa fi dek gum chaab ale nuruwa.” ³⁰ Filip a yiri a chali cheŋ wa jigi a yaa wom ale wa a karim ka Naawen biisiteerowa Azaya gbaŋka. Filip a yaa bek wa ayen, “Fi miŋ a chak dii ate fi a karim la?”

³¹ Kpagini a yaa tulisi wa ayen, “Mi a le nyε ka se a miŋ chak ase nuru a nin kan weeni ku kiri a sak mu?” Wa yaa wi Filip ate wa jueli a maa kali jaamu po ale wa. ³² Nuruwa ale jam a karim dii la ale nna,

“Ase posuk ate ba ta a cheŋ ayen ba ko la,
 ase pabiik ate ba a gebi ka kobtaŋa a basi
 alege ka kan kaari la,
 wa an jam weeni wariya.

³³ Wa jam nya chivie alege ba jam mini wa wensienja kama.

Nuru karo ale baga a biisi wari a sak wa
 ŋaŋɓisaŋa,
 dii nyin la, wa nyuvunni teŋzuk de a kpeglim
 kama.”

³⁴ Kpagini a yaa bek Filip ayen, “Weeni a sak mu ka wana ate biisiteerowa a biisi wa wari nna? Ka wa dek yaa ka nuru yoŋŋɔa?” ³⁵ Filip a yaa

deri pa karimka de a piilim biik a weeni Naawen wamaŋsaŋa a magsi chaab ale Yeezu.

³⁶ Ba ale jam va chaab a cheŋ siuku po la, ba yaa jam paari jigi ate nyiam a dua ate kpagini a yaa weeni Filip ayen, “Nyiam ale nna. Ka boan ale wa kasi ate fi kan te mu soka?” ³⁷ Filip a yaa weeni wa ayen, “Fi ale nya soka ase fi nin siak ale fi sunum meena.” Kpagini yaa tulisi wa ayen, “Mm, m siak ya ale m sunum meena ayen Yeezu Kirisita ka Naawen biik.”

³⁸ Kpagini yaa nye ate jaamu a zaani, ate wa ale Filip a yaa maa chaab a siŋ nyiamu po ate Filip a te wa soka. ³⁹ Ba ale nyini nyiamu po a jueli la, Naawen Chiika a yaa deri ta Filip a cheŋ ale ge kpagini nyiini. Kpagini an ŋman nya wa, alege a yaa cheŋ wa chelimu ale supeentik. ⁴⁰ Filip a yaa deri nya ale wa dek a bo ka teŋ kaai ate ba a wi ayen Azotus la. Wa nyini teŋ kala a cheŋ Siizariya teŋka. Wa ale jam bo siuku po a cheŋ la, wa jam a sak Naawen wamaŋsaŋa ka teŋsaŋa meena.

9

¹ Nyaŋa de meena ale jam a nye la, alege Sool a kasim jam diem boro a nyigsi Nyonowa ŋaŋviirima kama ayen wa a le ko ba. Wa yaa jam cheŋ Juuma Puusika Yenni kpagi kpeeni jigi ² a bek wa ayen wa ŋmarisi gbaŋsa a te wa ate wa ta ga te Damasikus teŋka tuka diinaŋa demma, ate gbaŋsaŋa te wa siuk ate wa dan nya waai ale wa ka Nyonowa siuku nuru, nidɔa yaase nipok, abe wa yik kula nyonowa a bobi a ta cheŋ Jerusalem teŋka.

³ Sool yaa ale bo siuku po a chen ate wa jam moata Damasikus tenka la, wenna mazuk a yaa nyagsi nna yegayega a gilim wa. ⁴ Sool yaa lo ten a wom ale lueluk a weeni wa ayen, “Sool, Sool, ka boa ale soa ate fi a namsi mu nna?”

⁵ Alege Sool a yaa weeni wa ayen, “Ka wana, m Nyɔnɔ?”

Ate lueluku a yaa tulisi wa ayen, “Ka mi Yeezu ate fi a namsi, ⁶ alege yiri a jo tenka po ale fi le wom dii ale magsi ayen fi nye la.”

⁷ Nidɔa baai ale jam maa va wa a chen la a jam wom ka lueluku alege ba an nya nuru. Ba be an nman jam baga a biisi. ⁸ Sool ale ga yiri n mazuk la, wa ninaɲa yaa ligi ate wa an nman baga a nya. Ba yaa yik wa nisima a ta wa chen Damasikus tenka. ⁹ Ku jam paari ka daa nɔta alege wa an diem a nya. Wa be an jam de nandiinta a yaase wa nyu nyiam.

¹⁰ Yeezu nnaɲviirima po wanyi ale bo Damasikus tenka. Wa yue jam ale Ananaiyas. Nyɔnɔwa a yaa jam jam wa jigi nna se wa goa daasim kama la a yaa weeni wa ayen, “Ananaiyas.”

Ate wa yaa tulisi ayen, “M Nyɔnɔ, nya mi ale nna.”

¹¹ Nyɔnɔwa a yaa weeni wa ayen, “Yiri a chen siuk kuui ate ba a wi ayen Suyorosun la. Fi dan ga paari Judas yenni, bek ayen fi a yaali ka nuru waai ate ba a wi ayen Sool ate wa nyini Taasus tenka la. Wa boro a puusi ka Naawen. ¹² Wa seba kama ayen fi cheena dii nyin la, wa jam nya nuru nna ase wa goa daasim kama la, ale wa cheena wa jigi. Nuruwa yoi ale Ananaiyas. Wa jam nya

wa kama ate wa jam pa wa nisima a vi wa zuk ayen wa ninanja nman lagri.”

¹³ Ananaiyas a yaa tulisi Nyɔnɔwa ayen, “M Nyɔnɔ, mi wom ka nuruba yegayega jigi nuruwa de ale basi ate fi nuruma a nam yegayega dii Jerusalem tenka po la. ¹⁴ Wa be tuesi ka pagrim Juuma Puusika Yenni kpanja jigi a jam Damasikus tenka po ayen wa yik waai ale a wi fi ayen wa Nyɔnɔ la.”

¹⁵ Nyɔnɔwa a yaa weeni Ananaiyas ayen, “Chen, dii nyinj la m potim lueri wa kama ayen wa chim mi tomteero a weeni mi yonni a sak nuru baai ale kan daa Izirali demma la, ale ba nalim kpeema me, ale Izirali demma dek. ¹⁶ Mi dek abe a le sak wa ninam buui ate wa a le nam mi yonni nyinj la.”

¹⁷ Ananaiyas yaa chen ga jo yenni a pa wa nisimana a vi Sool zuk a weeni wa ayen, “M suok, Sool, Nyɔnɔwa Yeezu dek waai ale pa wa dek a sak fu siuk kuui po dek ate fi va a jam dela la ale tom mu fi jigi ayen m weeni fu ayen fi ninanja a nman lagri abe Naawen Chiika a sueri fi sunummu.” ¹⁸ Wa ale ga weeni nueri la, njanta nna ase jum pagta la a yaa nyini Sool ninanja po a nyini lo ate dula jigini wa yaa nman бага a nya. Wa yaa yiri zaani a tuesi soka. ¹⁹ Wa ale ga de nandiinta la, wa pagrimu a yaa nman pilim jam.

Sool yaa jam goa da maga dega Damasikus tenka po ale njanvirima. ²⁰ Wa yaa deri chen ga jo Juuma tuka diinanja po a deri piilim a sak nuruma Yeezu wie a weeni ba ayen, “Yeezu ka Naawen Biik.”

²¹ Baai meena ale jam wom wa sinsan̄a la, ku yaa cha ba nna yegayega ate ba a bek chaab ayen, “Ee, daa nuru waai ale jam bo Jerusalem ten̄ka a basi ate baai meena ale a wi Yeezu ayen ba Nyɔnɔ la a namu? Wa be jam dela daa dila nyin̄ ayen wa yik ba a ta chen̄ Juuma Puusika Yenni kpan̄a jigiya?”

²² Alege Sool a yaa n̄masi jam ta ka pagrim nna yegayega a sak wa sinsan̄a ale a biisi a nak nampaga nna yegayega ate ku yaa tuim Juuma baai ale jam bo Damasikus ten̄ka po la. Ba bula n̄man jam ka wari a weeni. Wa jam a nyɛ wien̄a de kama ayen ku sak ayen Yeezu sum ka Kirisitawa ate Naawen weeni ayen wa a le tom ate wa jam la.

²³ Daa yegayega ale ga taam la, Juuma a yaa jam jigi yen̄ a nyɛ tuka a poli ayen ba ko Sool.

²⁴ Alege wa jam wom ba ale poli ayen ba nyɛ wa dii la kama. Daa meena yok ale kantuen̄ ba kasim jam za ka ten̄ka po tuaatan̄a noa a limsi ayen ba dan nya wa abe ba ko wa. ²⁵ Alege da yen̄ yok po ate Sool n̄aan̄viirima a yaa pa wa a nyo busik po a ta wa va siaka tokparuku ate wa sin̄ chen̄.

²⁶ Sool ale jam chen̄ Jerusalem ten̄ka la, wa jam pii nyin̄ a yaali ayen wa maa pa wa dek a gum Yeezu n̄aan̄viirima po. Alege ba an jam poli ayen wa maa ka Yeezu n̄aan̄viiro. Yɔgsum a yaa jam yik ba. ²⁷ Alege nuru waai ate ba a wi ayen Banabas la yaa maari wa a ta wa jam Yeezu tuimtomdoma jigi. Banabas yaa weeni sak ba Sool ale jam bo siuku po a chen̄ Damasikus ate wa nya Nyɔnɔwa ate wa biisi ale wa dii la. Wa

ɲman weeni sak ba Sool ale jam nyini peelim dii Damasikus tenka po a pa Yeezu yonni nyin a sak nuruba ale kan chali yogsom la. ²⁸ Ba yaa siak ate Sool a maa boro ale ba Jerusalem tenka po a nyini peelim a sak nuruba Nyonowa yonni nyin ale kan chali yogsom. ²⁹ Wa jam a biisi kama ale a nak nampaga ale baai ale ka Juuma a wom Girik demma biika la. Ba yaa jam pii nyin a yaali ayen ba ko wa. ³⁰ Wa Kirisita bisa suaataɲa ale ga seba la, ba yaa ta wa chen Siizariya tenka, a yaa zaani dula jigini a basi wa ate wa a chen Taasus tenka.

³¹ Kirisita bisaɲa ale a tu chaab meena a jam bo Judia tenka meena po la, ale Galili tenka meena po la, ale Samaria tenka meena po la a yaa jam boro ale ka masim. Ba siaka jam ta ka pagrim a kasim jam a chim nna yegayega a gum du ate ba va Nyonowa siuku ale a chali wa. Naawen Chiika abe jam a maari ba kama ate ba jam piisi a gum du.

³² Piita kasim jam nyeemu a chen ka Kirisita bisaɲa ale a tu chaab la jigi, jigi meena. Da yen ate wa yaa chen Lida tenka, ayen wa puusi Naawen Nuruma. ³³ Dula jigini wa yaa nya nuru wanyi ate ba a wi wa ayen Aniiyas la. Wa jam gbarin kama an бага a chen ate wa kasim jam dua tiak po ate ku ga paari bena naanin. ³⁴ Piita yaa wi wa ayen, “Aniiyas”, a weeni wa ayen, “Yeezu Kirisita a basi kama ate fi nya nyinyogsa. Yiri ɲmai a kpamsi fi tiaka.” Aniiyas a yaa deri yiri nna bunyi dekki. ³⁵ Nuru baai meena ale bo Lida ale Saaron tenɲa ale nya wa la, ba me yaa

deri tagri a maa va Nyɔnɔwa.

³⁶ Nipɔk ale jam bo Jopa tɛŋka. Wa maa ka waai ale ta siaka ale Yeezu la. Wa yoi ale Tabita. Ba jam a wi wa ale Giriki demma biika ayen ka Dookas. Ku kiri ale yisik. Wa kasim jam a yaali tuimmanɔsa tomka ale a maari nɔnjagsa me. ³⁷ Va nɔala po nyintuila a yaa yik wa ate wa kpi. Ba ale jam so wa nyinɔka nueri la, ba yaa jam pa wa a ta jueli dueni nɔmazuk dɔk po.

³⁸ Lida tɛŋka abe ale jam poom mɔata Jopa la, nɔanviirima ale wom ale Piita bo Lida la, ba yaa tom nidɔaba baye wa jigi a saalim wa a weeni ayen, “Ti a saalim, nyɛ nwuli a jam dela.” ³⁹ Ba ale ga weeni Piita dila la, wa me a yaa yiri a maa va ba a cheŋ. Wa ale jam la, ba yaa ta wa jueli nɔmazuk dɔkku po. Pukonɔna meena a yaa jam gilim wa a kaari ale a sak Piita garuk tii meena ate Dookas a jam nyɛ ti diipo ate wa jam vua la.

⁴⁰ Piita yaa yiaɔk ate ba meena nyini peelim ale ge a kpi duna tɛŋ a puusi Naawen ale ge a virim Dookas jigi a weeni wa ayen, “Tabita, yiri nɔmai.” Tabita yaa lagi wa ninanɔ. Wa ale ga nya Piita la, wa yaa yiri kali nɔmai. ⁴¹ Piita yaa forisi paari wa a maa maari wa ate wa yiri zaani nɔmai. Piita yaa wi baai ale ta siaka ale Yeezu la, ale pukonɔna a yaa pa wa javuuk a te ba. ⁴² Waai meena Jopa tɛŋka po a jam wom wannɔ de kama ate nuruba yegayega a yaa jam siak a te Nyɔnɔwa. ⁴³ Piita jam goa Jopa kama da bɔari ale nuru wanyi ate ba a wi wa ayen Simon. Wa jam ka gbanzaba.

10

¹ Nuru ale jam bo Siizariya tɛŋka. Wa yoi

jam ale Koniilos. Wa jam ka Aroom sojima ben kanyi kpanṅa po wanyi. Ben kala yoi jam ale, “Italiya benka.” ² Wa jam a yaali ka Naawen siuku wie nna yegayega. Wa ale wa dɔkdemma meena a kasim jam a chali Naawen kama ale a te ṅanjagsa tiirinta nalimnyiini, ale a puusi Naawen daa meena. ³ Da yeṅ ate wenbalini a ta chiem kantueṅ ban buta la, ate ku yaa nye wa jigi nna ase wa goa daasim kama la, ate wa yaa nya Naawen sabiilo chak nalimnyiini. Sabiilowa yaa weeni wa ayen, “Koniilos.”

⁴ Ate Koniilos a yaa nya sabiilowa ale yɔgsum a yaa bek Sabiilowa ayen, “Mi a saalim ka boa M Nyɔɔ?”

Sabiilowa a yaa weeni wa ayen, “Fi puusaṅa ale fi tiirintaṅa ate fi a te ṅanjagsaṅa la, a basi kama ate Naawen ta fu wari. ⁵ Yɔgyɔgla de, be tom nidɔaba ate ba cheṅ Jopa a ga ta nuru wanyi ate ba a wi ayen Simon Piita a ta wa jam. ⁶ Wa a goa ale ka gbanzaba wanyi ate ba a wi ayen Simon. Wa yenni za ka nyakpeemu noai.”

⁷ Sabiilowa ale ga biisi ale wa a nueri ale cheṅ la, Koniilos a yaa wi wa tomteeroma po baye ale soji wanyi waai ale kasim jam a yaali Naawen siuku wie me la. Wa jam ka waai ale kasim jam mɔata wa nalimnyiini a tom a te wa la. ⁸ Koniilos yaa weeni dii meena ale nye la a sak ba ale ge a tom ba ayen ba cheṅ Jopa.

⁹ Vari ale ga veenti ate ba bo siuku po a cheṅ a yaa jam boro a mɔata teṅ kaai ate ba a cheṅ la, Piita yaa jam jueli gboṅ zuk kantueṅ sunsuṅ ayen wa puusi Naawen. ¹⁰ Kom a yaa jam yik wa ate wa yaa jam a yaali ṅandiinta ayen wa

de. Ba ale jam diem boro a dik n̄andiint̄a la, ku yaa nyɛ wa jigi nna ase wa goa daasim la, ¹¹ ate wa nya ale wen̄mazuk a lagri ate jaab ase gatta kpien̄ la ate jaab a yik ka noa bunaansiwa meena a yaa sin̄ cheena t̄en̄. ¹² Goadun̄sa meena kanyikanyi ale n̄anta baai meena ale a chen̄ ba loga nyin̄sa la wanyiwanyi, ale nuinsa meena bunyibunyi ale jam bo ka po. ¹³ Lueluk a yaa weeni Piita ayen, “Piita, yiri n̄mai, ko jaab buui dek ate fi a yaali la a de.”

¹⁴ Alege Piita yaa tulisi ayen, “Aawo, m Nyɔnɔ, dii nyin̄ la, mi an diem maa de jaab buui ale ka tama kisuk jaab la.”

¹⁵ Lueluku a n̄man pilim jam wa jigi a nyɛ buye a weeni wa ayen, “Naawen ale weeni jaab buui ayen wa ka jawelen̄ la, ku a fe kama ayen fi kan weeni ayen jaab wala ka fi kisuk jaabɔa.”

¹⁶ Nyaku de a jam nyɛ ka buta ale ge ate gatiaka a yaa n̄man yiri jueli wen̄mazuk.

¹⁷ Piita ale jam boro a poli wann̄i de kiri ale ka dii la, nuru baai ate Koniilos a jam tom ba la a yaa bek Simon Yenni jigi a jam za tuoku noai ¹⁸ a yaa wi a bek ayen, “Simon waai ate ba a wi ayen Piita me la bo dela?”

¹⁹ Piita a jam diem boro a poli ka wann̄i kiri ale ka dii la ate Naawen Chiika a yaa weeni wa ayen, “Wom de, nidoaba bata ale bo dela jigini a gisi fu. ²⁰ Yiri sin̄ t̄en̄ a va ba a chen̄. Kan basi ate ku daani fu dii nyin̄ la, ka mi ale tom ba fi jigi.”

²¹ Piita a yaa yiri sin̄ ba jigi a weeni ba ayen, “Ka mi ale nuru waai ate ni a gisi la. Ka boa ate ni jam?”

²² Ba yaa tulisi wa ayen, “Ka soji kpagini Koniilos ale tom ti. Wa ka nuru waai ale ka nuru maŋ a chali Naawen nalimnyiini ate Juuma meena a zuli wa nna yegayega la. Naawen sabiilo ale weeni wa ayen wa tom wi fu ayen fi jam ate wa wom dii ate fi ta ayen fi weeni sak wa la.” ²³ Piita yaa wi ba ate ba jo goa yok kula.

Vari ale ga veenti la wa yaa maa va ba a cheŋ. Jopa demma ba gela baai ale ta siaka maara la a jam maa va ba a cheŋ. ²⁴ Da dii ale pa a saŋ la, ba yaa cheŋ paari Siizariya teŋka, juijui ate Koniilos ale wa mabisa ale wa doa baai ate wa jam wi ba ayen ba jam la. Ba meena a jam kala a limsi Piita kama. ²⁵ Piita ale jam paari Koniilos Yenni ayen wa jo la, Koniilos a yaa ale ga nya wa la, wa yaa kpi duna teŋ Piita niŋ, a puusi wa. ²⁶ Alege Piita yaa zak wa a zaani a weeni wa ayen, “Yiri ŋmai, dii nyiŋ la, mi me ka nurubiik ase fi la.” ²⁷ Ba jam a biisi kama ale chaab ale ge a jo yenni po. Ba ale ga jo nueri la, Piita yaa nya ale nuruba yegayega a yaa tigi chaab a kala. ²⁸ Piita yaa weeni ba ayen, “Nama dek seba ayen Juuma wensiuku Sinsaŋa a kan basi ate Juu a cheŋ waai ale kan daa Juu la yeri a yaase wa pa wa dek a gum chaab ale ba. Alege Naawen sak mu kama ayen m kan weeni ayen nuru waai karo a welema a yaase wa ta danŋa. ²⁹ Dila nyiŋ fi ale tom a wi mu la, mi an zeriya. Yogyogla, be ka boan nyiŋ ate fi tom wi mu?”

³⁰ Koniilos a yaa tulisi wa ayen, “Ku daa ŋanaansi ale jinla ate wannu de a nyε. Da yeŋ po wenbalini (a magsi chaab ale baŋ buta) ate mi jam boro a puusi Naawen m yenni po. Nuru

a yaa deri jam za mi niŋ. Wa jam jo ka garuk peelita ate ti a nyagsi nna kpelimkpelim. ³¹ Wa yaa weeni mi ayen, ‘Koniilos, Naawen wom fi puusaŋa kama. Wa be teeri fi tiirintaŋa ate fi a te ŋanjaŋsa la kama. ³² Tom nuru ate wa cheŋ Jopa teŋka a ga wi nuru wanyi Simon waai ate ba a wi wa ayen Piita me la. Wa bo ka Simon gbanzabawa yenni. Wa yenni moata ka nyakpeemu noai.’ ³³ Dila nyiŋ ate m tom wi fu nna nwuli ate fi zuli mu a jam. Yogyogla de ti meena abe kala ka Naawen niŋ, ayen ti wom Nyonowa ale weeni fu dii ayen fi weeni a sak ti la.”

³⁴ Piita yaa piilim biik a weeni ayen, “Yogyogla de m seba ayen ku ka wensie ayen Naawen kan lugi nuruba a yaali ba gela ale kan yaali ba gela. ³⁵ Waai a dan a chali wa ale a tom dii ale nala a te wa, nuru wala choa dan poom nyini juijui meena, Naawen a yaali wa kama. ³⁶ Nama seba tuntomiŋ kaai ate Naawen ta cheŋ Izirali demma jigi a mooli sak nuruma wa wamaŋsaŋa la. Wamaŋsaŋa tuntomika ta ka suyogini a va Yeezu Kirisita waai ale ka waai meena Nyonowa jigi a jam. ³⁷⁻³⁸ Nama seba ayen ka Joon Sokateerowa ale de niŋ a jam sak nuruba soka teka wie ale ge ate wannu de a nye. Ni be seba Yeezu Nazaret denowa de waai ale pa wannu de a piilim sak Galili teŋka a ta jam paari Judia teŋka la kama. Nama seba me ayen Naawen ale te wa Chiika ale pagrim nalimnyiini dii la kama. Ni seba me wa ale jam nyeemu a tom wamaŋsaŋa tuimaŋa ale a tebi waai meena ate Sitaana ta ba la, dii nyiŋ la, Naawen jam boro ale wa kama.

³⁹ Mi ale m vaanchaama abe nya wienja de meena ate wa nye Juuma tenka ale Jerusalem dek ate ti weeni a sak ni. Nuruba ale yik wa a kpi jabarim nyinj a ko wa. ⁴⁰⁻⁴¹ Alege ku daa njata dai ate Naawen nak wa yiri kum po a yaa basi ate wa pa wa dek a sak tama baai nyiini ate Naawen a poom lueri ti ayen ti weeni dii ate tama nya la a sak nuruba chaab. Naawen an basi ate wa pa wa dek a sak waai meena, alege ka tama nyiini ate ti de njandiinta ale nyu ale wa diipo ate wa yiri kum po nueri la. ⁴² Wa yaa weeni ti ale nin muna ayen ti pa Naawen wamanjanja a sak nuruba abe ti weeni a sak ba ayen wa ka waai ate Naawen lueri wa ayen wa bo buusa a te kpeebe ale njanvuuta la. ⁴³ Naawen biisiteeroma meena a biisi wa wari kama a weeni ayen waai a dan ta siak ale wa, kula nyonowa le va wa yonni pagrim nyinj a nya wa wabaatanja vonjeka.”

⁴⁴ Piita ale diem jam boro a biisi la, Naawen Chiika a yaa sinj jam jo baai meena ale jam a wom wa biika la suniima po. ⁴⁵ Juuma baai ale jam ta siaka a yaa jam maa va Piita a nyini Jopa tenka a jam la, ku yaa jam cha ba ate ba nya ale Naawen te baai ale kan daa Juuma la Naawen Chiika me. ⁴⁶ Dii nyinj la, ba jam wom kama ale ba a biisi be chanja a pak Naawen ale wa ale nye njai meena la.

Piita yaa njman biisi a weeni ayen, ⁴⁷ “Nuruma de me a tuesi Naawen Chiika kama ase tama me ale jam tuesi dii la. Nuru karo abe le weeni ayen ba kan tuesi soka ale nyiamoa.” ⁴⁸ Wa yaa weeni ayen ba tuesi soka Yeezu Kirisita yonni nyinj. Piita ale ga biisi nueri ayen wa kuli la, ba

yaa saalim wa ayen wa goa ale ba daa maga abe wa kuli.

11

¹ Tuimtomdɔma ale nuruba ba chaama ale ta siaka ate ba bo Judia tɛŋka meena po la, a yaa jam wom ayen nuru baai ale kan daa Juuba la me a siak a te Naawen Wannɩ kama. ² Piita ale ŋman pilim cheŋ Jerusalem tɛŋka la, Juu baai ale a yaali ayen baai ale kan da Juuba la a gebi ba yuaŋa abe ba gum ba po la a yaa jam a tɔariŋ wa a weeni ayen, ³ “Ka boa ale soa ate fi cheŋ nuru baai ale kan daa Juuba la jigi a de ŋandiinta ale ba?” ⁴ Piita yaa piilim a tɔgi dii meena ale nyɛ la ayen,

⁵ “Mi ale jam boro a puusi Naawen Jopa tɛŋka po la, ku yaa nyɛ mi jigi nna ase goadaasima la, ate mi yaa nya jaab nna ase gatta kpierɩ la ate jaab a yaa yik ka noa bunaansiwa meena a yaa siŋ cheena tɛŋ a jam zaani a mɔata mi. ⁶ Mi yaa ŋmasi nya jaamu po nalimnyiini a yaa nya ale yeri duŋsa ale goaduŋsa ale ŋanta baai meena ale a cheŋ ba loga nyiŋsa, ale nuinsa. ⁷ Mi yaa wom ale lueluk a weeni mi ayen, ‘Piita, yiri ŋmai. Ko a de.’ ⁸ Mi yaa tulisi ayen, ‘M Nyɔŋɔ, aawo, dii nyiŋ la, ba ale biam mi la, mi an diem maa de jaab buui ale ka tama kisuk jaab la.’ ⁹ Alege lueluku a nyini wenŋmazuk a ŋman weeni mi a nyɛ buye ayen, ‘Naawen ale weeni jaab buui ayen wa ka jawelerɩ la, ku a fe kama ayen fi kan weeni ayen jaab wala ka fi kisuk jaabɔa.’ ¹⁰ Nyaku de a jam nyɛ ka buta ale ge ate gatiaka a yaa ŋman yiri jueli wenŋmazuk. ¹¹ Diipo ate

jaamu a yiri a juei la, nidoaba bata a yaa deri nyini Siizariya tenka a jam yeri dii po ate mi jam boro la a weeni mu ayen ba nyonowa ale bo Siizariya la ale tom ba mi jigi. ¹² Naawen Chiika a yaa weeni mi ayen m yiri a chen abe m kan basi ate ku daani mu. M suaatana bayuebiwa de abe maa va ka mi a nyini Jopa a jam ate ti meena a yaa jo Koniilos yenni po. ¹³ Wa yaa weeni a sak ti wa ale nya Naawen Sabiilo wa yenni po ate wa weeni wa ayen, "Tom nuru ate wa chen Jopa tenka a ga wi nuru wanyi ate ba a wi Simon waai ate ba a wi ayen Piita me la. ¹⁴ Wa ale biisi wie ale fu ate fi ale fi dokdemma meena a dan ta siaka ale na, ni le nya varibasika." ¹⁵ Mi Piita ale jam piilim boro a biisi ale ba la, Naawen Chiika a deri sin jam ba suniima po ase wa ale pilim jam tama jigi dii la. ¹⁶ Ate mi yaa teeri Nyonowa ale jam weeni dii la ayen, "Joon Sokateerowa a pa ka nyiam a te ni soka alege yogyogla de mi a le te ni soka kama ale Naawen Chiika." ¹⁷ Naawen abe jam pa ka tiirim bula a te ba ase wa ale jam pa bula degadega a te tama diipo ate tama a jam siak a te Nyonowa Yeezu Kirisita la. Naawen abe dan nye dila, mi ka wana ate mi baga a weeni Naawen ayen wa kan nye dila?"

¹⁸ Ba ale ga wom nna la, ba yaa basi ba nampaga nakka ale ge a te Naawen pimpauk a weeni ayen, "Naawen a be poom te baai me ale kan daa Juuma la siuk kama ayen ba basi ba tuimbaatana tomka ate ba nya nyuvuri paalik."

¹⁹ Diipo ate ba jam ko Sitiven ate ninam a jam jam baai ale ta siaka la jigi la ba jam chali waan ka chaab. Dila powa, ba gela a jam chali chen

Fonisia ale Saipurus ale Antiok tɛnsaŋa a yaa nyiem a sak Juuma nyiini Naawen wamaŋsaŋa.

²⁰ Ba gela me a jam ka nidoaba a nyini Saipurus ale Sairini tɛnsaŋa a cheŋ Antiok tɛŋka. Ba ale ga paari dula la, ba yaa sak baai ale kan daa Juuba la me. Ba jam sak ba ka Naawen wamaŋsaŋa a magsi chaab ale Nyɔŋɔwa Yeezu.

²¹ Nyɔŋɔwa pagrimu a jam bo ale ba kama ate nuru boari nna yegayega a jam ta siaka ale sinsaŋa a yaa tagri ba dek a va Nyɔŋɔwa.

²² Kirisita bisaŋa ale a tu chaab a bo Jerusalem tɛŋka a yaa ale ga wom nna la, ba yaa tom Banabas ayen wa cheŋ Antiok tɛŋka a ga nya.

²³⁻²⁴ Banabas a jam ka nuru maŋ a ta siaka nalimnyiini. Naawen Chiika me abe jam sueri wa sunummu kama nalimnyiini. Banabas ale ga paari Antiok a nya ale Naawen a niak ba dii la ku yaa te wa supeentik ate wa yaa deŋsi ba kpa a weeni ba ayen, ba pii nyin a ta siaka ale ba suniima meena ale Nyɔŋɔwa. Nuruba yegayega a yaa kasim jam ta siaka ale Nyɔŋɔwa a gum mbala po.

²⁵ Banabas a yaa cheŋ Taasus tɛŋka ayen wa gisi Sool. ²⁶ Wa ale ga nya wa la, wa yaa yik wa a ta cheŋ Antiok. Ba noai bayewa a jam bo ka dula ale Kirisita bisaŋa ale a tu chaab la ate ku ga paari bein. Ba jam a sak ka nuru boari nna yegayega ben dila po. Ku jam ka Antiok tɛŋka de po ate nuruba piilim te baai ale ta siaka ale Yeezu la, yoi ayen Kirisita Bisa.

²⁷ Dila powa, Naawen biisiteeroba ba gela a yaa jam nyini Jerusalem tɛŋka a cheŋ Antiok tɛŋka. ²⁸ Biisiteeroma de wanyi yoi a jam ale

Agabus. Wala a yaa yiri zaani ale Naawen Chiika pagrimu a weeni ayen kom pagrik ale za bu jam tenjuk de meena. Kommu a sum jam jam kama diipo ate Nakpionku Kilodiyus a jam boro la. ²⁹ Naanviirima a yaa jam maa chaab a poli waai meena wanyi wanyi ale baga te ligra dii ate ba pa na a maari ba sua tintila baai me ale ta siaka a bo Judia tenka po la. ³⁰ Ba yaa cheesi ba ligrana a pa na a te Banabas ale Sool ate ba ta na a ga te Kirisita bisana ale a tu chaab la nisomma dula jigini.

12

¹ Dila powa, Naab Ayerod a deri jam piilim kama a basi ate Kirisita bisana ale a tu chaab la ba gela a nya ninam nna yegayega. ² Wa jam basi kama ate ba yik Joon suoku Jeemsi a pa gebi kpien a togri wa. ³ Wa ale ga nya ale wannu de a te Juuma popeantik la, wa yaa nman yik Piita. Ba yik wa a magsi chaab ale ka dii po ate Juuma a ta ba tigi kpeeni dii po ate ba kan nobi boroboruk kuui ale ta dabinta la. ⁴ Ba ale jam yik Piita la, ba deri jam ta wa a ga lik kama, a yaa yaali sojiba pi ale bayuebi ate ba a limsi wa. Wa poori ba ka togatoga bunaansi. Naawa Ayerod jam nye dila a poli kama ayen Juuma Gaambasika Tigini a dan taam abe wa ta wa nyini peelim ate ba bo wa buusa ate waai meena nya. ⁵ Ba yaa ta Piita a ga lik. Wa ale jam bo likka dokku po la, Kirisita bisana ale a tu chaab la a yaa jam puusi Naawen nalimnyiini a te wa.

⁶ Yok kuui ate Ayerod jam a poli ayen vari a dan venti abe wa lagri Piita a ta nyini a te

nuruma la, Piita jam doa ka limsidoma baye sunsun a goa. Ba jam pa ka choarima kpeema a bobu wa. Limsidoma me ale jam za likka dokku noai. ⁷ Nyonowa sabiilo a yaa deri jam za dula ate ku yaa nyagsi nna yegayega likka dokku po, a choa Piita kpinkpaluk a yaa weeni wa ayen, “Nye nwuli, yiri.” Wa ale ga weeni dila la, choarimana yaa deri nyini Piita nisima po a gebi lo. ⁸ Sabiilowa yaa nman weeni ayen, “Pa fi gattana a jo abe fi su fi neunana.” Piita yaa nye dila ate Sabiilowa a nman weeni ayen, “Pa fi kasaaku a jo abe fi jam va mu.” ⁹ Piita yaa va wa nyini likka dokku po a nyini alege ze ayen sabiilowa ale nye dii la a sum ka wensie. Piita jam a poli kama ayen da dii dai wa a goa a daasim kama. ¹⁰ Sabiilowa ale Piita a yaa jam va chaab a chej a jam gaam ninka limsidoma a nman jam gaam baai ale pa san la, a yaa ga paari noa dii ate ba pa kutana a nye ate fi gaam ku abe fi yaa deri a jo tenka po la. Ba ale jam a paari tuok kula la, ku yaa deri lagi ku dek ate ba taam nyini a va chaab a chej siuku po. Ba ale chej maga la, Sabiilowa a yaa deri basi Piita wa dek wa nyini ale ge chej be.

¹¹ Piita yaa deri min dii ale nye wa jigi la ate wa yaa weeni ayen, “Yogyogla de m seba ayen ka Nyonowa ale tom wa sabiilowa ate wa jam vari mu Ayerod nisima po ale Juuma ale jam a poli dii la nisima po a basi.”

¹² Wa ale min nna la, wa yaa chej Mɛeri yenni. Mɛeri a jam ka Jon ma. Jon yoi di choa a jam ale Maak. Piita ale jam a paari Mɛeri yenni la, nuru boari nna yegayega ale jam tu chaab dula a

boro a puusi Naawen. ¹³ Piita ale ga a nak dokku noanni la, pokdoklie wa yue jam ale Aroda, a yaa jam tulisi Piita. ¹⁴ Wa ale ga wom lueluku a yaa minj ayen ka Piita la, ku yaa deri te wa supeentik nna yegayega ate wa an nman poom lagi dokku noanni alege deri chali a ga weeni ayen, "Ka Piita ale jam za peelim."

¹⁵ Ba yaa tulisi wa ayen, "Fi a yesinj kama?" Alege wa nman nmasi weeni ba ayen, "Mi a biisi ka wensie." Ba nman tulisi wa ayen, "Ka wa chiika."

¹⁶ Ba ale jam a biisi dila la, Piita a diem a nak dokku noanni kama. Ba ale lagi nya wa la, ku yaa deri cha ba. ¹⁷ Wa yaa yuk nisa ayen ba goori ale ge yaa weeni a sak ba Nyonowa ale nye dii ate wa nyini likka dokku po a nyini la. Wa yaa weeni ba ayen ba weeni nyaku de a sak Jeemsi ale mbala meena ale ta siaka la. Wa ale biisi nna a ga nueri la, wa deri basi ba ale ge nyini chen jigi yonj.

¹⁸ Vari ale veenti la, ku yaa nye nna naglim sojima sunsunj ate ba a begi chaab jaab buui ale nye Piita la. ¹⁹ Ayerod a yaa weeni ba ayen ba nyiem gisi yik wa a ta jam. Ba jam gisi ka nalimnyiini alege ba an nya wa. Wa yaa wi sojima a bek ba alege a yaa weeni sojiba ba chaab ayen ba ta ba a ga ko.

Ku naannyinj Ayerod yaa basi Judia tenka ale ge chen Siizariya a goa dula maga dega.

²⁰ Ayerod sui ale jam a puuri nna yegayega ale Taaya ale Saidon demma. Da yenj, ba yaa nye noai yenj a chen ayen ba nya wa. Ba jam de ka ninj a nya nuru waai ale jam soa Naawa yenni meena a nya la. Wa yoi ale Balastus. Ba yaa jam nya wa

ayen wa maa maari ba ate ba nya Naawa. Wa yaa siak te ba siuk. Ba yaa jo Naawa jigi a saalim wa ayen wa basi ate masim ale nyemagsika a jam ba sunsunj ate ku basi ate ba nman a nya ba nandiintanja ase wa nyeem ale poom a nye dii la.

²¹ Da yenj ate Ayerod a potim lueri dai a yaa pa wa naam gattanja a jo, a yaa kali wa zukpaglika zuk a piilim biik a biisi ale ba. ²² Nuruma yaa kaari ate ku jueli nna yegayega ayen, “Daa nuru ale a biisi, ka wein.” ²³ Nyonowa sabiilowa a yaa deri fobi wa lonsi dii nyinj la, wa an zuli Naawen ya. Nanzue ale jam de wa ate wa yaa kpi.

²⁴ Nyanja de meena ale jam a nye la, Naawen wamanjana a kasim jam tagli ka jigi meena ate nuruba jam piisi a gum du.

²⁵ Banabas ale Sool a yaa jam tom ba tuimaja a nueri kama Jerusalem tenka po ale pilim nman Antiok. Ba jam ta ka Joon waai ate ba maara wi wa ayen Maak la a jam.

13

¹ Kirisita bisanja ale a tu chaab Antiok tenka po la, a jam ta ka Naawen biisiteeroba ba gela ale sagroba ba gela ba po. Ba yue jam ale Banabas ale Simon (waai me ate ba jam a wi ayen Asoblik la) ale Lusiyas Sairini denowa, ale Manayen (waai ale jam bo ale Naawa Ayerod waai ale jam ka Galili naab la) ale Sool. ² Da yenj ate ba yaa boro a puusi Naawen a bobi ba noa, ate Naawen Chiika a yaa weeni ba ayen, “Ni poori Banabas ale Sool a te mu ate ba tom tuim dii ate mi wi ba ayen ba tom la.”

³ Ba yaa maa chaab a bobi noa a puusi Naawen a pa ba nisima a vi ba zuk ale ge a yaa tom ba ayen ba a chen.

⁴ Dila nyin, Naawen Chiika a yaa tom Banabas ale Sool ate ba chen Seliusiya tenka a yaa zaani dula a jueli naarun a chen Saipurus tenka ⁵ a yaa ga sin chen Salamisi tenka. Ba jam chen ga jo Juuma tuka diinana po a sak ba Naawen wanni. Jon Maak ale jam maa boro ale ba a maari ba ale ba tuimana.

⁶ Ba yaa nman jam basi dula jigini ale chen Pafos tenka. Ten kala po ba yaa jam nya sampoporik. Wa yoi ale Baayeezu. Wa jam ka Juu. Wa jam a paasi ka nuruba ayen wa ka Naawen biisiteero. ⁷ Wa jam boro ale ka tenka kpagini ate ba a wi wa ayen Saajus Poolus la. Poolus jam tagri ka Aroom kpanna zuk a nya Saipurus tenka. Wa jam ka yam nyono nna yegayega. Wa yaa wi Banabas ale Sool ayen ba jam weeni Naawen wanni a sak wa. ⁸ Alege sampoporika Elimas (wa yoi di choa a jam ale la ale Giriki tenka biika) a kasim jam a zeri ba kama ayen Gominawa kan nya siuk a ta siaka ale Naawen wamansa. ⁹ Naawen Chiika yaa sueri Sool (waai yoi di choa ale Pool la.) ate wa yaa nya sampoporika nimbie po nna zii ¹⁰ a weeni ayen, "Fi ka Velinvendika biik. Fi ka wamansa meena dachiak. Fi kasim sueri ale pimpaasima ale gaasa meena ate fi kasim pii nyin a nye ayen Nyonowa wensien wien a chim venta. ¹¹ Yogyogla de, nya de, Nyonowa nisimana a sin fi zuk kama. Fi le yi ate ku beni maga dega."

Pool ale ga biisi dila a nueri la, ku yaa nye Elimas nina po nna ase legi la, ate wa yaa chen a gilim a gisi ayen wa nya nuru ate wa yik wa nisima a ta wa a kuli. ¹² Gominawa ale ga nya dila la, wa yaa ta siaka yɔgla. Ku jam cha wa ka nna yegayega ate wa wom sinsanɔa de chaab a magsi chaab ale Nyɔnɔwa.

¹³ Pool ale wa vaanchaama a yaa nyini Pafos a jueli ɔaarun a chen Periga tenka kaai ale bo Pamfiliya tenka po la. Alege Joɔn Maak a jam pa ba a basi ka Pamfiliya ale ge pilim nmani Jerusalem. ¹⁴ Ba yaa basi Periga tenka ale ge chen Antiok tenka kaai ale bo Pisidiya tenka po la. Juuma Vuusum Danni ale jam paari la, Pool ale Banabas yaa jo ba tuka diinaɔa po a kala. ¹⁵ Nuru wanyi ale ga karim ba Moosis Sinsanɔa gbansanɔa po wienɔa ɔa gela ale Naawen biisiteeroma ale nmarisi dii Naawen Gbanɔa po a nueri la, ba tuka diinaɔa kpanɔa a yaa tom tuntominɔ Pool ale Banabas jigi a weeni ba ayen, “Ti suaata, ti a yaali kama ayen ni dan ta wari ayen ni weeni a densi ti kpa ni be weeni a sak ti.” ¹⁶ Pool yaa yiri zaani a zak wa nisima a puusi ba a yaa piilim biik ayen,

“Izirali demma ale baai ale kan daa Izirali demma alege a chali Naawen la, nama meena lagi tue a wom dii ate m tara ayen m weeni a sak ni la. ¹⁷ Tama Izirali demma de Naawenni ale lueri ti kokpiensanɔa. Dii po ate ba jam chim nicham Ejipiti tenka po la, Naawen jam basi ba kama ate ba chim nuru kpeenta. Naawen jam pa ka wa pagrimu a nye ate ba nyini Ejipiti tenka po a nyini. ¹⁸ Wa kasim jam dun wa sui sagini po ale

ba kama ate ku ga paari bena pisinaansi. ¹⁹ Wa jam kaasi ka Keenan saten̄sa siyopoi ale ge a yaa basi ate wa dek nuruma a soa ten̄ sila. ²⁰ Nyāna de meena abe pa paari ka bena kobsinaansi ale pisinu ate Naawen a yaa jam te ba kpaaga ayen ba a nya ten̄sana zuk.

“Ba jam a nya si zuk ka dila ate ku ga paari dii po ate Naawen biisiteerɔ waai ate ba a wi ayen Samuel la a ga jam. ²¹ Izirali demma ale ga juisi ayen Naawen te ba naab la, Naawen yaa pa a nuru waai ate ba a wi ayen Sool la ayen wa chim ba naab ate ku ga paari bena pisinaansi. Sool jam ka kisi biik. Kisi jam nyini ka Benjamin buuni po. ²² Ku nyānyin̄ Naawen yeeri wa ale ge zak Deevide a zaani ayen wa chim ba naab. Naawen ale biisi dii a magsi chaab ale Deevide la ale nna ayen, ‘Mi nya kama ale ka Jese biika Deevide ale chim nuru waai ate mi sunummu a bo ale wa la. Wa ka nuru waai a le wa tom dii ate mi a yaali la nalimnyiini.’ ”

²³ Pool yaa n̄man biisi a chen̄ a weeni ayen, “Ase Naawen ale jam puulim dii a magsi chaab ale varibasidɔwa la, ku jam ka Deevide wa de nyānbiika Yeezu ate Naawen a pa wa ayen wa chim Izirali demma varibasidɔ. ²⁴ Joon ale lin̄ jam de nin̄ a sak Izirali demma meena ayen ba tagri a basi ba wabaatana tomka abe ba tuesi soka ale ge ate Yeezu a yaa jam piilim wa tuimana. ²⁵ Joon ale jam moata wa me tuimana tom kpeglimka la, wa yaa bek nuruma ayen, ‘Nama dek a ta a poli ayen mi ka wana? Mi daa nuru waai ate ni a limsi la. Aawo, ni be nya wa bo ka mi nyān a cheena. Mi posima kama ale m

nin chim yomo waai le wa domsi a kali wa nin a yeeri wa nuensana a te wa la.' "

²⁶ Pool yaa nman biisi a chen ayen, "M suaata, Abraham njanbisa, ale nama baai ale kan daa Izirali demma a chali Naawen la, ka tama meena jigi ale varibasidowa tuntominj ka de a jam.

²⁷ Boan nyinj, nuru baai ale bo Jerusalem tenka ale ba nindeeroma la, a jam ze ayen Yeezu ka varibasidowa. Ba be an jam minj Naawen biisiteeroma wienja Naawen Gbanjka po ate ba jam a karim Vuusum Daanja meena la a chak ya. Dila nyinj la, ba nindeeroma yaa bo buusa mini wa ayen ba ko wa. Ba ale nye dila la, ba jam ze ayen ba poom a nye dila a magsi chaab ale ka biisiteeroma ale poom weeni dii la ate ku chim wensie. ²⁸ Ba an jam poom бага a nya wa dii

ate wa kaasi a magsi ba ko wa la, alege ba diem jam saalim Gominawa Paalot kama ayen wa basi ate wa nuruma ko wa. Wa yaa siak ate ba ko wa. ²⁹ Ba ale ga nye wa wienja de meena a magsi

chaab ale dii ale nmarisi Naawen gbanjka a nueri la, nuruba yaa yeeri wa jabarimu nyinj a ta sinj tenj a ta wa a ga dueni puñ vorub po. ³⁰ Alege

Naawen a nak wa kama a nyini kpilima po a yiri ³¹ ate wa yaa jam pa wa deka a sak baai ale jam va

ale wa a nyini Galili tenka a chen Jerusalem la. Wa jam pa wa deka a sak ba dila ate ku paari ka daa dii choa. Bala abe ale nya nyanja de la ale soa

ate ba weeni a sak Izirali demma. ³²⁻³³ Tama abe bo dela ayen ka ti sak ni Naawen wamansana ayen Naawen ale puulim dii ale ti kokpiensana la, wa a nye kama. Yogyogla de, tama baai abe ale ka ba njanbisa la, wa be nye a te ti kama,

boan nyaŋa, wa zak Yeezu a zaani kama, ase ba ale ŋmarisi yi dii ale saa buyewa Yiila Gbanƙa po la ayen,

'Fi ka m biik,

Jinla m sum chim ka fi ko.'

³⁴ Naawen abe ale weeni dii a magsi chaab ale wa ayen wa le nak wa a yiri kum po ate wa kan puak vorumu po la ale nna ayen,

'Niak kaai ale welema ate m puulim

ale Deevide ate ku a fe ayen ku nye la, m le pa a te fu.'

³⁵ Ase Deevide ale weeni jigi di choa Naawen Gbanƙa po dii ayen,

'Fi Naawen kan basi ate fi nuru welenƙa a puak vorumu po.' "

³⁶ Pool yaa ŋman biisi a cheŋ a weeni ayen, "Dii po ate Deevide a vua la wa tom tuim ŋaai ate Naawen a yaali la kama ale ge a kpi ate ba gu wa ale wa kokpiensanƙa ate wa puak. ³⁷ Alege waai ate Naawen a nak wa a yiri kum po la an puak vorumu po. ³⁸⁻³⁹ Ni meena, m suaata, ku a fe kama ayen ni seba a chak ayen wa dii ate mi mooli a sak ni la ale wabaata vonj teka. Wabaata vonj teka de abe va ka Yeezu jigi a jam. Ku be a fe kama me ayen ni seba ayen waai ale ta siaka ale wa la, a nyini wa wabaatanƙa po a nyini kama, wabaata tii ate Moosis Sinsanƙa an jam baga a vari ni ni wabaatanƙa po a basi la. ⁴⁰ Dila nyaŋ la, ni kpesi seba ate Naawen biisiteeroma ale biisi dii la, a kan nye ni jigiya. ⁴¹ Ba ale weeni dii la ale nna.

'Ni wom de, nama baai ale a le Naawen ale biisi dii la,

ku le cha ni ate ni chen be a yaa kpi.

Boan nyiŋa, mi ale a nye dii jinla la,
 ka wa dii ate nuru a dan poom tɔgi di kiri a
 sak ni,
 ni kan diem a ta siaka la.' "

⁴² Pɔɔl ale Banabas ale ga sak nueri a nyini tuka dɔkku po a nyini la, nuruma yaa weeni ba ayen ba ŋman pilim jam ŋaanyin Vuusum Danni a ŋman sak ba wienja de gum du.

⁴³ Nuruma ale ga basi tuka dɔkku la, Juuma yegayega ale baai ale kan daa Juuba a maa chim Juuma wensiuku vaaroba la, yaa maa chaab a va ka Pɔɔl ale Banabas. Tuimtomdoma a yaa biisi a denji ba kpa ayen ba kasim boro ale Naawen niaka.

⁴⁴ Juuma Vuusum Danni ale ŋman jam paari la, waai meena ale bo ba tenka po la, a yaa jam ayen ba wom Nyɔnɔwa wanni. ⁴⁵ Juuma ale ga nya ale nuruma piisi a soa dii la, ba suniimaŋa yaa deri sueri ale nyuri ate ba yaa a weeni ayen Pɔɔl ale a biisi dii la ka venta. Ba yaa jam a le wa me. ⁴⁶ Alege Pɔɔl ale Banabas a yaa nyini peelim a biisi ale kan chali yɔgsum a weeni ayen, "Ku a fe kama ayen nama Juuma a lin wom Naawen wanni. Alege ni zeri di kama ale a poli, ayen ku an poom magsi ni nya nyuvuri dii ale kan ta kpeglimka la. Tama abe le basi ni abe ti chen baai ale kan daa Juuba la jigi. ⁴⁷ Dii nyin la, Nyɔnɔwa ale weeni ti dii la ale nna ayen,

'M gomsɔni a magsi kama ayen ni sak baai ale kan daa Juuba la wensienja ase nuru waai ale ta bolim a jam legi po la.

Ayen m ta varibasika a jam nuru meena jigi tenjuk de meena.' "

⁴⁸ Baai ale kan daa Juuba ale wom nna la, ku yaa te ba supeentik ate ba a te Nyonowa pimpauk wa wamanšana nyin. Nuru baai ate Naawen lueri ba ayen ba nya nyuvuri dii ale kan ta kpeglimka la a yaa ta siaka ale Pool ale Banabas ale sak ba dii la.

⁴⁹ Ate Nyonowa wannu a yaa tagli ten kala meena. ⁵⁰ Alege Juuma a yaa paasi nipok baai ale kasim jam a yaali wensiuku vaka wie ate nuruba a te ba zula nna yegayega me la, ale kpage kpeemaņa ale a nya tenka zuk la ayen ba basi ate Pool ale Banabas nya ninam. Ba yaa yia ba ate ba nyini ba tenka po a nyini. ⁵¹ Pool ale Banabas yaa kpaanti ba nanšana tantana a basi ba tenka po ayen ku sak ayen ba a kaam ba kama. Ba nye dila ale ge a yaa chen Ikoonium tenka. ⁵² Supeentik ale Naawen Chiika a yaa jam sueri Yeezu njanviirima nalimnyiini Antiok tenka po.

14

¹ Pool ale Banabas ale jam paari Ikoonium tenka la, ba yaa nman jo Juuma tuka diinana po a biisi nalimnyiini ate nuruba yegayega, Juuma ale baai ale kan daa Juuba la yaa jam ta siaka ale ba sinsanņa. ² Alege Juuma baai ale jam a zeri ayen ba kan ta siaka ale Yeezu la a yaa jam a choa baai ale kan daa Juuba la, noa a weeni ayen Kirisita bisana daa nuru manša. ³ Tuimtomdoma a jam goa dula beni ka nalimnyiini a yaa nyini peelim a sak Nyonowa

wie kan chali yɔgsum. Nyɔnɔwa abe jam te ba ka pagrim ate ba baga a nye wakperikaliisa ayen ku sak ayen ba sinsan̄a a magsi chaab ale ka wa ale a yaali ba wa niaka nyin̄ dii la. ⁴ Tɛnka po demma a yaa jam poori ka chaab buye, ba bunyi a va Juuma, ba bunyi me a va tuimtomdɔma.

⁵ Juuma ale baai ale kan daa Juuba la ba gela ale ba kpan̄a a yaa maa chaab a nye noai yɛn̄ ayen ba nye ate tuimtomdɔma nam abe ba yuk ba ale tintana a ko. ⁶ Tuimtomdɔma ale ga wom la, ba yaa chali chɛn̄ Lisitira ale Daabe ale tɛn̄ fi sii meena ale bo si po la. Lisitira ale Daabe abe jam bo ka Likaaniya tɛnka. ⁷ Jigi n̄ala meena ate ba chali chɛn̄ la, ba jam sak Naawen waman̄san̄a kama.

⁸ Nuru ale jam bo Lisitira tɛnka po a chim gbaruk a nyini wa biam po. Ba ale biak wa wa an ma chɛn̄ nyaya. ⁹ Wa yaa jam kala a wom Pɔɔl ale a biisi dii la. Pɔɔl a yaa nya wa nna zii, a yaa min̄ ayen nuruwa ta siaka kama a magsi wa nya nyinyɔgsa. ¹⁰ Pɔɔl yaa weeni wa ate ku jueli ayen, “Yiri zaani fi nan̄san̄a zuk.” Nuruwa yaa yok jueli wein a jam zi a yaa deri chɛn̄ a gilim. ¹¹ Nuru bɔanni ale nya dii ate Pɔɔl nye la, ba yaa deri a na ate ku a jueli wein a weeni ale Likaaniya biika ayen, “Yɔgyɔgla de, boglutana a yaa labri chim ka nuruba a sin̄ jam tama jigi.” ¹² Ba yaa te Banabas yonni magsi chaab ale ba bogluku ayen Zeeyus. Ba jam te Pɔɔl me yue magsi chaab ale ba bogluk kpien̄ku ayen Yemas dii la wa jam ale biisirowa. ¹³ Waai ale a kaab Zeeyus la a yaa ta lalisa ale tiisa puuta a ta jam kaabka yenni dɔkku nɔanni ayen wa ale nuru

boanni a nye kaabka a te tuimtomdoma, kaabka yenni de a za ka juijui ale kan bo tenka po la.

¹⁴ Pool ale Banabas ale wom ba ale a yaali ayen ba nye dii la, ba yaa yik ba gattaŋa a cheeri ayen ku sak ba ayen ba ale nye dii la ka wabiok. Ba noa bayewa yaa a chali jo nuru boanni sunsun a deri piilim a na ate ku a jueli a weeni ayen,
¹⁵ “Nidoba, ka boa ate ni a nye dila? Tama dek ka nurubisa ase nama me la. Tama bo dela kama ayen ti mooli Naawen wamaŋsaŋa a sak ni ate ni tagri a basi ŋankayaataŋa de chaab abe ni va Naawen dii ale vua a nye wenzuk ale ten ale nyaataŋa ale ŋanta baai meena ale bo ba po la. ¹⁶ Dila po dila powa, Naawen jam basi kama ate waai meena a va ba dek ale a yaali siuk kuui la. ¹⁷ Alege wa va ka wie nna yegayega nyin a nye ayen ku sak nuruba ayen wa vua kama. Wienja de ale wa a te ni nyiam ate bu nyini wenzuk a jam diipo ale magsi la, wa a basi ate ni ŋanborintaŋa a nye a niak diipo meena ale magsi la, wa a te ni ŋandiinta ate ni de a chak, ale a basi ate ni suniimaŋa a sueri ale supeentik.” ¹⁸ Tuimtomdoma ale jam poom a biisi wienja de meena la, ba jam nam ka nna yegayega ate nuruma a basi kaab kaai ate ba jam ayen ba kaab a te ba la.

¹⁹ Juuma ba gela ale jam nyini Antiok ate ka bo Pisidiya ale Ikoonium tenŋaŋa la a jam. Bala ale jam nye ate nuru boanni a va ba Juuma ale a yaali dii la. Ba yaa yik Pool a pa tintana a yuk wa a vuuri a ta nyini tenka po a nyini. Ba ale jam nye wa dila la ba jam a poli ayen wa kpi kama. ²⁰ Alege Yeezu ŋaanviirima ale jam gilim

wa. Dila nyaanyiŋ ate wa yaa yiri a nman ga jo tenka po. Vari ale veenti la, wa ale Banabas a yaa cheŋ Daabe tenka.

²¹ Dula jigini, Pool ale Banabas a jam sak Naawen wamaŋsaŋa a nya nyaanyiiriba ka nna yegayega. Ba yaa pilim nmani Lisitira ale Ikoonium, a zaani dula a cheŋ Antiok ate ka bo Pisidiya po la. ²² Jigaŋa de meena, ba kasim jam a denŋi ka nyaanyiirima kpa, a weeni ba ayen ba kasim ta siaka ale Yeezu. Ba jam maa sak ba ayen, “Ku a fe kama ayen ti nya ninam yegayega abe ti ge jo Naawen Naamu po.” ²³ Pool ale Banabas ale Kirisita bisaŋa ale a tu chaab la a yaa maa chaab a bobi noa a puusi Naawen a yaa lueri kpaŋa a ta nyini Kirisita bisaŋa ale a tu chaab toŋa toŋa la po. Pool ale Banabas a yaa pa ba nyo Nyonowa waai ate ba ta siaka ale wa nalimnyiini la nisima po.

²⁴ Ba yaa jam va Pisidiya tenka po a taam cheŋ Pamfiliya tenka. ²⁵ Dula jigini ba jam sak Naawen wamaŋsaŋa Periga me po ale ge a cheŋ Ataliya tenka. ²⁶ Ba yaa zaani dula a jueli naaruŋ a pilim nman Antiok juijui ate Kirisita bisaŋa ale a tu chaab la a liŋ pa ba a nyo Naawen nisima po ayen wa maari ba ate ba baga tom wa tuimaŋa ŋaai ate ba yaa tom nueri nna la.

²⁷ Ba ale jam paari Antiok la, ba yaa tigiŋi Kirisita bisaŋa ale a tu chaab la meena a nyo jigi yeŋ a weeni sak Naawen ale pa ba a tom dii meena la. Ba weeni a sak ba wa ale lagi siuk ate baai ale kan daa Juuba la a maa ta siaka. ²⁸ Pool ale Banabas a jam goa dula jigini kama ale

ḡaḡviirima meena ate ku beni nna yegayega.

15

¹ Nuruba ale jam nyini Judia a jam Antiok teḡka a deri piilim a sak baai ale ta siaka ale Yeezu la sinsaga ayen, “Nuru karo a baga nya varibasika ase ka kula nyḡḡwa a nin gebi wa yoanni ase Moosis Sinsaḡḡa ale a sak dii la.”

² Dila nyiḡ la Pḡḡl ale Banabas a yaa jam ta nampaga nna yegayega ale ba. Baai ale ta siaka la a yaa lueri Pḡḡl ale Banabas ale baai ale ta siaka la gela a bo Antiok la ayen ba cheḡ Jerusalem a ga nya tuimtomḡḡa ale kpaḡḡa wanni de zuk.

³ Kirisita bisaḡḡa ale a tu chaab la a yaa basi ba siuku po ayen ba cheḡ. Ba ale jam va Fonisia ale Samaria teḡsaḡḡa po a cheḡ la, ba yaa va ba Kirisita be chaama ale bo dula la jigi, a yaa weeni sak ba ayen nuru baai ale kan daa Juuba la a tagri va Naawen. Wa paaliḡḡa de ate ba weeni a sak ba la yaa ta masim ale supeentik a jam ba meena jigi. ⁴ Ba ale jam paari Jerusalem la, Kirisita bisaḡḡa ale a tu chaab la ale ba kpaḡḡa ale tuimtomḡḡa a jam maa chaab a nyḡ ba tia kama ate ba weeni a sak ba meena Naawen ale pa ba a tom tuima dii la. ⁵ Ba ale ga weeni nna a nueri la, baai ale ta siaka la gela baai ale ka Farisiima po nuruba la, a yaa yiri zaani ḡmai a weeni ayen, “Ku a fe kama ayen baai ale kan daa Juuba la a gebi ba yuaḡḡa. Ku a fe kama me ayen, ba kaam ba ayen ba a zuli Moosis Sinsaḡḡa ale a weeni dii la.”

⁶ Tuimtomdoma ale kpanṅa a yaa tu chaab ayen ba biisi wannu de. ⁷ Ba ale nak nampaga di nyin ate ku beni la, Piita yaa zaani a biisi ayen, “M suaata, nama deka seba ayen a ta nyini dila po dila po, Naawen ale jam lueri mi a ta nyini nama po a nyini ayen m ga sak baai ale kan daa Juuba la, Naawen wamaṅsaṅa ate ba wom abe ba ta siaka ale ṅa. ⁸ Naawen waai abe ale seba nurubiik meena popola ale ka dii la, a te Naawen Chiika baai ale kan daa Juuba la kama ase wa ale te tama me dii la ayen ku sak ayen wa ta yaalika ale ba kama ase wa ale ta yaalika ale tama me dii la. ⁹ Naawen nyɛ ba jigi kama ase wa ale a nyɛ, tama jigi dii me la. Siuk kula po, wa va ka ba siaka ale wa a yaa sugri ba wabaatana ba suniima po a basi. ¹⁰ Yɔgyɔgla de, ka boa ale soa ate nama a yaali ayen ni pa jib kpeemu de buui ate ti kokpiensaṅa a yaase tama deka an baga ji bu la ayen ṅaanviirima ji? Ni dan a nyɛ nna, ni a nyɛ ka Naawen a nya. ¹¹ Alege tama seba a chak kama ayen tama ale va ti Nyɔnɔwa Yeezu niaka nyin a nya varibasika ase bala me a le nya dii la.”

¹² Ba meena tuka po a kasim jam goori ka nna chorototo, ale a wom Pɔɔl ale Banabas ale jam a weeni Naawen ale pa ba a tom wakperikaliisa ale baai ale kan daa Juuba po dii la. ¹³ Pɔɔl ale Banabas ale ga biisi nueri la, Jeemsi yaa tulisi ayen, “M suaata, ni meena lagi tue a wom mi. ¹⁴ Ni wom Simon Piita ale tɔgi Naawen ale lin nyɛ dii a sak baai ale kan daa Juuba la a yaa piilim lueri ba po ba gela a soa ba la. ¹⁵ Ase Naawen biisiteeroma ale ṅmarisi Naawen Gbanṅka po a

weeni a magsi chaab ale nyaku de la. Ba ηmarisi weeni ayen Nyɔnɔwa a weeni:

¹⁶ ‘Nyaku de ηaanyinj, m le pilim jam a nye ate Deevide yenni ale lo la a ηman zaani.

M le ηman pilim se di juijui ale lo la, abe m nye ate di ηman pagra.

¹⁷ Ate nurubiik meena a jam mi jigi.

Baai meena ale kan daa Juuba ate mi wi ba ayen m nuruba la, bala meena ale jam mi jigi.

¹⁸ Nyɔnɔwa ale weeni nyaŋa de meena a ta nyini dila po dila po.’ ”

¹⁹ Jeemsi yaa ηman biisi a cheŋ a weeni ayen, “Dila nyinj mi a poli kama ayen ti kan a daani baai ale kan daa Juuba a yaa tagri a va Naawen la. ²⁰ Ku magsi ka ti ηmarisi gbaŋ a te ba a weeni ba ayen, ba kan a de bogluta ηandiinta dii nyinj la, ηandiin tila an welema. Ti weeni ba me ayen ba kan bobi nipok baai ale kan daa ba pooba la a goa, abe ba kan a ηobi jaab buui ate ba an togri la lamma abe ba kan a de ziim. ²¹ Baai ale kan daa Juuba la, le deri siak nyaŋa de kama, boan nyinj ba seba kama ayen Juuma baai ale bo juijui meena ale ba la, ba sak Moosis Sinsaŋa de kama ate ku beni yegayega. Ba be wom ale karim ηa kama ba tuka diinaŋa po ba Vuusum Daana meena po.”

²² Tuimtomdoma ale kpaŋa ale Kirisita bisaŋa ale a tu chaab la a yaa maa chaab a poli ayen ku nala kama ate ba lueri nuruba a ta nyini ba po a tom ba ale Pool ale Banabas ate ba cheŋ Antiok. Ba yaa lueri nuruba baye baai ale ta siaka la a te ba zula nalimnyiini la. Nuruba

bayewa ale Judas (waai me ate ba a wi wa ayen Baasabas la) ale Silas. Ba yaa tom ba ayen ba ta gbanƙa a cheɗ. ²³ Ba ale jam ɗmarisi gbanƙa a weeni dii la ale nna ayen,

“Tama ni suaataɗa tuimtomɗoma ale kpaɗɗa a maa chaab a puusi ti suaataɗa baai ale potim kan daa Juuba a nyini biam po ate ba bo Antiok ale Siriya ale Silisiya tenɗaɗa la.

²⁴ “Tama wom ayen nuruba gela ale nyini tama po a jam biisi wie ate ɗa daani ni ale nye ate ni popola kaasi. Ti a weeni a sak ni kama ayen ni nya nuru bala an tuesi sinsaɗɗa tama jigi ayen ba jam biisi dila. ²⁵ Dila nyin ate tama meena a nye tuka a yaa poli ate ti yaa siak a lueri nuru ba gela ayen ba va Pɔɔl ale Banabas ti sua tii ate ti mariɗ la a jam ni jigi. ²⁶ Pɔɔl ale Banabas ka nuru baai ale pa ba nyuwoa a da ti Nyɔnɔwa Yeezu Kirisita nyin la. ²⁷ Dila nyin ate ti yaa tom Judas ale Silas ni jigi. Ba ale poom weeni a sak ni dii meena wuu ate ti ɗmarisi gbanƙa de po la.

²⁸ “Naawen Chiika ale tama a maa chaab a siak kama ayen ti kan pa jib bu choa a ji ni. Ti ta ka wienɗa de nyiini ayen ti weeni a sak ni. Ku a fe kama ayen ni va ɗa. ²⁹ Wienɗa de ale, Ni kan a de bogluta ɗandiinta, ni kan a de ziim, ni kan a ɗobi jaab buui ate ba an togri la lammɔa, ni kan a bobi nipɔk baai ale kan daa ni pooba la a goa. Ku a le nala kama ase ni a le kan a nye wienɗa de.

“Ni boro nalimnyiini.”

³⁰ Ba ale ɗmarisi gbanƙa nna a ga nueri la,

ba yaa tom Pɔɔl ale Banabas ale ba vaanchaama ayen ba ta ka cheŋ Antiok. Ba ale ga paari la, ba yaa tigsɪ baai ale ta siaka la ate ba jam jigi yeŋ a yaa te ba gbaŋka. ³¹ Ba ale ga karim ka a nueri la, gbaŋka wienɔ a yaa ta supeentik a jam ba jigi. ³² Judas ale Silas dek abe jam ka Naawen biisiteeroba. Ba yaa bo ale ba a denɔsi ba kpa ayen ba nya pagrim. ³³ Ba ale ga dalin maga dega la, Antiok demma yaa te Judas ale Silas siuk ale suyɔgini ate ba pilim cheŋ baai ale tom ba la jigi. ³⁴ Alege Silas jam nya kama ayen ku nala kama ate wa wari dula.

³⁵ Alege Pɔɔl ale Banabas a jam wari ka Antiok a gum chaab ale nuruba chaab ate ba maa chaab a yaa sak nuruma Nyɔnɔwa wanni.

³⁶ Ku ale ga beni maga dega la, Pɔɔl a yaa weeni Banabas ayen, “Basi ate ti pilim ŋmani cheŋ jigi ŋaai meena ate ti sak Nyɔnɔwa wanni la a ga nya ase Kirisita bisaŋa a nyɛ ka se.” ³⁷ Banabas a jam a yaali kama ayen Joɔn Maak a maa va ba a cheŋ. ³⁸ Alege Pɔɔl an jam poli ayen ku magsi ayen Joɔn Maak a maa va cheŋ dii nyin la wa an jam maa boro ale ba ate ku ga paari ba tuini kpeglimka. Wa jam zaani ka Pamfiliya tenka a basi ba. ³⁹ Nampaga a yaa deri jam ba sunsuŋ ate ba poori chaab togatoga. Banabas a yaa yik Maak ate ba jueli ŋaarun a cheŋ Saipurur tenka ⁴⁰ ale ge ate Pɔɔl me a lueri Silas ate baai ale ta siaka a yaa pa ba nyo Naawen nisima po ayen wa nya ba zuk ale wa niaka, ⁴¹ ate ba cheŋ Siriya ale Silisiya tenɔsaŋa a ga a denɔsi Kirisita bisaŋa ale a tu chaab la kpa dula a te ba pagrim.

16

¹ Pɔɔl yaa nyini Siriya ale Silisiya tenɔsaŋa a cheŋ Daabe ale Lisitira. Kirisita bisana wanyi ale jam bo Lisitira. Wa yoi jam ale Timoti. Wa mawa jam ka Juu a ta siaka ale Nyɔɔwa. Alege Timoti kowa jam ka Giriki deno. ² Kirisita bisana meena ale jam bo Lisitira ale Ikoonium la, a kasim jam a pak Timoti kama. ³ Pɔɔl a yaa jam a yaali ayen wa maa va a cheŋ. Pɔɔl yaa gebi wa yoanni dii nyin la, Juuma meena ale jam bo dula jigini meena la, a jam seba ayen Timoti kowa ka Giriki deno. ⁴ Ba ale jam va tenɔsaŋa po a taam la, ba jam weeni sinsaŋa meena ŋaai ate tuimtomɔma ale kpanɔa meena Jerusalem tenka a sak baai ale ta siaka la kama. Ba weeni ba me ayen ba chiib a va sinsaŋa. ⁵ Kirisita bisana ale a tu chaab la siaka a yaa ŋmasi pagra a gum du ate ba jam a piisi daa meena a gum du.

⁶ Ba yaa jam cheŋ a va Firijiya ale Galatia tenɔsaŋa dii nyin la, Naawen Chiika an jam te ba siuk ate ba sak Naawen wamaŋsaŋa Asia tenka po. ⁷ Ba ale jam paari Misiya tenbanni la, ba jam poli kama ayen ba cheŋ Bitiniya tenka alege Yeezu jam tom ka Naawen Chiika ayen wa weeni ba ayen ba kan cheŋ. ⁸ Ba yaa va Misiya tenka a taam sin Torowas tenka. ⁹ Ku yaa nye Pɔɔl jigi yokku ase wa goa daasim kama la ate wa nya Masidoniya deno a za wa ten a saalim wa a weeni ayen, "Taam jam Masidoniya dela a maa maari ti." ¹⁰ Wa ale ga nya nna la ase goadaasima la, ti yaa yiri a gomsɔ ayen ti cheŋ Masidoniya a poli weeni ti deka ayen Naawen weeni ti ayen ti cheŋ ka dula a ga sak ba wa wamaŋsaŋa.

¹¹ Ti yaa jueji njaarun a zaani Torowas a gaam taam cheŋ Samotiras. Vari ale veenti la, ti yaa nman cheŋ Niyapolis. ¹² Ti yaa zaani dula a basi njaarun ku ale ge cheŋ Filipai, ka Masidoniya tenŋa po ten kpien la. Aroom demma ale ba kpage ale jam bo tenka de po a nya ba zuk. Ti jam bo ten kala ate ku beni magla. ¹³ Juuma Vuusum Danni ate ti yaa basi tenka po alege cheŋ sin benni noai juijui ate ti jam a poli ayen ti le nya jigi ale Juuma a tigiŋi chaab a boro a nye Naawen puusa la. Ti yaa jam kala a biisi ale nipok baai ale jam tigiŋi chaab a kala dula la. ¹⁴ Ti ale jam boro a biisi la, nipok wanyi ate ba a wi wa ayen Liidiya ale jam a wom dii ate ti jam a biisi la. Wa jam nyini ka Tayatira. Wa jam ta ka garuk sobta a gerim. Wa jam ka waai ale a te Naawen zula nna yegayega la. Dila nyin la, Nyonowa yaa lagri wa popolana ate wa a wom Pool ale jam a weeni dii la. ¹⁵ Wa ale wa dokdemma ale ga tuesi soka a nueri la, wa yaa wi tama a weeni ayen, "Nama a dan sum siak kama ayen mi ta siaka ale Nyonowa, ni be jam mi yenni a goa." Wa jam weeni dila ate ku yik tama kama ate ti va wa a cheŋ.

¹⁶ Da yen ate ti jam a cheŋ juijui ate Juuma a tigiŋi chaab a puusi Naawen la, ate nipokbili wanyi, wa jam ka yomo a yaa tu ti siuku nin. Chichiribaata ale jam ta wa ate wa бага a weeni chum dii po wie. Baai ale jam soa nipokbili yomowa de la, ba basi kama ate wa yaa a porisi a nya ligra nna yegayega a te ba. ¹⁷ Wa yaa jam kaari a wi Pool ale tama a weeni ayen, "Nuruma de ka Naawen kpeeni tomteeroba. Ba

a mooli a sak ni ka ni ale ni nyɛ dii ate ni nya varibasika la.” ¹⁸ Wa jam nyɛ nnala ate ku paari ka daa dii choa ate ku yaa puuri Pɔɔl sui nna yegayega ate dai dila dannɪ Pɔɔl yaa virim a weeni chichiribioku ale bo wa zukku po la ayen, “Yeezu Kirisita yonni nyin ate mi a weeni fu ayen fi nyini wa zuk po a nyini.” Chichiribioku a yaa deri basi wa dula jigini nna nwuli.

¹⁹ Nipɔkbilika nyamma ale ga min ale ba an nman бага a nya ligra la, ba yaa yik Pɔɔl ale Silas a vuuri ba a ta ba cheɲ kpaɲɲa jigi yaba peelimu po. ²⁰ Ba yaa ta ba jam Aroom tenka kpaɲɲa jigi a weeni ba ayen, “Nuruma de ka Juuba. Ba be a daani ka ti tenka demma. ²¹ Ba a sak ka sinsak n̄aai ale kan a va tama Aroom demma sinsaɲɲa la. Ku be a fe kama ayen ti kan nyɛ dii ate ba a weeni ti la.” ²² Nuru boanni a yaa maa gum ba po a yaa tu chaab ale Pɔɔl ale Silas.

Ate kpaɲɲa a yaa yik Pɔɔl ale Silas gattana a dari cheeri ale weeni ayen ba miiri ba. ²³ Ba ale miiri ba nna yegayega la, ba yaa ta ba a ga lik ale ge weeni likka dɔkku limsidɔwa ayen wa n̄masi lik ba nalimnyiini. ²⁴ Limsidɔwa ale ga wom nna la, wa yaa ta ba taam niɲniɲ dɔkku a lik a yaa pa duok kpion ate ba kerɪ vie, ku dobra nna yegayega a pa ba nansana a su du.

²⁵ Alege goota po sunsun ale ga paari la, Pɔɔl ale Silas a yaa jam boro a puusi Naawen ale a yi yiila a pak Naawen. Baai ate ba jam maa yik ba a lik la, a yaa jam a wom Pɔɔl ale Silas ale a nyɛ dii la. ²⁶ Tenka a yaa deri choa nna yegayega ate likka yenni me a choa ate ku an bola beniya ate

diinaŋa noaŋa a deri lagri, ate choroma ŋaai ate ba pa bobi ligrima la a yaa deri gebi me. ²⁷ Likka yenni limsidɔwa a yaa yiri ga a nya ale likka yenni noaŋa a lagriya. Wa yaa yeeri gebi won ayen wa ko wa dek dii nyin la, wa jam a poli kama ayen nuruma a nyini chali be kama. ²⁸ Wa ale jam boro a ayen wa nye dila la, Pɔɔl yaa nya a kaari ate ku jueli nna yegayega a weeni wa ayen, “Kan te fi dek tuem, ti meena bo ka dela.”

²⁹ Limsidɔwa yaa wi ayen ba ta bolim a jam a yaa chali jo yenni po ate yɔgsum yik wa ate wa nyinka yaa a gok nna pampam ate wa yaa lo Pɔɔl ale Silas nin ³⁰ a yaa ta Pɔɔl ale Silas a nyini peelim ate wa yaa weeni ba ayen, “M koba, ku a fe ayen m nye ka se ate m nya varibasika?”

³¹ Ba yaa tulisi wa ayen, “Ta siaka ale Nyɔnɔ Yeezu, ale fi le nya varibasika, fi ale fi dɔkdemma meena.” ³² Ba yaa sak wa ale baai meena ale bo wa yenni po la Nyɔnɔwa wannɩ. ³³ Dila powa degadega yok kula ate nuruwa a yaa yik ba a sugri ba niraŋa ate ba deri te wa ale wa dɔkdemma soka. ³⁴ Wa yaa ta ba jo wa dɔkku a nye ŋandiinta a te ba. Wa dɔkdemma meena sue a yaa jam peenti nna yegayega dii nyin la, ba ta siaka ale Naawen kama.

³⁵ Vari ale ga veenti la, Aroom tenka kpaŋŋa a yaa tom limsidɔba ale tuntomin ka de ayen, “Ni basi ate nuru bala chen.”

³⁶ Limsidɔwa yaa weeni Pɔɔl ayen, “Aroom tenka kpaŋŋa a tom weeni kama ayen m lagi fi ale Silas a basi. Dila nyin yɔgyɔgla de, ni nyini chen ale suyɔgini.”

³⁷ Alege Pɔɔl yaa tulisi ba ayen, “Ba an nya ale ti kaasi wari ya, alege ba nak ti ate waai meena a nya. Tama ka Aroom dem. Ba nak ti a yaa ta ti ga yuk basi likka dɔkku po. Alege yɔgyɔgla de, ate ba yaa a yaali ayen ba basi ti ate nuru kan seba ku noai po? Aawo, dila kan tom! Ku a fe kama ate Aroom kpaŋŋa dek a jam dela jigini a lagi ti a basi.”

³⁸ Limsidɔma a yaa ga weeni ate Aroom tɛŋka kpaŋŋa wom. Ba ale ga wom ayen Pɔɔl ale Silas ka Aroom demma la, yɔgsum yaa yik ba ³⁹ ate ba cheŋ a ga weeni ba ayen ba kaasi ale ge yaa lagi ba ate ba nyini a yaa saalim ba ayen ba basi tɛŋka po. ⁴⁰ Pɔɔl ale Silas a yaa basi likka dɔkku ale ge cheŋ Liidiya yenni. Dula jigini, ba yaa tu chaab ale Kirisita bisinsila a yaa biisi wie a denŋi ba kpa ale ge yaa basi ba ale cheŋ.

17

¹ Pɔɔl ale Silas a yaa ŋman va Amfipolise ale Apoloniya tɛŋsaŋa a taam cheŋ Tesalonika tɛŋka. Juuma tuka yeri dinyi ale jam za Tesalonika po. ² Ase Pɔɔl nyiem ale a nye dii la, wa yaa cheŋ ga jo tuka yenni po. Wa jam bo ka dula ate ku paari Juuma Vuusum Danni ku noa buta a jo ba tuka yenni po a pa Naawen Gbaŋka a biisi a daliŋ ale ba a ³ togi Gbaŋka wienŋa kie a sak ba ayen ku sak ba ayen ku jam a fe kama ayen Kirisitawa waai ate Naawen a weeni ayen wa le tom ate wa jam la a nam ate ba yik wa a ko ale ge ate wa ŋman yiri kum po. Pɔɔl yaa weeni ayen, “Kirisitawa de ate Naawen puulim ayen wa le tom ate wa jam la, ale Yeezu. Be ka wala wie ate

mi ta jam ayen m biisi a sak ni.” ⁴ Juuma ale wom nna la ba gela a yaa sum siak ayen Pool ale a biisi dii la ka wensie a yaa pa ba dek a gum chaab ale Pool ale Silas. Giriki demma me yegayega baai ale a chali Naawen la, ale nipooba ba gela baai ale chim nuru kpeenta la bala meena jam siak kama a maa va Pool ale Silas.

⁵ Alege Juuma a yaa jam a de nyuri ale Pool ale Silas. Juuma yaa yik tenka po nuru baai ale kan a yaali tuima ale a yaali kpaliṅsa a bo tenka po siuk kpeentaṅa niṅsa a nyiem a chen la a nyo jigi yen ate ba yaa maa chaab a nye ate supuurim a jam waai meena jigi tenka po ate ba a nuemu nna yegayega. Nuruma yaa nye dila a chali chen nuru wanyi ate ba a wi ayen Jeemin la yeri po. Ba jam a poli ayen ba a gisi ka Pool ale Silas dila ate ba dan nya ba abe ba yik ba a ta nyini peelim a te nuruma. ⁶ Alege ba ale jam nye dila ale ge ba an nya ba la, ba yaa yik Jeemin dek ale Kirisita bisanṅa gela a vuuri a ta ba jam tenka kpanṅa jigi a yaa a nuemu ate ku a jueli a weeni ayen, “Nuruma de a ta ka daanika a jam jigi meena. Yogyogla de, ba ale nna a jam tama tenka po ⁷ ate Jeemin a yaa basi ate ba bo wa yenni po. Ba meena a kaasi ka Aroom tenka nakpionku Siiza sinsanṅa. Ba a weeni kama ayen nakpionku choa ale boro. Wa yoi ale Yeezu.” ⁸ Tenka po kpanṅa ale nuruma ale wom nna la, ku yaa ta popola togatoga nna yegayega a jam ba jigi. ⁹ Kpanṅa yaa basi ate Jeemin ale mbala a tuni ligi ṅaai ale magsi ba tuni la, abe ba basi ba ate ba yaa chen.

¹⁰ Ten ale jam sobri la, Kirisita bisanṅa a yaa basi ate Pool ale Silas a chen Beria tenka. Ba

ale jam paari dula la, ba yaa ga jo Juuma Tuka Yenni po. ¹¹ Tenka la demma a jam a zunchon Tesalonika demma de ale Naawen wamaɗsaɗa womka kama. Ba kasim jam lagi ba tue meena nalimnyiini kama a wom wamaɗsaɗa. Daa meena ba a karim ale a zamsi Naawen gbanƙa wienƙa kama ayen ba nya ase Pɔɔl ale a biisi dii la ka wensie ya. ¹² Juuma yegayega a jam ta siaka kama ale wamaɗsaɗa. Girik tenka nipooma yegayega baai ale chim nuru kpeenta la ale Giriki demma nidoama a jam maa ta siaka kama. ¹³ Alege Juuma baai ale jam bo Tesalonika ale wom ayen Pɔɔl sak Naawen wannɪ Beria tenka me po la, ba yaa nman jam dula me a yik nuruba a nyo jigi yen a paasi ba ayen ba ta daanika a jamu. ¹⁴ Kuna bula beniya ale ge ate Beria demma Kirisita bisaɗa a basi ate Pɔɔl a cheɗ nya kpeema kunƙonini, alege Silas ale Timoti a yaa wari Beria. ¹⁵ Nuru baai ale jam ta Pɔɔl a cheɗ ayen ba basi la, a jam ta wa a cheɗ paari ka Atens ale ge pilim nmani Beria. Pɔɔl jam te ba ka tuntomin ayen ba weeni Silas ale Timoti ayen ba dan nya siuk yogyogla de ba jam wa jigi.

¹⁶ Pɔɔl ale jam bo Atens tenka a limsi Timoti ale Silas la, wa yaa jam nya ale bogluta a kasim jam sueri tenka de po meena. Nyaku de a yaa jam te wa supuurim nna yegayega. ¹⁷ Daa meena wa kasim jam a daliɗ kama ale Juuma ale baai ale kan daa Juuba ale a chali Naawen la ba tuka yenni po. Daa meena me wa jam maara a daliɗ kama ale nuru baai meena ale bo yaba peelitaɗa po la. ¹⁸ Sagroba ale jam boro.

Ba jam ka togatoga buye. Ba bunyi wa yoi a jam ale Epikuriyos demma. Bunyiwa me yoi a jam ale Sitooyik demma. Epikuriyos demma ale Sitooyikma sagroma me a jam maa nak nampaga kama ale Pɔɔl. Ba gela a jam bek wa ayen, “Nuruwa de a ti an za a nak ka boan jaab gunḡon dila?”

Ba gela me weeni ayen, “Ku a nyɛ ase wa a biisi ka tenḡsa si chaab bogluta wie la.” Ba weeni dila kama dii nyinḡ la, Pɔɔl a yaa biisi a magsi chaab ale ka Yeezu ale kpi ale nman yiri kum po dii la. ¹⁹ Dila nyinḡ la, ba yaa weeni Pɔɔl ayen wa jam sagroma kpanḡa tuka jigini ate ba a wi ayen Ariyapagus la a jam siak wiik. Wa yaa siak a jam ate ba yaa bek wa ayen, “Pɔɔl, tama a yaali kama ayen fi weeni a sak ti sinsak paali nḡai ate fi a sak la kiri. ²⁰ Ti ale wom ale wie nḡai ate fi a weeni la gela ka wachansa ti tue po la ate ti a yaali ayen fi weeni nḡa kiri a sak ti.” ²¹ Ba jam bek Pɔɔl nna kama dii nyinḡ la Atens demma ale nicham baai ale maa bo tenḡka po dula la a nyiem kasim a yaali ayen ka ba a weeni chaab abe ba a wom me wa paala ale popola paala wie. Ba nyiem nman ka wari wari a nyɛ a gum nna po.

²² Pɔɔl yaa yiri zaani Ariyapagus nuruma ninḡ a weeni ba ayen, “M nya kama ale nama Atens demma a yaali Naawen wie ka nna yegayega. ²³ Dii nyinḡ la, mi ale kasim va tenḡka po a taam la, mi nya jigi nḡai meena ate ni a kaab la ale bogluta ate ni se zaani a nmarisi kunyi nyinḡ ayen, ‘Naawen dii ate ti ze la.’ Ni be basi ate m weeni a sak ni ayen Naawen dii ate ni a te di zula alege ni ze di la, ka Naawen dila ate yɔḡyɔḡla de

mi a biisi di wari a sak ni. ²⁴ Wa ka Naawen waai ale nye tenka meena ale jaab buuri meena ale bo ka po la. Wa ka waai ale ka wennyamazuk ale tenzuk Nyɔnɔ la. Wa be an bo daa yeri ŋaai ate nurubisa se la po. ²⁵ Yaase ku be kan fe kama ayen Naawen pa nurubiik ate wa nye wari a te wa. Dii nyin la ka wala dek ale a te nyuvuri jaab buuri meena. Be ka wala me ale a te nurubiik meena jaab buuri meena me. ²⁶ Wa lin nye ka nuru yen, a yaa va nuru wala nyin a nye nuru boari togatoga tenzuk de meena. Ka wa dek me abe ale poli diipo ate tenɔsa togatogaka tenzuk de ale boro a beni la. Wala dek me abe ale daani tenbanana a te tenɔsa togatogaka tenzuk de. ²⁷ Naawen nye nyaŋa de meena kama ayen ku basi ate nurubiik nyiem a gisi wa ate da dii dai ba baga a nya wa. Alege, ni basi ate m weeni a sak ni ayen Naawen moata ti ka nna farafara ²⁸ ase nuru wanyi ale weeni dii ayen,
 ‘Ka wala ale basi ate ti vua a nyiem a chen ale boro.’

Ku a nye ase ka ni dek nuruma ale ŋmarisi dii ayen,

‘Tama me ka wa bisa la.’

²⁹ Tama a be dan ka Naawen bisa, ku a fe kama ayen ti kan a poli ayen wa a neensi ka kuta a yaase tintana ate nurubiik a pa wa dek yam a peesi ba la. ³⁰ Diipo ate nurubiik a jam ze Naawen la, wa an jam te nurubiik waalika ase ku ale magsi ayen wa te ba dii la. Alege yogyogla de, wa yaa a weeni nurubiik meena jigi meena kama ayen ba tagri basi ba wabaata tuimaŋa tomka. ³¹ Boan nyinŋa, wa dak ka dai ayen dai dila danni abe wa pa nuru wanyi ate wa lueri

ayen wa va wala nyin a bo tenzuk de meena wensie buusa. Nuru wala abe ale wa nak a yiri kum po ayen ku basi ate nuru meena seba chak nalimnyiini ku le sum nye kama.”

³² Nuruma ale wom ale Pool a biisi magsi chaab ale yiri kum po wie la, ba gela a yaa jam nye wa a la. Ba gela me a weeni ayen, “Ti nman a yaali kama ayen fi biisi nyaku de wie ate ti wom.”

³³ Pool a yaa basi tuka jigini ale chen. ³⁴ Nuru ba gela ale jam maa gum wa po a ta siaka ale Yeezu. Nuruma de po wanyi yoi ale Daanisios. Wa jam maa ka Ariyapagus kpanna po dinyi. Nipok me ale jam maa ta siaka. Wa me yoi ale Damaris. Nuruba ba chaab me a jam maa ta siaka a gum du.

18

¹ Pool ale ga biisi ale Ariyapagus kpanna tuka a nueri la, ku naanynin ate wa yaa basi Atens ale chen Korinti. ² Dula jigini wa yaa nya Juu wanyi, ate ba a wi ayen Akiila. Ba biak wa ka Pontus tenka. Wa ale wa pok ale jam nyini Italiya tenka jam daana de. Wa powa yoi ale Pisisila. Ba jam nyini ten kala jam kama dii nyin la, Nakpionku Kilodiyus ale jam te wada ayen Juuma meena basi Aroom tenka. Pool yaa chen ayen wa nya Akiila ale wa powa. ³ Wa jam a goa ale ka bala ale a tom ale ba dii nyin la Pool jam a baali ka dunsa gbanza a da ase Akiila ale wa powa ale jam a nye dii la. ⁴ Juuma Vuusum Daana meena wa nyiem jam ta ka biik ba tuka yenni po ale Juuma ale baai ale kan daa Juuba la a biisi ale a

poli ayen wa dan baga abe wa nyε ate ba ta siaka ayen wa ale a biisi dii la ka wensie.

⁵ Silas ale Timoti ale nyini Masidoniya a jam la, ba jam a paari ale Pool yaa kasim jam pa ka daaŋa meena wa boka po a kasim a sak Juuma Naawen wamaŋsaŋa a biisi ate ku a lagri ayen Yeezu ale Kirisitawa waai ate Naawen weeni ayen wa le tom ate wa jam la. ⁶ Nuruma ale jam a weeni ale a biisi wa a kaasi ayen ba kan yaali wa ale a weeni dii la, Pool me yaa kpaanti wa gattaŋa paasuku ayen ku sak ba ayen wa a kaam ba kama a weeni ayen, “Ni dan be nama dek ale soa dila. Ku daa mi ninŋa a zaani yogyogla de a ta a cheŋ m le cheŋ ka nuru baai ale kan daa Juuba la jigi.” ⁷ Pool yaa basi ba ale cheŋ nuru wanyi waai ale kan daa Juu la yeri. Wa yoi ale Titus Jasitus. Wa jam ka waai ale a chali Naawen nna yegayega la. Wa yenni jam za moata ka Juuma tuka yenni. ⁸ Nuru waai ale jam chim tuka yenni kpagi la yoi ale Kirisipus. Wala ale wa dokdemma meena a jam ta siaka kama ale Nyɔɔwa. Nuruba yegayega me Korinti teŋka a jam maa wom wamaŋsaŋa kama a yaa ta siaka a tuesi soka.

⁹⁻¹⁰ Yok kunyi ate ku yaa nyε Pool jigi ase wa goa daasim kama la ate wa nya Nyɔɔwa ate wa weeni ayen, “Kan chali yogsum, boan nyinŋa, mi bo ale fu, kama. Nuru karo a baga a te fi tuomɔa. Kan sina, a biisi boan nyinŋa, mi ta ka nuruba yegayega teŋka de po, baai ale a limsi ayen ba wom mi wanni.” ¹¹ Pool jam bo dula jigini ate ku paari ka bein ale geli a sak nuruma Naawen wanni.

¹² Nuru wanyi ale jam boro ate ba a wi wa ayen Galiyo, ate Aroom tenka a jam lueri wa ate wa chim Gomina a tagri Aroom tenka zuk a ga bo Korinti tenka a nya Akaaya tenka zuk. Diipo ate nuruwa de a jam chim Akaaya Gominawa la, dila powa ate Juuma a jam maa chaab a yik Pɔɔl ale pagrim a ta wa chen dok kuui ate Aroom demma a biisi biisaŋa la. ¹³ Ba jam a weeni kama ayen, “Nuruwa de Pɔɔl, a kasim pii ka nyin a paasi nuruma ayen ba a te Naawen zula ŋaai ale kan a va sinsaŋa ale a sak dii la.”

¹⁴ Pɔɔl ale deri lagi noai ayen wa biisi a vari wa dek basi la, Galiyo yaa weeni Juuma ayen, “Ku daam dan ka wari dii ale ka wabiok a yaase wakaasun ate wa nye, ku te nala kama ate m ta chichiiba ale nama Juuma nna, ¹⁵ alege ku ka wa dii ale ka nampaga wari a magsi chaab ale wie ŋaai ate ni pa a biisi la, ale nuruba yue la, ale sinsak ŋaai ate nama nyiini a va la, ku a fe kama ayen ni dek abe biisi a magsi chaab. Mi kan chim wienɔ de chaab boteerɔ.” ¹⁶ Galiyo weeni dila ale ge yiak ba ate ba nyini biisa dokku po a nyini. ¹⁷ Ba meena yaa yik Sositenisi waai ale jam ka tuka dokku kpagini la a zaani biisaŋa dokku nin a nak. Alege dila an jam daani Galiyo ale magla me.

¹⁸ Pɔɔl jam bo Korinti tenka ale Kirisita bisaŋa ate ku beni ka nna yegayega. Da yen wa ale Pirisila ale wa chorowa Akiila a yaa banti ba ale ge jueli ŋaarun a chen Siriya. Ba ale jam zaani Kenkeriya ayen wa jueli ŋaarunku a chen la, Pɔɔl jam poni wa zukku kama, dii nyin la wa pe kama a magsi chaab ale dila. ¹⁹ Ba ale jam paari

Efisos tenka la, wa yaa basi Pirisila ale Akiila dula jigini. Pool yaa biisi biik ale Juuma ba tuka yenni po. ²⁰ Ba yaa weeni wa ayen wa goa magla ale ba alege Pool zeri ²¹ alege weeni ba ayen, “Ku dan ka Naawen yaalika m le pilim nman jam ni jigi.” Pool weeni dila ale jueli naarun a zaani Efisos a chen.

²² Wa ale jam paari Siizariya la, wa yaa chen Jerusalem a ga puusi Kirisita bisana ale a tu chaab dula jigini la ale ge a yaa chen Antiok. ²³ Wa ale beni maga dula jigini la, wa yaa basi dula, ale va Galatia ale Firijiya tensana po a densi Kirisita bisana kpa.

²⁴ Juu wanyi ate ba a wi ayen Apolos ate ba biak wa Alezandiria la, a yaa jam Efisos. Wa jam ka waai ale baga a biisi nna yegayega ale seba Naawen Gbanka wiena nna yegayega me la. ²⁵ Nuruba ale poom lin jam sak wa Nyonowa siuku wiena nna yegayega ate wa a biisi ale a sak ale nin muna a va siuku nalimnyiini wensie naai ale a magsi chaab ale Yeezu la. Alege soka kaai nyiini ate wa jam seba la ale soka kaai ate Jon te la. ²⁶ Wa yaa piilim a deri a biisi nyana de meena ba tuka yenni po ale kan chali yogsum. Alege Pirisila ale Akiila ale wom biika la, ba yaa yik wa a tigi Naawen siuku meena wiena ate na lagri a te wa nalimnyiini. ²⁷ Apolos yaa poli ayen wa jueli naarun a chen Akaaya tenka. Kirisita bisana ale jam bo Efisos la a yaa densi wa kpai a nmarisi gban a te Akaaya Kirisita bisana a saalim ba ayen ba tuesi wa nalimnyiini. Wa ale jam paari du la, wa jam maa maari nna yegayega

baai meena ale va Naawen niaka nyinj a chim Kirisita bisa la. ²⁸ Boan nyinjna, wa kasim jam nak ka nampaga ale pagrim a biisi yiaƙ Juuma. Ba nyini ka peelim a nak nampanna ale chaab dila ate Apolos a yaa biisi a ta nyini Naawen Gbanƙa wienja po ate ku lagri ayen ku sak ba ayen Yeezu ka Kirisita waai ate Naawen a weeni ayen wa le tom ate wa jam la.

19

¹ Apolos ale jam bo Korinti la, Pool yaa chen va Galatia ale Firijiya tensanja sunsun po a taam nyini chen Efisos. Dula jigini, wa yaa nya njanviiriba ba gela ² a yaa bek ba ayen, “Diipo ate nama chim Kirisita bisa la, nama tuesi Naawen Chiika?”

Ba yaa tulisi wa ayen, “Tama an poom wom ayen Naawen Chiik boro.”

³ Pool yaa bek ba ayen, “Ku be dan ka dila nama abe tuesi ka boan soka?”

Ba yaa tulisi Pool ayen, “Ka Joon soka ate tama tuesi.”

⁴ Pool yaa tulisi ayen, “Soka kaai ate Joon te la, wa te ka baai ale basi ba wabaatana tomka la. Wa jam te ba kama ale ge weeni Izirali demma ayen ba be pa ba dek a te waai ale bo njan a cheena la. Kula nyonowa ale Yeezu.”

⁵ Ba ale wom nna la, ba yaa tuesi soka Nyonowa Yeezu yonni nyinj. ⁶ Pool yaa pa nisima a vi ba zuk ate Naawen Chiika yaa sin jam ba zuk ate ba deri jam biisi be sii ale kan daa ba dek biisa la a yaa weeni Nyonowa ale weeni ba ayen

ba weeni dii la. ⁷ Baai ale jam nye nna la, a jam a nye ase ka nuruba pi ale baye la.

⁸ Chiisa sita meena Pɔɔl kasim jam a jo ka Juuma tuka yenni po a biisi wie ale nuruma. Pɔɔl a kasim pii nyiŋ a biisi ale ba ayen ba miŋ chak Naawen Naamu wie ale ka dii la. ⁹ Alege ba gela tue a jam kpari ka nna yegayega ate ba jam kan yaali ayen ba ta siaka, ate ba jam a biisi be bulorisa nuruma meena niŋ a magsi chaab ale Nyɔnɔwa siuku. Dila nyiŋ la, Pɔɔl yaa yik ŋaaniiriima ate ba maa chaab a basi ba ale cheŋ. Daa meena Tiranus yenni po Pɔɔl jam a biisi ka biik ale nuruba dɔk kpion kuui po ate nuruba kali a sak nuruba la. ¹⁰ Wa kasim jam a nye ka dila ate ku ga paari a yaase ku gaam bena ŋaye ate nuru baai meena ale jam bo Asia teŋka po la (Juuma ale baai ale kan daa Juuba) a jam wom Nyɔnɔwa wanni.

¹¹ Naawen a jam pa Pɔɔl a tom wakperikaliisa gaam wakperikaliisa ale ka dii la kama. ¹² Wa lakima ale tuima ga tii ate wa jam ta la, nuru a dan pa ŋanta bala wanyi a ta ga yɔgnyienŋ jigi kula nyɔnɔwa nyiŋtuilaŋa a yaase wa chichiribaataŋa a basi wa kama. ¹³ Juuma baai me ale jam boro a nyiem a gilim a yiak chichiribaata nuruba zuima po a basi la, ba me a jam pii ka nyiŋ pa Nyɔnɔwa Yeezu yonni nyiŋ a nye dila. Ba yaa weeni chichiribaataŋa ayen, “Yeezu waai ate Pɔɔl a sak wa wienŋa la, yonni nyiŋ ate mi a weeni fu ayen fi nyini nuruwa zuk po a nyini.”

¹⁴ Baai ale jam a nye nna la ka Juuma Puusika Yenni kpagi kpeeni wanyi bisa. Ba jam ka bisa bayopoi. Ba kowa yoi jam ale Sikiiva.

¹⁵ Chichiribioku yaa weeni ba ayen, “Mi seba Yeezu kama, m be seba Pool me kama. Alege nama, ka bana?”

¹⁶ Nuruwa yaa deri yiri a tu chaab ale ba meena a nak ba yia. Ba meena yaa yiri chali ale nira ale chabola a basi nuruwa yenni.

¹⁷ Juuma meena ale baai ale kan daa Juuba ate ba meena bo Efisos la a jam wom nyaku de kama ate yogsum yaa jam yik ba meena ate Nyɔɔwa Yeezu yonni a jam nya zula nna yegayega. ¹⁸ Baai ale chim Kirisita bisa yogyogla de la bala yegayega a yaa jam nyini peelim a siak ale a weeni wie ɲaai ate ba jam nye la. ¹⁹ Ba yegayega baai ale jam ka sampoporisa a yaase tiita nyam la, a jam ta ba gban sii ate ba a nya si po a tom ba tuimaɲa la a jam jigi yey waai meena nimbie po a ju ba a basi. Ba jam maa pa gbanɲa ligra meena a gum du kama, ɲa dan cheesi gum chaab ɲa a paari ka ligbie tusa pisinu.

²⁰ Siuk kula po ate Nyɔɔwa wanni a kasim jam a tagli tenka meena ale pagrim.

²¹ Wienɲa de meena ale ga nye la ɲaanyin ate Pool yaa poli wa zuk po ayen wa le va ka Masidoniya ale Akaaya ɲaanyin a taam cheɲ Jerusalem. Wa yaa weeni wa dek ayen, “M dan cheɲ dula, ku a fe kama ayen m basi dula abe m cheɲ Aroom tenka.” ²² Dila nyin wa yaa tom baai ale maara a maa wa la po baye, Timoti ale Erasitus ayen ba cheɲ Masidoniya ale ge ate wa dek a diem wari Asia tenka ate ku beni maga.

²³ Ku jam ka nna po de ate daani kpier a jam jam Efisos tenka Nyɔɔwa Siuku wienɲa nyin.

²⁴ Nuru ale jam boro ate ba a wi wa ayen

Dimetirus. Wa jam pa ka kuta tii ale a nyagsi la, a nyɛ ɲanta a da. Wa jam a nyɛ ka bogluk kuui ate ba a wi ayen Atimis la yenni a da. Wa tuimaɲa de a jam basi kama ate baai ale a nyɛ ɲanta bala a da la a jam nya tuima. ²⁵ Wa yaa jam wi nuruma de chaab ale baai ale a tom ale ba la ate ba jam jigi yeɲ ate ba nyɛ tuka. Wa yaa piilim wa biik ayen, “M dɔaba, nama dek seba ayen ti jigsika meena a nyini ka tuini de po. ²⁶ Nama dek abe nya kama ale wom nuruwa de Pɔɔl ale a nyɛ dii la. Wa a weeni kama ayen bogluk tii ate nuruba pa ba nisima nyɛ la, a ka pagrim fifiik me la. Wa a biisi dila a paasi nuruba yegayega kama. Efisos ale Asia tɛɲka meena po ba siak wa ale a biisi dii la kama. ²⁷ Mi abe a chali ka yɔgsum ayen ti tuimaɲa de a le nya ka yoi kaasɔɲ. Daa dila nyiini, mi a chali yɔgsum me ayen bogluk kpienku Atimis yenni kan ta kiri ya. Bogluku dek me le jogi yue, ku kan ɲman nya zula. Waai meena Asia tɛɲka po ale tɛɲka meena ale doa a ga saari la abe a te zula bogluku de kama.”

²⁸ Nuru bɔanni ale ga wom wienɲa de la, ku yaa puuri ba sue ate ba yaa deri a kaari a weeni ate ku a jueli wein a tulisi chaab ayen, “Efisos bogluku Atimis ka boglu kpionɲ.” ²⁹ Nuemu ka de a yaa jam deri basi ate Efisos tɛɲka po meena a nyɛ nna ɲaglim. Nuru bɔanni de a yaa maa chaab a yik Masidoniya demma bayewa ate ba a wi ba ayen Gayus ale Arisitaakus la. Ba jam va ka Pɔɔl a cheɲ ate ba yaa yik bala ba noai bayewa a ta ba chali cheɲ juijui ate tɛɲka nuruma a nyiem tigsɪ chaab a nyɛ tuka la. ³⁰ Pɔɔl dek a jam a yaali kama ayen wa zaani nuru bɔanni niɲ a biisi

alege Kirisita bisaŋa an jam siak ate wa nye dila. ³¹ Tenka meena kpaŋŋa ba gela baai ale jam ka Pool doaba la, ba me a jam maa te Pool tuntomiŋ a saalim wa ayen wa kan pa nan a tabi tuka jigini. ³² Nyaŋa de meena ale jam a nye la, ale nuru baai meena ale boro a nye tuka la, a jam a na ka chaab, ba gela a weeni wa yeŋ, ba gela me a na a weeni wa di choa, dii nyiŋ la, ba yegayega jam poom ze ba ale jam ayen ba nye tuka ale dii nyiŋ la. ³³ Juuma a yaa weeni Alezanda ate wa taam niŋ ate nuru boanni ba gela yaa kaari ate ku jueli a yaa weeni a sak wa wa a le wa weeni dii la. Alezanda yaa zak nisima ayen ba goori ate wa biisi a tuesi Juuma basi. ³⁴ Alege ba ale ga miŋ ayen wa ka Juu la, ba meena yaa kasim a nuem a na ale noa yeŋ ate ku a jueli a weeni ayen, “Efisos bogluku, Atimis ka boglu kpionŋ.” Ba kasim jam a weeni ka nna ate ku ga beni nna yegayega.

³⁵ Ku ŋaanyiniŋ ate tenka kpaŋŋa diniyi waai ale ta pagrim a nya nuru boari zuk la a yaa yuk nisima ate nuru boanni a goori. Wa yaa weeni ba ayen, “M mabisa, Efisos demma waai meena seba kama ayen ka Efisos tenka ale a nya boglu kpionŋku Atimis yenni zuk. Ku maara nya ka tintain welenŋ kaai ale nyini wenŋmazuk a jam lo la zuk.

³⁶ “Nuru abe karo a nak nampaga ayen nyaŋa de daa wensie. Dila nyiŋ la, ku a fe kama ayen ni goori abe ni kan tom wari dii ate ni ze di kiri alege a tom di la. ³⁷ Ni ale ta nuruma de a jam dela nna, ba be an zu jaabjaaboa Atimis yenni po, a yaase ba le ku. ³⁸ Dimetirus ale wa nuruma

abe dan ta wari a magsi chaab ale nuru waai, ti be ta Aroom tenka kpanna kama, dok kuui ate ba a biisi biisana la, abe kasim lagri za kama daa meena ate waai a dan ta wa biik ayen wa biisi, wa a chen ka dula. ³⁹ Alege ku dan ka wari dii ate ni nman ta bega na chaab la, ku a fe kama ayen ti biisi nyaku de ti tuka dai ate ti yaa biisi di a nueri. ⁴⁰ Boan nyinna, wari dii ale nye jinla la, ku naanyin mi a chali ka yogsum ayen Aroom demma a le toarin ti kama ayen dii ale nye jinla la, ka nuem kayiok. Ti be ka wari a weeni dii nyin ale soa ate nuemka de a jam la.” ⁴¹ Kpagini ale ga biisi nna meena a nueri la, wa yaa weeni ba ayen ba kuli.

20

¹ Nuem ka de ale ga nueri la, Pool yaa wi Kirisita bisana ate ba jam jigi yen ate wa yaa biisi maga dega a densi ba kpa ale ge a banti ba ale a chen Masidoniya. ² Wa yaa nyiem gilim Masidoniya tensana meena a biisi biisa nna yegayega densi ba kpa. Wa nye dila ale ge yaa chen Akaaya. ³ Dula jigini, wa jam goa ka chiisa sita. Wa ale jam boro a gomsu ayen wa jueli naaru a chen Siriya tenka la wa yaa min ayen Juuma a jam a poli ka popola baata nyeka ayen ba tu chaab ale wa. Wa yaa tagri wa popolana ayen wa nman pilim nmani va Masidoniya a taam chen Siriya yola. ⁴ Nuru wanyi ale jam boro ate ba a wi wa ayen Purosi. Wa nyini ka Beria tenka. Wa biik yoi jam ale Sopaata. Biika de ale jam maa va Pool a chen. Baai me ale jam maa va wa a chen la, ale Arisitaakus

ale Sekundus. Bala nyini ka Tesalonika. Mbala jam ale Gayus, wa nyini ka Daabe tenka, ale Tikikus ale Torofimus. Bala me nyini ka Asia tenka. Timoti me a jam maa va wa chen. ⁵⁻⁶ Bala de ka nin a chen Torowas ayen ba limsi tama. Juuma jam de ka ba tigi kpien dii ate ba kan n̄obi boroboruk kuui ale ta dabinta la a nueri ale ge ate ti yaa zaani Filipai a juei n̄aarun. Ku daa n̄anu dai ate ti yaa paari Torowas nye tuka ale chaab. Ti yaa jam bo ka Torowas tenka po ate ku ga paari daa n̄ayopoi.

⁷ Asibi dai jun̄oi ate ti jam jigi yen ayen ti de Nyon̄owa n̄andiinta. P̄ool yaa jam biisi wie ale nuruma ate ku ta dila ga paari goota sunsun, dii nyin la vari a dan ga veenti, wa a yaali ayen wa basi ten kala kama. ⁸ Kanaasa yegayega ate ba jam toati zaani n̄mazuk gbonku dokku po ate tama jam kala la. ⁹ Nid̄oa bili wanyi ale jam maa kala dokku tokparuku zuk dii po ate P̄ool jam a boro a biisi la. Nuruwa de yoi ale Yutikus. Goom yaa jam yik wa ate wa goa a ban wa dek a yaa nyini gbon kuui ale saa butawa la siaka zuk a jam lo ten. Ba ale jam zak wa ayen wa yiri la, ba ga a nya ale wa kpi kama. ¹⁰ P̄ool yaa sin ten a ga duok wa zuk a gbaari wa ale ge weeni ayen, "Ni kan basi ate ku daani ni, wa vua kama." ¹¹ P̄ool yaa n̄man juei gbonku zuk ate wa ale n̄aanviirima mbala a maa chaab a de Nyon̄owa n̄andiinta. Wa ale ga biisi ale ba ate ku beni nna yegayega ate wein binni a poom moata pusi ka la, wa yaa basi ba ale chen jigi yon. ¹² Ba yaa ta nid̄oa binni a kuli yeri ale supeentik. Wa an jam kpi ya.

¹³ Ti yaa chen ga jo n̄aarunku po a chen Asos

tenka. Pool jam nye wa popola kama ayen ti basi ate wa dek va siuk a cheŋ Asos ate ti yaa jam pa wa dula jigini ate ti cheŋ. ¹⁴ Wa yaa ale jam paari tama Asos tenka la, ti yaa pa wa a nyo ŋaarunku po a cheŋ Mitiliini. ¹⁵ Ti yaa jueŋi ŋaarunku a cheŋ dila veenti vari a yaa va Kiyos tenka a taam a paari Samos tenka. Vari ale ga veenti la, ti yaa paari Militus. ¹⁶ Ti jam gaam Efisos kama dii nyin la wa kan jam a yaali ayen wa beni Asia tenka. Dii nyin ate wa jam a kpabi la, wa jam a yaali kama ayen wa paari Jerusalem ate wa dan бага abe wa paari Juuma dai kpien dii ate ba a wi ayen Pentekos la.

¹⁷ Pool yaa zaani Militus a tom tuntomin a te Efisos a weeni Efisos Kirisita bisana ale a tu chaab la kpanna ayen ba tu wa Militus. ¹⁸ Ba ale jam tu wa la, wa yaa weeni ba ayen, “Nama seba mi boka ale ka dii la kama a zaani da dii dannii ate mi jam Asia tenka meena po dela la. ¹⁹ Nama dek seba ayen m jam zaabi m dek ka nna yegayega, m kasim a kum ka ninyiam a tom m tuimaŋa ase yomo la a te Nyonowa. Diipo ate m jam a tom dila la, ninam nna yegayega ale jam m jigi dii nyin la Juuma ale jam a nye mu gaasa. ²⁰ Nama dek abe seba me ayen diipo ate m jam nyini peelim ale maa jo ni yeeŋa po a sak ni la, mi an zeri ni sakka wa dii a le di te ni maarika la. ²¹ M jam weeni ale nin muna Juuma ale baai ale kan daa Juuma la, ayen ku a fe kama ayen ba basi ba wabaatana tomka abe ba va Naawen a pa ba dek a te Nyonowa Yeezu Kirisita. ²² Yogyogla de ka Naawen Chiika ale weeni mu ayen m cheŋ Jerusalem ate m siak alege m ze dii ale di nye

mu dula la. ²³ Alege m seba kama ayen Naawen Chiika ale kaam mu ayen m seba ale jigi meena ate mi a cheŋ la, ba a le yik mu a lik, daanika me le jam m jigi. ²⁴ Alege mi dek nyuvunni, mi kan nya di ase di ka jaab mi jigi la. Mi a yaali kama ayen m tom tuin dii ate Nyɔnɔwa Yeezu a te mu la a nueri. Tuini de ale m weeni a sak nuruba Naawen wamanɔaŋa a magsi chaab ale waman sii ate wa nyɛ a te nuruba niaka nyin la.

²⁵ “M nyiem nama meena po kama a sak Naawen Naamu wie. Yɔgyɔgla de, m be seba kama ayen ni wanyi la kan ŋman nya mu. ²⁶ Dila nyin la, mi a weeni ni kama ale nin muna jinla danni dek ayen ni wanyi abe dan be kula daa mi nin ale la. ²⁷ Dii nyin la, mi an tali wariwariya a magsi chaab ale Naawen ale a poli ayen wa nyɛ dii la. ²⁸ Dila nyin la, ni be ŋmasi a nya ni dek ale nuru baai ate Naawen Chiika a pa te ni la zuk nalimnyiini. Naawen pa ka wa dek biika ziimu a da Kirisita bisaŋa ale a tu chaab la. Ni be a nya ba zuk ase naapeerik ale a nya wa piisa zuk dii la. ²⁹ M seba a chak kama ayen mi dan basi ni ale cheŋ, nuruba ale ba jam jo ni sunsuŋ po. Ba a nyɛ ase ka piina ale jo piisa sunsuŋ a kaasi ŋa dii la. ³⁰ Di danni cheena ate nuruba nyini ni dek po a nyini a velim a paasi ni ate nyaku de basi ate Kirisita bisaŋa a basi ba siuku abe ba maa va ba. ³¹ Dila nyin la, ni be kpesi ni dek abe ni a teeri dii po yok ale kantueŋ ate m kasim jam a kum ale a kaam ni wanyiwanyi ate ku ga paari bena ŋata la.

³² “Yɔgyɔgla de, m pa ni meena a nyo Naawen nisima po ayen wa nya ni zuk. Mi a salim ni me

ayen ni va Naawen wamaŋsaŋa ŋaai ale a biisi a magsi chaab me ale wa wamaŋ sii ate wa nye a te ti niaka nyin la. Naawen wamaŋsaŋa de abe baga basi ate ni siaka a pagra a gum du kama. Di ŋman baga basi kama me ate niak kaai ate wa le pa te wa nuruma meena la le jam nama jigi. ³³ Mi kan jam a yaali nuruba ligra a yaase ba gatta. ³⁴ Nama dek abe seba ayen mi pa ka m dek nisimaŋa de a tom tuima a nya jaab meena ate mi ale vaanchaama a jam a yaali la. ³⁵ M be weeni ni kama ale sak ni me wienŋa de meena po ayen ni dan a tom nalimnyiini ase mi ale a tom dii la, ku a fe kama ayen ti a maari niwoba abe ni a teeri wienŋa de ate Nyɔŋɔwa Yeezu dek a weeni ayen, 'Nuru a dan pa ŋanta a te nuruba chaab, kula nyɔŋɔwa ta wein kama a gaam waai ale a tuesi ŋanta.' "

³⁶ Pɔɔl ale ga biisi wa biika a nueri la, wa yaa kpi duna teŋ ale ba a puusi Naawen. ³⁷ Ba ale ga puusi Naawen nueri ale ge ayen ba banti Pɔɔl la, ba meena a kasim jam a kum kama a yaa gbaari wa a banti wa. ³⁸ Dii ale potim jam kaasi ba sue la ale Pɔɔl ale weeni ba dii ayen ba kan ŋman nya wa diipo diipo la. Ba yaa bani wa a ta cheŋ ŋaarunku jigini ayen wa jueli cheŋ.

21

¹ Ti ale ga banti ba nueri la, ti yaa jueli ŋaarunku a cheŋ yɔrr a yaa jam paari Kosi teŋka. Vari ale veenti la, ti yaa paari Aroodisi teŋka a zaani dula a taam paari Pataara teŋka. ² Dula jigini, ti yaa nya ŋaarun ale ku a cheŋ Fonisia teŋka. Ti yaa jueli ŋaarun kula a maa

va chen. ³ Naarunƙu yaa le paari jigi ate ti jam baga nya Saipurus tenƙa la, a yaa dam va tenƙa kala yenin a juga gen a yaa ga paari Siriya tenƙa. Ti ale jam paari Taaya la, ti yaa sin dii nyin la ka dula jigini ate naarunƙu nyamma a jam a yaali ayen ba yeeri ba koalimaƙa. ⁴ Dula jigini, ti yaa gisi nya Kirisita bisa a yaa goa ale ba ate ku ga paari daa nƙayopoi. Naawen Chiika a yaa basi ate ba weeni Pool ayen wa kan chen Jerusalem. ⁵ Ti ale jam boro ale ba ate ti danni jam paari ayen ti basi ba la, ti yaa banti ba ale nman lo ti chelimu po. Ti ale jam banti ba ale ge a yaa ayen ti chen la, ba meena ale ba pooba ale ba bisa ale jam ta ti a nyini tenƙa po a ta ti jam paari nyakpeemu noai. Dula jigini ti meena a yaa maa chaab a kpi duna tenƙa a puusi Naawen ⁶ ale ge a yaa banti chaab ate tama me jueli naarunƙu a chen ale ge ate ba yaa nman a kuli.

⁷ Ti yaa nman lo ti chelimu po a zaani Taaya a jueli naarunƙu a chen Tolomayas tenƙa. Dula jigini ti yaa puusi Kirisita bisaƙa ale ge goa da yen. ⁸ Vari ale ga veenti la, ti yaa basi dula ale nman a chen a ga paari Siizariya. Dula jigini, ti yaa jam boro ale Filip waai ale ka Naawen wienƙa moolidowa la. Wa jam ka bayopoiwa po wanyi baai ate Kirisita bisaƙa a lueri ayen ba a nya ligranƙa zuk la. ⁹ Filip jam ta ka leeba banaansi. Ba waai an jam yali nyaya. Ba jam ka Naawen biisiteeroba. ¹⁰ Ti ale jam a goa dula ate ku ga beni maga la, Naawen biisiteerƙo wanyi a yaa jam nyini Judia a jam tama jigi. Wa yoi ale Agabus. ¹¹ Wa yaa jam paari a pa Pool chiakgbanni a bobi wa dek nanƙa ale wa nisima ale weeni tama

ayen, “Naawen Chiika ale weeni dii la, ale nna, ayen, Juuma Jerusalem tenka po a le yik ka di nyonowa a bobi ase nna la a yaa pa wa a te baai ale kan daa Juuba la.”

¹² Ti ale wom nna la, tama ale mbala ale jam maa bo dula la, a yaa maa chaab a saalim Pool ayen wa kan chen Jerusalem. ¹³ Alege wa yaa tulisi ayen, “Ka boa ate nama a nye dila, a nye ate m popola a kaasi? Mi poom gomsu magsi kama ayen ba kan bobi mu bobika nyiini Jerusalem, alege m poom gomsu magsi kama ayen m kpi dula jigini Nyonowa Yeezu yonni nyin.”

¹⁴ Ti an jam бага fe wa ate wa wariya. Ti yaa pa dila basi ale weeni wa ayen, “Ti a saalim Nyonowa ayen ku meena abe nye magsi ale wa dek ale a yaali dii la.”

¹⁵ Ti le jam goa dula jigini ate ku beni maga la, ti yaa nman gomsu ti koalimanya a magsi a yiri chen Jerusalem. ¹⁶ Yeezu nyanviirima baai ale jam nyini Siizariya la bala ba gela a yaa ta ti chen nuru waai yenni ate ti jam a poli ayen ti goa la. Nuruwa yoi ale Minaason. Wa nyini ka Saipurus. A ta nyini diipo ate Kirisita bisanya ale a tu chaab la a piilim boro la ale nuruwa a chim ka Kirisita biik.

¹⁷ Ti ale jam paari Jerusalem la, ti suaatana Kirisita bisanya a jam nye ti tia ka nalimnyiini ale supeentik. ¹⁸ Vari ale veenti la Pool yaa maa va ti a chen ayen wa nya Jeemsi. Kirisita bisanya ale a tu chaab la Kpanya meena a jam maa boro kama. ¹⁹ Pool yaa puusi ba ale ge a togi wari meena dinyi dinyi a sak ba Naawen ale va wa tuimanya nyin a tom dii a te baai ale kan daa Juuba jigi

la. ²⁰ Ba ale wom wa a nueri la, ba meena yaa te Naawen pimpauk. Ba yaa weeni ayen, “Ti suowa, fi nya Juuma ale piisi dii chim Kirisita bisa la kama. Fi dek be nya ba ale kasim a yaali ale nin muna dii ayen nuruba a va sinsanŋa la kama. ²¹ Nuruba weeni ba kama ayen ka fi ale a sak Juuma meena baai ale bo tɛŋ sii ale kan daa Juuba tɛŋsa la, ayen ba kan a va Moosis Sinsanŋa abe ba kan a gebi ba bisanŋa yuaŋa yaase ba kan a va Juuma kisitaŋa. ²² Yɔgyɔgla de ti a le nyɛ ka se? Ku a fe kama ayen ba wom ayen fi jam ya. ²³ Tama ale a yaali ayen fi nyɛ dii la ale nna. Nuruba banaansi ale bo dela jigini a puulim ale Naawen. ²⁴ Maa va ba a pa fi dek a gum ba po a chenŋ a ga nyɛ ba a le ba nyɛ dii ate ba welema Naawen jigi la. Tuni pami dii meena ate ba a le tuni abe ba nya welensaŋa de la. Fi dan nyɛ dila ba a le nya siuk a yaa poni ba zuimaŋa yɔgla. Siuk kula po, nuruba yaa le seba ayen wie ŋaai meena ate nuruba weeni a magsi chaab ale fi la, wensie fiifiik la a ka ba biika po, alege ba le nya ayen fi dek fi boka po, fi a va ka Moosis Sinsanŋa ale a weeni dii la. ²⁵ Alege baai ale kan daa Juuba a yaa chim Kirisita bisa la, gbanŋ kaai ate tama ŋmarisi ayen fi ta ga te ba la, ti weeni ba kama ayen, ba kan a de bogluta ŋandiinta, ba kan a de ziim ba a kan ŋobi jaab buui ate ba an togri la lammaa, abe ba kan a bobi nipɔk baai ale kan daa ba pooba la a goa.”

²⁶ Vari ale veenti la, Pɔɔl yaa de nuruma nin ate ba chenŋ a ga nyɛ dii ale dii ale di basi ate ba chim nuru welensa la. Pɔɔl yaa jo Juuma Puusika

Yenni po a weeni ku a le pa daa dii ate welensa nyaka tigini de a nueri abe ku ge ate ba yaa nya siuk ate ba nye kaabka a te ba wanyi wanyi la.

²⁷ Ku jam pa ka daa ηayopoi ate welensa nyaka tigini de a taam. Alege ku ale jam tali maga ate ηa nueri la, Juuma ba gela baai ale jam nyini Asia la a yaa nya Pool Juuma Puusika Yenni po. Ba yaa choa nuru boanni meena a yik Pool ale pagrim, ²⁸ a yaa nuem ate ku a jueli nna yegayega a weeni ayen, "Izirali demma, ni maari. Ka nuruwa de ale a nyiem jigi meena a sak waai meena ayen Izirali demma ale Moosis Sinsanηa ale Juuma Puusika Yenni de bala meena ka nuru kayaata ale sinsak kayaata ale Juuma Puusika Yenni ka yeri kayiok. Yogyogla, wa be ηman ta ka nuru baai ale kan daa Juuba la a jam jo Juuma Puusika Yenni de po a tanjim jigi welenka de." ²⁹ Ba jam weeni nna kama dii nyin la, ba jam nya ale Torofimus waai ale nyini Efisos la ale wa va ka Pool a nyiem a nyiemu tenka po ate ba yaa deri poli ayen da dii dai Pool a ta wa jam jo ka Juuma Puusika Yenni po.

³⁰ Ku yaa kasim deri jam a nye nna ηaglim tenka meena po ate nuru meena a yaa maa chaab a chali jam Juuma Puusika Yenni po a dari Pool ale pagrim a ta nyini Juuma Puusika Yenni po a nyini, a yaa deri ligi Yenni diinana noana meena. ³¹ Nuru boanni ale jam a yaali ayen ba ko Pool la, tuntomin yaa jam paari Aroom tenka sojima kpagi kpeeni ayen wa nya Jerusalem tenka meena demma boro a nye ka kpalin nna ηaglim. ³² Kpagi kpeeni yaa deri yik kpagi fiisana ba gela ale sojiba ate ba yaa chali

siŋ nuru boanni jigi. Nuru boanni ale nya wa ale sojima la, ba yaa basi Pool nagta. ³³ Kpagi kpeeni yaa taam chen Pool jigi a yik wa ale pagrim a yaa weeni ayen sojima pa choarima naye a bobi wa. Wa yaa bek ayen, “Ka be deno ale nna? Wa nye ka se?” ³⁴ Nuru boanni a yaa deri a nuem ate ku a jueli. Ba gela a nuem a weeni wari di choa, ba gela me a nuem a weeni di choa. Juuma yaa nye nna nglim yegayega ate kpagi kpeeni an jam бага miŋ wari dii ate Pool nye la. Wa yaa weeni wa sojima ayen ba ta Pool chen juijui ate sojima boro la. ³⁵ Ba ale jam ta wa a jueli dokku tiilana la, nuru boanni sue a yaa nman nmasi jam a puuri nna yegayega. Dila nyin ku yaa jam fe sojima ate ba koati Pool a ji. ³⁶ Nuru boanni a kasim jam a vi wa kama ale a kaari a weeni ayen, “Ko wa.”

³⁷ Sojima ale jam tali maga ate ba ta wa jo yenni po la, Pool yaa weeni kpagi kpeeni ayen, “Mi a saalim, m weeni wari a sak fu?”

Kpagini yaa bek wa ayen, “Ee, fi a wom ka Giriki? ³⁸ Be dan ka dila, fi daa Ejipiti denowa waai dila powa ale jam nye kpalinjka ale gomintiwa a yaa de kpalin nyeeroba tusa nanaansiwa nin a ta ba nyini chen sagini po la?”

³⁹ Pool yaa tulisi wa ayen, “Aaya, mi daa wala, mi ka Juu. Ba biak mu ka Taasus tenka kaai ale bo Silisiya po la. M be nyini ka ten kpien kaai yoi ale yiri nna yegayega. Mi a saalim ayen fi te mu siuk ate m biisi ale nuruma.”

⁴⁰ Kpagi kpeeni yaa te wa siuk ate Pool yaa zaani tiini zuk a zak nisima ayen nuruma goori

ate wa biisi. Ba ale ga goori la, Pɔɔl yaa pa Juuma biika ate ba a wi ka ayen Yiburu la a biisi ale ba.

22

¹ Pɔɔl yaa piilim wa biika ayen, “M suaata ale m koba, ni lak tue wom mi ale za ni niŋ ayen m biisi a vari m dek a basi dii la.” ² Ba ale wom ale wa a biisi ale ba dek biika Yiburu la, ba yaa ŋmasi goori nna chorototo ale ge ate Pɔɔl a biisi a cheŋ a weeni ayen,

³ “Mi ka Juu. Ba biak mu ka Taasus teŋka kaai ale bo Silisiya po la. Alege mi chim ka Jerusalem dela a yaa chim sagro waai ate ba a wi ayen Gamaliil la sukuuri biik. M zamsi ka ku ale a fe dii ayen mi a zuli nalimnyiini abe mi a va nalimnyiini Juuma Sinsanŋa ŋaai ate ti kokpiensaŋa a sak ti la. Mi be jam pa m dek kama nalimnyiini a te Naawen ase nama meena baai ale bo dela jinla a pa ni dek nalimnyiini a te wa dii la. ⁴ Mi namsi baai ale a va Yeezu la ka nna yegayega a poom jam a bobi ba gela nidɔaba ale nipooba ta ba ga a lik, ale a ko ba gela me.

⁵ Ni dan bek Juuma Puusika Yenni kpagi kpeeni ale kpanŋa meena, ba a le siak ayen mi ale a biisi dii la ka wensie. M jam tuesi gbanŋa ba jigi ate ba ŋmarisi a te ti mabisa Juuma me baai ale bo Damasikus teŋka la ayen mi cheŋ dula a ga yik baai ale a va Yeezu la a pa choroma bobi ba a ta jam Jerusalem ate ba nya waalika.

⁶ “Ase mi ale jam bo siuku po a cheŋ a yaa jam moata Damasikus teŋka la, wenbinni jam bo ka wein zuk sunsuŋ ate wenŋmazuk a yaa deri nyagsi nna yegayega a gilim mu. ⁷ Mi yaa lo teŋ

a wom ate lueluk a weeni mi ayen, ‘Sool, Sool, ka boa ate fi a namsi mu nna?’ ⁸ Ate mi yaa bek wa ayen, ‘Ka wana, m Nyɔɔɔ?’ Lueluku yaa tulisi ayen, ‘Ka mi, Yeezu, Nazaret denowa ate fi a namsi dila.’ ⁹ Nidɔa baai ale jam maa va mi a cheŋ la, a jam nya nyagsika kama alege ba an jam wom lueluku ale jam a biisi dii ale mi la. ¹⁰ Mi yaa bek ayen, ‘Mi le nyɛ ka se m Nyɔɔɔ?’ ate Nyɔɔɔwa yaa weeni ayen, ‘Yiri cheŋ Damasikus. Dula jigini fi le wom Naawen ale a poli ayen fi nyɛ dii a te wa la.’ ¹¹ Nyagsi kaai ale jam nyagsi la, a jam basi kama ate m deri yi. M vaanchaama baai ale jam maa va mu la, a yaa yik m nisima a ta mu cheŋ Damasikus yɔgla.

¹² “Nuru ale jam bo Damasikus. Wa yoi ale Ananaiyas. Wa jam ka waai ale a yaali wensiuk wie vaka nna yegayega la. Wa jam a zuli Juuma Sinsanŋa kama. Juuma meena ale jam bo dula la a jam a te wa zula ka nna yegayega. ¹³ Wala yaa jam mi jigi a zaani m teŋ a yaa weeni mu ayen, ‘M suok Sool, lagi fi ninanŋa.’ Wa ale ga weeni dila la, mi yaa deri lagri ŋa a yaa nya wa ¹⁴ ate wa deri weeni mi ayen, ‘Ti kokpiensanŋa Naawenni ale lueri fu ayen fi seba wa ale a yaali dii la, abe fi nya wayɔrisima Tomteerowa, abe fi wom wa dek lueluku. ¹⁵ Boan nyinŋa, fi ale chim wa seero a weeni waai meena fi ale nya ale wom dii la. ¹⁶ Fi be ŋman a limsi ka boa jaab yɔgyɔgla de? Yiri, a tuesi soka abe fi puusi a wi wa yonni ate wa sugri fi wabaatanŋa a basi.’ ”

¹⁷ Pool yaa ŋman biisi a cheŋ a weeni ayen, “Mi yaa pilim ŋman cheŋ Jerusalem. Da yeŋ

ate mi yaa jam Juuma Puusika Yenni po a puusi Naawen. Diipo ate mi jam boro a puusi la, ku yaa nye mi jigi nna ase goadaasima la ¹⁸ ate mi nya Nyɔɔwa ate wa yaa weeni mi ayen, 'Nye nwuli basi Jerusalem yɔgyɔgla de dii nyin la nuruma dela jigini a kan siak fi ale a biisi dii a magsi chaab ale mi la.' ¹⁹ Mi yaa weeni ayen, 'M Nyɔɔwa, ba seba chak kama ayen ka mi ale chen tama tuka yeenja po a yik baai ale ta siaka ale fi la a nak ale a lik ba me. ²⁰ Ba ale jam yik Sitiven a ko ayen wa ale jam a sak nuruba fi wienja nyin la, ka mi dek abe ale jam maa boro a siak ayen ba ko wa. Be ka mi ale jam a nya baai ale ko wa la kasaautanja zuk.' ²¹ Nyɔɔwa yaa weeni mi ayen, 'Chen boan nyinjan m le basi ate fi chen nna ninjan baai ale kan daa Juuma la jigi.' "

²² Nuruma jam goori kama a wom wa ale biisi dii la, ale ge wa ale ga weeni Nyɔɔwa nna la, wa yaa weeni wa ayen, wa chen nuru baai ale kan daa Juuba jigi la, ba yaa kaari nna yegayega ate ku jueli wein a weeni ayen, "Ku an magsi ayen nuruwa de choa a poom maa bo tenzuk de, ni ko wa." ²³ Ba yaa jam a kaari a yik ba gattanja a kpaanti ale nari tintanta a yuk a basi wenzuk. ²⁴ Aroom sojima kpagi kpeeni a yaa weeni wa nuruma ayen ba ta Pɔɔl a ga jo sojima yenni po, a miiri wa ate wa weeni a sak ba jaab buui nyin ale soa ate Juuma a kaari ayen ba kan yaali wa la. ²⁵ Ba ale yik wa a bobi zaani ayen ba miiri wa la, Pɔɔl yaa bek soji kpagi dii ale jam za dula la ayen, "Ku va Aroom tenka sinsanja ate ni yik

nuru waai ale ka Aroom deno la ayen ni miiri alege kan ta wa a cheŋ biisa dɔkku a weeni wari dii ate nuruwa kaasi la?”

²⁶ Soji kpagini ale wom nna la, wa yaa ga bek Sojima kpagi kpeeni ayen, “Fi a nyɛ ka boan dila? Fi ze ayen nuruwa de ka Aroom deno?”

²⁷ Kpagi kpeeni yaa cheŋ Pɔɔl jigi a ga bek wa ayen, “Weeni a sak mu, fi ka Aroom deno?”

Pɔɔl me yaa tulisi ayen, “Mm”.

²⁸ Kpagi kpeeni yaa weeni ayen, “Mi tuni ka ligra nna yegayega ale ge a chim Aroom deno.”

Pɔɔl yaa tulisi ayen, “Alege a nyini mi biam po mi ka Aroom deno.”

²⁹ Nuru baai ale jam gomsɪ ayen ba miiri Pɔɔl la ale wom nna la, a yaa pilim ŋmani ŋaɔŋ ale ge basi Pɔɔl. Yɔgsum yaa yik kpagi kpeeni dii nyiŋ la wa ale jam miŋ ayen Pɔɔl ka Aroom deno alege wa bobi wa ayen ba miiri wa la.

³⁰ Wa jam a yaali kama ayen wa seba a chak dii nyiŋ ale soa ate Juuma a tɔariŋ Pɔɔl la. Dila nyiŋ vari ale ga veenti la, wa yaa foli Pɔɔl choarimaŋa ale ge a wi Juuma Puusika Yenni kpaŋŋa ale Juuma tɛŋka kpaŋŋa ayen ba nyɛ tuka. Wa yaa ta Pɔɔl a cheŋ ga zaani ba niŋ.

23

¹ Pɔɔl yaa a nya nuruma po nna zii a yaa weeni ba ayen, “M mabisa, Izirali demma, mi popolaŋa po mi seba chak kama nalimnyiini ayen a zaani diipo ate mi kasim boro a jam paari jinla la, Naawen jigi mi ka wariya.” ² Juuma Puusika Yenni Kpagi Kpeeni Ananaiyas yaa weeni baai ale jam za moata Pɔɔl la ayen, ba fobi wa nɔanni.

³ Pɔɔl yaa weeni Ananaiyas ayen, “Naawen me a le fobi fi me kama. Fi ka pimpaasido. Fi kala ka dula a pa Juuma Sinsanɲa a bu mi buusa alege fi ze ayen fi a kaasi ka Juuma Sinsanɲa ale fi ale a weeni ayen ba fobi mi nɔanni la?”

⁴ Nuru baai ale jam za mɔata Pɔɔl la a yaa weeni wa ayen, “Fi a le ka Juuma Puusika Yenni Kpagi Kpeeni waai dek ate Naawen soa la?”

⁵ Pɔɔl yaa tulisi ba ayen, “M mabisa, mi poom ze ayen wa ka Juuma Puusika Yenni Kpagi Kpeeni. Dii nyinɲ la, Naawen Gbanɲa a weeni ayen, ‘Ku a fe kama ayen nuru waai kan biisi kpagi dii ale a nya ba zuk la a kaasi.’ ”

⁶ Pɔɔl ale ga nya ale nuruma ba gela ka Sajusiba la, ba gela me Farisiiba la, wa yaa biisi ate ku jueli nna yegayega a weeni kpanɲa ayen, “M mabisa, mi ka Farisii, mi be ka Farisii biik. M be za dela kama ayen ba bo mu buusa boan nyinɲa, mi ta yiila kama ayen baai ale kpi la le nman yiri kum po kama a ta nyuvuri.”

⁷ Wa ale weeni dila a magsi chaab ale kpeebe le ba nman yiri a vua la, Farisiima ale Sajusima a yaa deri piilim ta chaab ate dila yaa nyɛ ate ba poori chaab. ⁸ (Boan nyinɲa Sajusima a weeni kama ayen nuruba a kan nman yiri kum po a vua, ba a weeni kama me ayen Naawen Sabiiloba ale chichirisa karo. Alege Farisiima ta siaka kama ayen nuruba le yiri kum po kama, Naawen sabiiloba ale chichirisa boro kama.) ⁹ Nuemka yaa jam a jueli nna yegayega ate Juuma Sinsanɲa sagroma ba gela baai ale jam maa ka Farisiima nuruba la a yaa yiri a weeni ale pagrim ayen, “Tama an nya wari dii ate nuruwa de kaasi la.

Da dii dai ku ka wensie ayen chichirik a yaase Naawen sabiilo ale sum jam biisi ale wa.”

¹⁰ Nampanṅa a jam pagra ka nna yegayega ate sojima kpagi kpeeni a jam a chali yɔgsum ayen ba nin zaan yik Pɔɔl a dari pasi. Wa yaa weeni wa sojima ayen ba siṅ nuru boanni po a vari Pɔɔl ba jigi a ta jam a nyo yenni po.

¹¹ Yok kula dek ate Nyɔnɔwa jam zaani Pɔɔl tɛṅ a weeni wa ayen, “Pɔɔl kan a chali yɔgsum. Fi weeni m wie kama a sak nuruba Jerusalem tɛṅka po. Ku boa fe kama me ayen fi nyɛ dila degadega Aroom tɛṅka.”

¹² Vari ale ga veenti la, Juuma ba gela yaa nyɛ tuka ayen ba ko Pɔɔl. Ba yaa jam pe ayen ba waai kan de ṅandiinta a yaase ba nyu nyiam ase ba nin ko Pɔɔl nueri abe ba de yaase ba nyu.

¹³ Nuru baai ale jam maa chaab a poli nna la, a jam gaam pisinaansi kama. ¹⁴ Ba yaa maa chaab a cheṅ Juuma Yenni kpanṅa ale nisomma jigi a ga weeni ba ayen, “Tama maa ka chaab a pe ale nin muna ayen ti kan de jaabɔa ase ti nin ko Pɔɔl. ¹⁵ Yɔgyɔgla de, ni ale kpanṅa meena abe tom weeni Aroom sojima kpagi kpeeni ayen wa ta Pɔɔl jam. Paasi wa ayen ni a yaali kama ayen ni ṅmasi wom chak dii dek ale boro a magsi chaab ale wa la. Alege tama ale le poom gomsi magsi kama ate ti ko wa ale ge ate wa poom nya siuk a paari dela jigini.”

¹⁶ Alege ba ale jam a biisi nna meena la, Pɔɔl toa biik, a yaa jam wom ba ale a biisi dii meena a magsi chaab ale Pɔɔl la, ate wa yaa cheṅ yeri dii po ate ba lik Pɔɔl la a weeni sak wa. ¹⁷ Pɔɔl yaa wi soji kpanṅa wanyi a weeni wa ayen, “Ta

nidoabinni nna a cheŋ ni kpagi kpeeni jigi ale wa ta ka wari ayen wa weeni a sak kpagini.” ¹⁸ Soji kpagini yaa ta wa cheŋ kpagi kpeeni jigi a weeni wa ayen, “Pɔɔl waai ate ti yik a lik la ale weeni ayen m ta nidoabinni de a jam fi jigi ale wa ta ka wari ayen wa weeni a sak fu.”

¹⁹ Kpagi kpeeni dek yaa yik nidoabinni nisima a ta wa a taam nakpiak a yaa bek wa ayen, “Ka boa ate fi tara ayen fi weeni a sak mu?”

²⁰ Nidoabinni yaa weeni wa ayen, “Juuma kpanja a maa chaab a siak kama ayen ba bek fu ate fi dan siak abe fi ta Pɔɔl a cheŋ kpagi kpeemaŋa jigi chum. Ba be ale paasi fu kama ase kpagi kpeemaŋa ale sum a yaali wa ayen ba ŋmasi wom dii dek chekki ale boro a magsi chaab ale wa la. ²¹ Alege ba dan weeni dila, kan wom ba, dii nyiŋ la, nuruba ale gaam pisinaansi a suk siuk a limsi ayen wa dan jam a paari abe ba ko wa. Ba pe kama ayen ba kan de a yaase ba nyu ase ka ba nin ko wa. Yogyɔgla de ba be gomsɔ ba dek a magsi kama a yaa a limsi ayen ba wom fi ale ta dii ayen fi weeni a magsi chaab ale wanni de la.”

²² Kpagi kpeeni yaa weeni nidoabinni ayen, “Kan weeni a sak nuru ayen fi weeni wanni de a sak mi.” Kpagini yaa weeni dila ale ge basi ate nidoabinni kuli.

²³ Soji kpagini yaa wi wa soji kpanja baye a weeni ba ayen, “Gomsɔ sojiba kobsiye a magsi ate ba cheŋ Siizariya. Gomsɔ wusum dueriba pisiyopoi ale ba wusumaŋa ale nuruba kobsiye baai ale a kpalim ale gbalita la ate bala meena a gum chaab ale sojiba kobsiyewa ate ku dan nak

yok banj neok abe fi ta ba cheŋ. ²⁴ Ni ta wusuma jam ate Pɔol do. Ni ta wa paari du ale nyinyɔgsa a ga te Gominawa Feliksi.” ²⁵ Kpagini yaa weeni dila ale ge yaa ŋmarisi gbanj ayen ba ta ga te Gominawa. Wa ale ŋmarisi gbanƙa a weeni dii la ale nna ayen,

²⁶ “Mi, Kilɔdiyus Lisiyas ale a ŋmarisi gbanƙa de a te fi Feliksi waai ale ka Gomina a nya ti meena zuk la.

“Mi a puusi fu nalimnyiini.

²⁷ “Juuma a yik nuruwa de, Pɔol kama ale pagrim ayen ba ko. M be wom kama ayen wa ka Aroom deno ate mi yaa cheŋ wa jigi ale sojima ayen m vari wa a basi. ²⁸ Mi abe jam a yaali kama ayen m miŋ wa dii ate wa kaasi la ate ba a tɔariŋ wa la. Dila nyiŋ ate mi yaa ta wa cheŋ ba kpagi kpeemaŋa jigi.

²⁹ “M be nya kama ale wa an nyɛ wa dii ale magsi ba ko wa a yaase ba ta wa ga lik la. Ka ba dek Sinsaŋŋa vaka nyiŋ ale soa ate ba a tɔariŋ wa.

³⁰ “Mi ale wom ale ba a poli kama ayen ba a paasi mi ayen ba a ko wa la, m yaa deri weeni m sojima ayen ba ta wa jam fi jigi. M be weeni baai ale a tɔariŋ wa la kama ayen ba ta beŋŋa meena jam bek wa fi niŋ.”

³¹ Sojima yaa nyɛ ba kpagini ale weeni ba dii la. Ba yaa yik Pɔol yok kula a cheŋ dila tee a ga paari Antipatirisi. ³² Vari ale veenti la, soji baai ale jam a cheŋ naŋsa la, a yaa pilim ŋmani Jerusalem ale ge basi soji baai ale jam do wusumaŋa la ate ba a cheŋ ale wa. ³³ Ba yaa ta Pɔol cheŋ Siizariya a ga paari, pa gbanƙa a te Gominawa a yaa pa Pɔol a

nyo wa nisima po. ³⁴ Gomina yaa karim gbanjka ale ge yaa bek Pɔɔl ayen, “Fi nyini ka tɛŋ boa?” Gominawa ale miŋ ayen Pɔɔl nyini ka Silisiya la, wa yaa weeni Pɔɔl ayen ³⁵ “Mi le wom dii ate fi ta la ase baai ale a toarinƷ fu la a nin jam.” Gominawa yaa weeni sojiba ayen ba basi Pɔɔl yenni po abe ba nya wa zuk nalimnyiini. Yeri kpeeni de jam ka Naawa Ayerod ale se di.

24

¹ Daa ŋanu ale jam taam la, Juuma Puusika Yenni Kpagi Kpeeni Ananaiyas ale tɛŋka nisomma ba gela a yaa va chaab a cheŋ Siizariya. Ba jam ta ka Tetuulos cheŋ ayen wa biisi te ba. Ba yaa jam Gominawa Feliksi jigi a jam zaani wa niŋ a weeni dii nyiŋ ale soa ate ba a toarinƷ Pɔɔl la. ² Ba yaa wi ate Pɔɔl jo ate Tetuulos yaa deri piilim a toarinƷ wa ayen,

“Feliksi, fi yam buui ate fi pa a nya ti zuk la a basi kama ate ti boro ale suyɔgini a ta nyini dila po dila po. Ti be seba kama me ayen ka fi yammu nyiŋ ate tagrika kasim a jam ti tɛŋka po ate ti boro ale suyɔgini. ³ Dii po meena wuu ale jiga meena wuu ti kasim a nyɛ ka fi jiam nalimnyiini. ⁴ M be kan yaali ayen m beni fu, alege mi a saalim fu ayen fi le te ti zula a lagi tue a wom ti bigelika de ate ti tara ayen ti biisi la. ⁵ Tama nya kama ale nuruwa de ka nuru biok a ta daanika a jam ti tɛŋka po. Wa a deŋsi ka Juuma ale bo tɛŋzuk de meena la kpa ayen ba nyɛ kpaliŋ ale Aroom demma. Wa be ka nuru baai ate ba a wi ayen Nazarinba la kpagi. ⁶ Wa kasim jam pii ka nyiŋ a nyɛ ayen wa taŋim Juuma Puusika Yenni ate

tama yaa yik wa. Tama yaa poli ayen ti yik wa a bo buusa a magsi chaab ale tama sinsan̄ɲa. ⁷ Alege Lisiyas sojima kpagi kpeeni a yaa jam tuesi wa ale pagrim tama jigi. ⁸ Dila la Lisiyas yaa weeni ayen baai ale a tɔariɲ wa la a jam fi niɲ a weeni ba ale ta dii la. Fi dek abe dan bek nuruwa de Pɔɔl, fi dek abe le nya wie ɲaai meena wuu ale soa ate ti a tɔariɲ wa la.” ⁹ Juuma yaa jam pa ba dek a gum ba po ate ba meena maa chaab a tɔariɲ wa a weeni ayen dii meena ate ba a weeni la ka wensie.

¹⁰ Gominawa yaa te Pɔɔl siuk ayen wa biisi. Pɔɔl yaa piilim ayen,

“M seba ayen fi chim boteerɔ tɛɲka de ate ku beni ka nna yegayega. Dila nyiɲ la, ku te mu supeentik ate m zaani fi niɲ a biisi vari m dek a basi. ¹¹ Yɔgyɔgla de ase fi dek a dan bek nuruba wien̄ɲa de fi le wom ayen ka ku da pi ale ɲaye nyiini ale jinla ate mi daam yiri a cheɲ Jerusalem ayen m puusi Naawen. ¹² Diipo ate mi jam jo Juuma Puusika Yenni po la, a yaase ba tuka diinaɲa po la, a yaase tɛɲka po la, Juuma an nya ale mi a nak nampaga ale nuru a yaase m nyɛ wari dii ale basi ate nuruba tigsɪ chaab jigi yeɲ la. ¹³ Ba be an baga ale sak fu ayen wien̄ɲa de meena ate ba a tɔariɲ mi la ka wensie.

¹⁴ Alege mi a weeni nyaku de a sak fu kama ayen mi a va ka Kirisita bisan̄ɲa siuk kuui ate nuruma de a weeni ayen ku ka venta la, a puusi ti kokpiɛnsan̄ɲa Naawenni. M be maa ta siaka kama ale Juuma Sinsan̄ɲa ale a weeni dii meena la kama. Naawen biisiteerɔma me ale ɲmarisi ba gban̄san̄ɲa a weeni ɲaai meena la, m ta siaka

kama me ale ŋa. ¹⁵ Mi be ta yiila kama ase nuruma de dek ale ta yiila dii la ayen, waai meena, nuru maŋsa ale nuru baata le yiri kum po kama. ¹⁶ Dila nyiŋ la, mi nyiem kasim a pii ka nyiŋ m boka meena po ale m popola po ayen Naawen ale nuru biik kan nya wari m jigi ate ba бага бииси гаам му.

¹⁷ “Mi ale ga basi Jerusalem ate ku beni maga la, m jam cheŋ kama ayen m te m Kirisita bisa vaanчаама лига абе m te Naawen tiirim.

¹⁸ Diipo ate mi jam bo Juuma Puusika Yenni po a nyɛ dila la ate Juuma yaa nya mi du. Dila powa ale mi nyɛ welenɛsa nyeka tuini a nueri kama. Dila powa me, nuru boari a yaase daanika a jam karo. ¹⁹ Alege Juuma ba gela ale jam nyini Asia tɛŋka a jam maa boro. Ku a fe kama ayen bala dek a dan ta wari ayen ba toariŋ mu di nyiŋ ba be jam zaani fi niŋ a weeni wa dii ate mi nyɛ kaasi la. ²⁰ Yaase fi basi ate nuruma ale za dela la a weeni sak fu diipo ate mi jam zaani kpagi kpeemaŋa niŋ ate ba nya mu la m nin nyɛ wari kaasi. ²¹ Kan daa ka wari dinyi dekki ate mi jam weeni dila powa ayen, ‘Jinla ate mi za nama niŋ ate ni a bek mu beŋa de mi ale weeni ayen baai ale kpi la a le yiri kum po kama a ŋman vua la nyiŋ.’ ”

²² Alege Feliksi ale jam seba Nyɔnɔwa Yeezu siuku wienɛa nalimnyiini dii la, a yaa dak da yoŋ ayen ba biisi biika ale ge a weeni ba ayen, “Sojima kpagi kpeeni Lisiyas a dan jam, абе m yaa poli nya dii ate m le weeni la.” ²³ Feliksi yaa weeni soji waai ale a nya Pool zuk la ayen wa ŋmasi nya Pool zuk nalimnyiini абе wa basi

wa nna fasiyaa yenni po, abe wa basi me ate wa doama a te wa jaab buuri meena ate wa a yaali la.

²⁴ Feliksi powa yue jam ale Durusila. Wa jam ka Juu. Daa maga ale ga taam la, Feliksi yaa jam ale wa. Feliksi yaa tom ayen ba ta Pool jam. Pool ale ga jam la, Feliksi yaa lagi tue a wom Pool ale a togi ku kiri ale ka dii ate nuru weeni ayen wa pa wa dek a te Yeezu Kirisita la. ²⁵ Alege Pool ale biisi paari niŋ a yaa boro a biisi wie a magsi chaab ale nye maŋ, ale fi dek taka wie ale da dii dannu ate Naawen a le bo buusa ale waai meena la, nyaŋa de a yaa basi ate yogsum yik Feliksi ate wa yaa weeni Pool ayen, “Fi baga cheŋ yogyogla de kama. M le ŋman wi fu ate fi jam ase m nin nya siuk.” ²⁶ Feliksi ale jam weeni dila la, wa jam a poli me kama ayen da dii dai Pool ale te wa ligra. Dila nyiŋ wa yaa kasim jam a tom a wi Pool maga maga a daliŋ ale wa.

²⁷ Alege bena ŋaye ale taam la, Gomina wa choa a yaa jam tagri Feliksi zuk. Gominawa de yoi a jam ale Poosiyos Fesitos. Dila powa Feliksi a jam a yaali kama ayen wa nye wari ate Juuma supeentik. Dila nyiŋ, wa yaa basi ate Pool bo sojima nisima po.

25

¹ Fesitos ale ga de wa Gomina naamu a yaa soa tenka la, ku daa ŋata dai ate wa basi Siizariya ale ge cheŋ Jerusalem. ² Juuma Puusika Yenni kpaŋŋa ale Juuma kpaŋŋa a yaa jam wa jigi a weeni wa wie ŋai meena ate Pool kaasi la. Ba meena jam maa chaab a saalim Fesitos ayen, ³ wa

maa maari ba ate ba ta Pɔol a jam Jerusalem. Ba jam weeni dila kama a poli ayen ba le basi kama ate nuruba suk siuku niŋ ate wa dan jam a taam abe ba ko wa. ⁴ Fesitos yaa tulisi ba ayen, “Ba yik Pɔol a lik ka Siizariya. Mi dek abe le cheŋ dula ka yɔgyɔgla de. ⁵ Ni basi ate ni kpaŋŋa a va mu cheŋ Siizariya ate ni ga toariŋ wa dula jigini.”

⁶ Fesitos a ŋman goa ale ba da naaniŋ a yaase da pi a gum du ale ge a yaa cheŋ Siizariya. Wa ale ga paari Siizariya ate vari veenti la, wa yaa jo biisaŋa dɔkku po a kali wa zukpalika zuk a yaa weeni wa sojima ayen ba ta Pɔol jam. ⁷ Pɔol ale ga jam la, Juuma baai ale jam maa nyini Jerusalem a jam la, a yaa jam za gilim Pɔol a weeni ayen wa a kaasi ka wie nna yegayega alege ba an jam baga sak ayen ŋaai ate ba a weeni a magsi chaab ale Pɔol la ka wensie. ⁸ Pɔol me yaa biisi ayen wa vari wa dek a basi a yaa weeni ayen, “Mi an kaasi Juuma Sinsaŋŋa a yaase Juuma Puusika Yenni a yaase m biisi Aroom teŋka Nakpionku a kaasi.”

⁹ Alege Fesitos ale jam a yaali ayen wa nyɛ wari ate Juuma supeentik la, wa yaa bek Pɔol ayen, “Fi a le siak a cheŋ Jerusalem ate m bek fu a wom ba ale a biisi ŋaai meena nna a te fu la?”

¹⁰ Pɔol yaa tulisi ayen, “Mi za ka waai ale tagri Aroom teŋka Nakpionku la niŋ, ale wa dek buusa boka dɔkku po juijui ale magsi ayen wa bo mu buusa la. Fi dek abe seba chak kama ayen mi an nyɛ Juuma wari a kaasi ya. ¹¹ M be dan kaasi ka wari ate dila nyiŋ ku magsi ayen m kpi, m kan weeni ayen m kan kpi. Alege wensie abe dan kan boro ale ba ale a toariŋ mu la, nuru karo a baga

pa mi a nyo ba nisima po. Mi a yaali kama ayen ti chen Aroom tenka Nakpionku jigi ate wala bo mu buusa.”

¹² Fesitos yaa nya chaab ale wa nuruma baai ale bo ale wa a sak wa a magsi chaab ale wa tuimaŋa la a nueri ale ge a weeni Pool ayen, “Fi weeni kama ayen fi yaali ayen fi chen ka Nakpionku jigi, be ka wala jigi ate fi le chen.”

¹³ Ku ale ga beni maga la, Naab Agiripa ale wa toa ate ba a wi ayen Beniis a yaa chen Siizariya ayen ba puusi Fesitos abe ba nye wa tia. ¹⁴ Ba ale bo dula ate ku paari dabori la, Fesitos ya togi Pool wannu kiri a sak Naab Agiripa. Wa yaa piilim tokka ayen, “Nuru ale bo dela ate Feliksi jam yik wa a lik a basi wa dela. ¹⁵ Mi ale chen Jerusalem la, Juuma Puusika Yenni kpanŋa ale tenka kpanŋa ale jam a toarinu nuruwa de ayen wa nye wie kaasi ate ba yaa jam mi jigi ayen m bo wa buusa. ¹⁶ Mi me yaa tulisi ba ayen tama Aroom demma sinsanŋa a weeni kama ayen nuru waai ate nuru a toarinu wa ayen wa kaasi wari la, bala bayewa a tu chaab a nya chaab ate waai ate ba a toarinu wa la a biisi vari wa dek a basi ale ge ate ti yaa bo ba buusa. ¹⁷ Ba ale ga jam dela la, mi an bula beniya ale ge ka dai dila dannu dek a veenti vari ate mi kali biisa dokku po a weeni ate ba ta nuruwa a jam biisa dokku po. ¹⁸ Wa dachaasanu ale ga yiri zaani ayen ba biisi la, ba an poom biisi wakaasima ŋaai ate mi jam a poli ayen ba ale biisi a magsi chaab ale wa la. ¹⁹ Ba ale jam a biisi dii meena la ale nampaga nakka a magsi chaab ale ba dek wensiuk vakka wie ale nuru wanyu ate ba a wi

wa ayen Yeezu ate wa kpi alege Pɔɔl a weeni ayen wa vua kama la. ²⁰ Mi an jam poli m le m nye dii a wom wensie a magsi chaab ale biisaŋa de la. Dila nyin ate mi yaa weeni Pɔɔl ayen wa dan siak abe wa cheŋ Jerusalem teŋka ate m bo wa buusa a magsi chaab ale wienja de. ²¹ Alege Pɔɔl a jam weeni kama ayen wa a yaali kama ayen wa wari dela ate Nakpionku a poli nya wa a le wa nye wannu de dii la. Dila nyin ate mi yaa weeni ayen ba limsi wa nalimnyiini ate m yaa tom ate wa cheŋ Nakpionku jigi.”

²² Agiripa yaa weeni Fesitos ayen, “Mi a yaali kama ayen mi dek a wom nuruwa de biik.”

Fesitos me yaa tulisi wa ayen, “Chum fi be le wom wa.”

²³ Vari ale ga veenti la, Agiripa ale Beniis a yaa va chaab a jam ate nuruba nna yegayega a vi ba ŋaŋ a te ba zula. Bala meena a yaa va chaab ale sojima kpagi kpeemaŋa ale teŋka nisom kpeentaŋa a yaa maa chaab ba meena a ga jo dok kpion kuui ate nuru boari a jo ku po a nye tuka la. Fesitos yaa weeni ate ba ta Pɔɔl a jo jam. ²⁴ Fesitos yaa weeni ayen, “Naab Agiripa ale baai meena ale bo dela jigini ale ti la, ni meena nya nuruwa de waai ate Juuma baai ale bo dela ale Jerusalem teŋka la a yaa maa chaab a ta wa wie a jam mi jigi, a kaari a weeni ayen, ku an poom ŋman magsi ayen nuruwa de a ŋman bo teŋzuk de diipo diipo. ²⁵ Alege mi abe nya kama ale wari karo a magsi nuruwa de kpi kumu de la. Alege wa dek ale weeni ayen wa a yaali ayen wa cheŋ Nakpionku jigi la, ate mi yaa poli ayen m basi ate wa cheŋ Aroom. ²⁶ Alege mi potim

ka wari ayen m ηmarisi a magsi chaab ale wa a te Nakpionku. Dila nyin ate m ta wa jam nama meena jigi a potim jam fi jigi Naab Agiripa ayen fi dan bek wa wannu a wom, abe mi yaa ta wari a ηmarisi. ²⁷ Boan nyinηa, mi jigi, yam ka ku po ate m tom ligro ale ge kan weeni ate ku a lagri dii dek chekki ate nuruba a weeni ayen wa kaasi la.”

26

¹ Agiripa yaa weeni Pɔɔl ayen, “Fi ta siuk kama a biisi a te fi dek.” Pɔɔl yaa zak wa nisima a puusi Naawa a yaa deri piilim ayen wa biisi a vari wa dek a basi. Wa yaa piilim ayen,

² “Naab Agiripa, mi a poli ayen mi ta ka wein ate jinla mi zaani fi nin ayen mi biisi a vari m dek a basi ale Juuma ale a tɔarin mu ayen mi kaasi la.

³ Fi dek abe seba Juuma kisitana ale ba beηηa a magsi chaab ale ba wensiuku vaka a chak kama. Dila nyin ate mi a saalim fu ayen fi wom mi ale sudunni.

⁴ “Juuma meena seba mi boka ale ka dii la kama a ta nyini m bifiik po a ta pa a diipo ate mi jam bo m dek tenka ate ku ηaanynin ate mi bo Jerusalem tenka la. ⁵ Juuma wensiuk kunyi vaka ale pagra nna yegayega. Ku ka tama Juuma wensiuk ate ti a wi ku ayen Farisii. Juuma meena abe seba chak ate ku bein ka nna yegayega ase ba dan a yaali ayen ba biisi wensienηa, mi chim ka Farisii m boka po meena a magsi chaab ale Farisii demma nyε boka sinsanηa ale ka dii la.

⁶ Yɔgyɔgla de m be za ka dela ayen ni bo mu buusa dii nyin la, mi ta yiila kama ale Naawen

ale jam puulim dii ale ti kokpienŋa ayen wa le tom varibasido ate wa jam vari ba a basi la. ⁷ Wa dii dek chekki ate ti nuruma yeri zuima pi ale ŋayewa a yiili ayen ba nya ase ba ale kasim a te Naawen zula yok ale kantueŋ dii la. Oo, Naaba be ka yiilaŋa de choawa ate mi ta la ate Juuma a toariŋ mi. ⁸ Be ka boa abe ale soa ate nama baai ale za dela la an бага ta siaka ayen Naawen бага nak kpilima a yiri kum po kama?

⁹ “Mi dek abe jam poli kama ayen m nye dii meena wuu ate m бага nye la ate ku kaasi Yeezu Nazaret denowa yoi. ¹⁰ M be ale jam nye dii Jerusalem teŋka la ale la. M jam tuesi ka siuk Juuma Puusika Yenni kpaŋa jigi a yaa yik Kirisita bisaŋa yegayega a lik. Daa likka nyiini alege, ti ale jam poli ayen ti ko ba la ka mi me abe ale jam siak ayen ba ko ba. ¹¹ Daa dila nyiini, mi jam te ba waalika ti tuka diinaŋa po ate ku paari ka diichoa, a kasim a nye dila ayen ba le Yeezu. M sunni kasim ŋmasi jam a de ka nna yegayega ale ba ate mi nyiem poom jam cheŋ satetŋ yonsa juijui ate ba boro la a te ba waalika.

¹² “Ku jam ka dila nyiŋ ate mi tuesi pagrim ale wada Juuma Puusika Yenni kpaŋa jigi a cheŋ Damasikus teŋka la. ¹³ Ku jam ka siuk kula po ate mi jam a cheŋ la, wenzuk sunsuŋ, Oo Naaba ate mi nya ale ku nyagsi nna kpeglimka a peenti gaam wenbinni a yaa nyini wenna mazuk a siŋ jam gilim mi ale nuru baai meena ale jam va mi ate ti a cheŋ la. ¹⁴ Ate ti meena a yaa lo teŋ ate mi wom ale lueluk a weeni mi ale Juuma biika ate ba a wi ayen Yiburu la ayen, ‘Sool, Sool, ka boa ate fi a namsi mu nna? Fi a namsi ka

fi dek dila.’ ¹⁵ Mi yaa bek ayen, ‘Fi ka wana Nyɔnɔ?’ Ate Nyɔnɔwa yaa tulisi ayen, ‘Ka mi Yeezu ate fi a namsi. ¹⁶ Alege, yiri zaani ŋmai. M pa m dek a sak fu kama yɔgyɔgla de ayen ku sak ayen m lueri fu kama ale tom fu me ayen fi chim m tomteero. Ku a fe kama ayen fi weeni a sak nuruba chaab dii ate fi nya a magsi chaab ale mi jinla la ale m le m sak fu dii chum diipo la. ¹⁷ M le vari fi dek nuruma Juuma nisima po a basi ale baai me ale kan daa Juuba ate mi le tom fu ba jigi la nisima po me a basi. ¹⁸ M dan tom fu, mi le basi ate fi lagri ba ninan̄a ate ba tagri nyini legini po a nyini jam peelim niŋ. Ba ale tagri nyini Sitaana nisima po a nyini a jam Naawen nisima po ate ba ta siaka ale mu ate ba nya wabaatan̄a von̄teka ate ba yaa maa bo nuru baai ate Naawen lueri la po.’

¹⁹ “Dila nyin̄ la, Naab Agiripa, mi a be an zeri dii ale nyini wen̄mazuk a jam ate mi nya di ase m goa daasim kama la. ²⁰ Mi yaa piilim Damasikus ale Jerusalem ten̄san̄a po ale ge yaa paari Judia ten̄ka meena ale baai me ale kan daa Juuba la, a sak ba ayen ku a fe kama ate ba basi ba wabaatan̄a tomka abe ba pa ba dek a te Naawen abe ba a tom tuim ŋaai ale a sak ayen ba tagri kama la. ²¹ Ku be jam ka sinsan̄a de nyin̄ ate Juuma a jam yik mi diipo ate mi jam bo Juuma Puusika Yenni po la a pii nyin̄ ayen ba ko mu. ²² Alege zaani dila powa a jam paari jinla, ka Naawen ale jam a maari mi. Ka dila nyin̄ ate mi za dela ayen m biisi wensie a sak waai meena, nuru fiik yaase nuru kpion̄. Mi ale a biisi dii

la ale dila degadega ate Naawen biisiteeroma ale Moosis a jam weeni ayen ku le nye la. ²³ Bala jam weeni ayen ku a fe kama ate Kirisitawa waai ate Naawen weeni ayen wa a le tom ate wa jam la, a nam. Wa be ale ka waai ale wa chim nuru waai ale wa de nin tenzuk de a yiri kum po la. Wa dan yiri wa le sak wa dek nuruma Juuma ale baai ale kan daa Juuba la ayen ba бага a nya varibasika kama. Varibasika de abe a nye ase ka nuru ale nyini legi po a yaa jo kantuen peelim po la.”

²⁴ Pool ale jam a biisi nna ayen wa vari wa dek a basi la, Fesitos yaa na wa a weeni ayen, “Pool, fi a yesim kama. Fi gbanja zamsika yegayegaka a basi kama ate fi a yesim.”

²⁵ Pool yaa tulisi wa ayen, “M koa, mi kan yesimu. Wie naai ate mi a biisi la ka wensie ale yam. ²⁶ Mi бага a nyini ka peelim a biisi ale fi Naab Agiripa dii nyin la fi dek seba wienja de noai po kama. M seba chak kama ayen fi nmasi kpesi wienja de dinyidinyi kama, dii nyin la, wannu de an sugi nye ka gugoruk po. ²⁷ Naab Agiripa, fi ta siaka ale Naawen biisiteeroma ale a biisi dii la? M seba ayen fi ta siaka kama.”

²⁸ Agiripa yaa bek Pool ayen, “Ku an diem bula beniya ale ge fi a poli ayen fi nye kama ate mi chim Kirisita biik, yaa boa?”

²⁹ Pool yaa tulisi wa ayen, “Ku beni yaa ku an beniya, mi a puusi a te ka Naawen ayen fi ale baai meena ale kali dela jigini a wom mi jinla dannu la, nama ale chim ase mi ale ka nuru waai jinla la. Alege m kan poli ayen ni le ta choroma ase mi ale ta dii la.”

³⁰ Naawa ale Gominawa ale Beniis ale mbala meena a yaa yiri zaani ayen ba nyini. ³¹ Ba ale ga nyini nueri la, ba yaa weeni chaab ayen, “Nuruwa an nye wari a magsi wa kpi a yaase ba yik wa a ligi.” ³² Agiripa yaa weeni Fesitos ayen, “Nuruwa de a poom magsi ka ti basi wa ase wa nin poom kan weeni ayen wa a yaali ayen ka wa cheŋ Nakpionku jigiya.”

27

¹ Gominawa ale jam poli ayen ti jueli ŋaarun a cheŋ Italiya la, ba yaa pa Pool ale ligriba ba chaab a nyo Juliyos nisima po. Juliyos jam ka Aroom tenka sojima beŋ kanyi kpagi. Wa jam ka Nakpionku beŋsaŋa kpaŋŋa po dinyi. ² Ti jam zaani ka Siizariya tenka a jueli ŋaarun. Ku jam nyini ka Adiramitiyom. Ŋaarunku a jam gomsi magsi ayen ku cheŋ ka jiga ŋaai meena ate ŋaarunta a zaani Asia tenka la. Nuru ale jam maa va ti a cheŋ, wa yue ale Arisitaakus wa jam ka Tesalonika deno. ³ Vari ale veenti la, ate ti yaa paari Saidon. Juliyos a jam ta zula ale Pool ate wa yaa siak ayen Pool ga nya wa doama ate ba te wa jaab buui ate wa a yaali la. ⁴ Ti yaa zaani Saidon a cheŋ alege vioku a jam a fobi ti kama a ta ti a ŋmani ŋaŋnyin ate ti yaa dam ti ŋaarunku a va Saipurus tenka juijui ate vioku an jam pagra la. ⁵ Ti yaa pa Silisiya ale Pamfliya tenkaŋa a basi a juga geŋ ale ge yaa taam jam tenkaŋa ate ba a wi ayen Mira ate ka bo Lisia po la. ⁶ Dula jigini ate soji kpagini a yaa nya ŋaarun ale ku nyini Alezandiria a taam a cheŋ Italiya. Wa yaa pa ti nyo ku po ate ti maa cheŋ.

⁷ NjaarunƷ kula po, ti kasim jam a cheƷ ka nna maglamagla ate daaƷa jam paari dabori nna yegayega ate ti nam nna yegayega ale ge yaa paari Kinides teƷka. Ka an jam yalima ale ti. Vioku a jam pagra ka nna yegayega ate ti an Ʒman jam baga a va siuk kuui ate ti jam va la, ate ti yaa ƷmeriƷ va Kariti teƷka juijui ate vioku an jam pagra la a yaa jam va jigi di choa ate ba a wi ayen Salomoni. ⁸ Guuku de jam woƷa kama a siƷ nyiamu po. A zaani dula a yaa cheƷ a moata nyakpeemu kunƷoƷini a nam ka dila a yaa jam paari jigi ate Ʒjaarunta a zaani ate vioku a daa fuk wariwari a kan daani ti la. Dula jigini an jam yalima ale Lasia teƷka.

⁹ Ti jam beni ka nna yegayega ate ku ga paari diipo ate ku pagra ale ti chelimu Ʒmani la. Dii me la, dai dii danni ate ba a nye Juuma tigi dii a magsi chaab ale wabaataƷa vonƷeka la a jam poom taam kama. Dila ƷaanƷyiƷ, vioku a Ʒmasi pagra kama. PooƷ yaa te ba sinsaƷƷa de ayen, ¹⁰ “M doaba, mi nya kama ale ti chelimu a zaani dela a cheƷ a kan nala. KoalimaƷa ale ƷjaarunƷku le kaasi kama, kum me abe le jam ti jigi.” ¹¹ Alege soji kpagini a jam ka siaka ale PooƷ ale weeni nna la. NjaarunƷku damdowa ale ku nyoƷowa ale jam weeni dii la ale jam basi ate Soji kpagini a siak te ba. ¹² Ba jam weeni ayen juijui ate ba jam za la, an jam nala a magsi ba wari dula Ʒoota wenni. Dila nyiƷ la, nuruma yegayega a jam a yaali kama ayen ku dan siak a nye ba dam a cheƷ ate ba ga paari Foniksi teƷka ate ba wari dula Ʒoota wenni a vuusi. Foniksi bo ka Kariti teƷka juijui ate Ʒjaarunta a nyiem zaani a vuusi

la. Jigini de a tuk ka yenin gen.

¹³ Viok a yaa nyini yenin a gala gen a fuk nna balibali ate ba yaa poli ayen nyaku de ale deri basi kama ate ba nye ba ale poom a yaali dii ayen ba chen la. Ba yaa pa kutuk kpion kuui ate ba nyiem pa a yik njaarunku a zaani la a yeeri ku a ta nyini nyiamu po a jueli. Ba yaa jam chen va kunjonini noai nna farafara a moata Kariti tenka la. ¹⁴ Alege ku an bula beniya ate viok kpion a yaa nyini a gala gen korinummu po a yaa nyini kunjonini a jam ¹⁵ a fobi njaarunku. Ku be ale jam pagra nna yegayega ate ti an jam baga dam ti njaarunku a va ku po a taam la, ti yaa basi ate ku ji njaarunku a ta a chen. ¹⁶ Ti ale jam paari ten fiik kanyi ate ba a wi ayen Koda ate nyiam a gilim ka la gauj nyin ate vioku an jam pagra la. Dula jigini, ti yaa nam nna yegayega ale ge baga a yaa yik njaarunku njaarun fiika a zaani. ¹⁷ Ba yaa dari ate ku jueli njaarun kpionku zuk. Ba ale nye dila a ga nueri la, ba yaa pa mi pagrisa a bobi kenken a gilim njaarun kpionku. Yogsum ale jam ta ba ayen dai dii dai ba njaarunku a nin zaan a chali ga feritintain tii ale vi chaab a jueli dua nyiamu ten a moata Libia nyiamu kunjonini noai la. Dila nyin, ba yaa jam a chen magamaga ale basi ate vioku a yaa tusi njaarunku a ta a chen. ¹⁸ Va kpionku kasim jam a fobi ka dila tee ate nyamiisana a yiri a jueli wein nna yegayega a jam a lo. Vari ale ga veenti la, ba yaa piilim a koalim nantana njaarunku po a yuk a basi nyiamu po. ¹⁹ Daa natawa danni ba yaa pa nisima a pa nanta baai ate ti ta a nye ate njaarunku a zaani ale a chen la gela yegayega

me a yuk basi nyiamu po. ²⁰ Daanja a jam piisi ka nna yegayega alege ti an jam бага a pa numbiri tu wenbinni a yaase chinmarisa. Vioku me abe kasim jam a fobi ka dila nna yegayega. Ti nman jam ka yiila ayen ti a le vuugi.

²¹ Ba ale ga cheŋ ate ku beni alege ba an de nandiinta la, Pool yaa yiri zaani ba nin a weeni ba ayen, “Nidɔaba, ku poom magsi ka ni ti wom mi ate ti kan poom nman zaani Kariti a dam cheŋ. Nnapode ti ti poom kan nya kaasunku de ale nantaŋa de ate ti jogi la. ²² Alege yogyogla de, ni yik ni dek. Ni wanyi me a kan kpi. Ka naarunku nyiini ale ku kaasi. ²³ Mi бага a biisi nna kama boan nyinŋa, Naawen dii ale soa mi ate mi a te wa zula la, wala sabiilo deemwa yokku ale jam mi jigi ²⁴ a weeni mi ayen, ‘Pool, kan chali yogsum, ku a fe kama ate fi zaani Naktionku nin. Naawen abe tulisi fi puusaŋa kama ayen nuruma de wanyi me la a kan kpi.’ ”

²⁵ Pool yaa weeni nuruma ayen, “Dila nyin la, nidɔaba, ni yik ni dek boan nyinŋa, m ta siaka ale Naawen kama ayen wa ale weeni mi dii la, dila degadega le ku nyɛ. ²⁶ Alege ku a fe kama ayen vioku a ta ti cheŋ paari teŋ kanyi ate nyiam dua gilim ka la.”

²⁷ Ti kasim jam bo ka nyakpeem buui po ate ba wi ayen Adariya la po a va vioku ate ku fobi ti a ta a cheŋ la. Ku jam ka yok kuui ale saa yogta pi ale tinaansiwa la goota po sunsun ate baai ale a tom naarunku po la, a yaa poli ayen ti boro a moata teŋ yogla. ²⁸ Dila nyin la, ba yaa pa miik a bobi jaab dobruk nyin a yaa basi ate ku sin nyiamu po a nya ale ku limsa ka nna yegayega.

Ku ale ga nye maga dek la, ba yaa nman magsi nya ate ku nman limsa yegayega. ²⁹ Ba jam a chali ka yogsum ayen dai dii dai ti naarunku a le nak ka tintain kpeema naai ale bo nyiamu po la. Dila nyin la, ba foli kuta dobrita tinaansi naarunku naan a basi ate ti zula ayen naarunku a kan nman бага chen. Ba nye dila ale ge yaa a puusi Naawen ayen vanni a venti. ³⁰ Baai ale a tom naarunku po la, a jam pii ka nyin ayen ba chali be. Ba yaa foli naarun fiika a basi nyiamu po ale ge yaa velim ayen ba boro a foli ka kuta dobrita ti chaab naarunku nin. ³¹ Alege Pool yaa weeni soji kpagini ale sojima ayen, “Naarunku tuimtomdoma de a dan kan bo naarunku po, ni kan vuugi.” ³² Sojima yaa gebi mi sii ale yik naarun fiika a ta la ate ku chen ku dek ku nyiini jakorok

³³ Vari a yaa jam moata ka ventika ate Pool yaa weeni ba ale nin muna ayen ku a fe kama ayen ba de nandiinta yogla. Pool yaa nman pilim weeni ba ayen, “Da pi ale nanaansi ale jinla ate ni kasim a limsi a jam paari yogyogla de alege ni an diem de jaaba. ³⁴ Dila nyin ate mi a weeni ni ayen ni de nandiinta. Ku a fe kama ayen ni de ate ni vuuk. Naawen weeni mi kama ayen ni zuimanya zuisanya ale kanyi la a kan be.” ³⁵ Pool ale ga weeni nna a nueri la, wa yaa pa boroboruk puusi a te Naawen a nye wa jiam ba meena nin, a yaa we boroboruku a pilim nobika. ³⁶ Ba yaa yik ba dek ate ba meena wanyi wanyi a yaa de nandiinta. ³⁷ Baai meena ale jam bo naarunku po la a jam ka nuruba kobsiye ale pisiyopoi, ale

bayuebi. ³⁸ Waai meena ale de chak nalimnyiini la, ba yaa koalim “wiitiwa” meena a yuk a basi nyiamu po ale ge ayen naaruŋku a valima magla.

³⁹ Vari ale veenti la, naaruŋku tuimtomdoma a yaa jam nya kuŋkuŋini dinyi alege ba an jam miŋ ale ka juijui kuŋkuŋini la. Ba jam nya ka nyakpeemu gugoruk kunyi ale tintambusuŋ a dua jueli magla ate ba yaa poli ayen ba dan бага abe ba dam naaruŋku a zaani dula. ⁴⁰ Ba yaa gebi kuta tii ale jam yik naaruŋku a zaani la miisaŋa a yaa basi ate ti a cheŋ nyiamu po. Diipo ate ba boro a gebi kutaŋa de miisaŋa la, ba jam maa foli dakpien tii ale bobi maŋ naaruŋku naaŋka ate nuruba pa a dam ku la ayen ba yaa pa tila a dam ku. Ba yaa zak garuk kuui ale bobi yiga naaruŋku niŋka la ale ge ayen vioku fuk ku a basi niŋ. Ba yaa nye dila a deri a cheŋ kuŋkuŋini. ⁴¹ Alege naaruŋku a yaa nak kuŋkutinni ate ku niŋka yaa feri kuŋkutinni an ŋman бага cheŋ. Ku ale nye dila la, nyamiisaŋa me a kasim jam a fobi ku naaŋka ate ku a we nna bunabuna a lo nyiamu po.

⁴² Sojima yaa nye ba popola po ayen ba ko ligrima meena ate ba waai a kan nya siuk a puŋ nyiamu a chali be. ⁴³ Alege sojima kpagini a kan jam a yaali ayen wa ko Pɔɔl. Wa yaa weeni ba ayen ba kan nye dila. Wa jam weeni ba kama ayen waai meena ale бага a de nyiam la, ba yok a zi nyiamu po a yaa de jueli kuŋkuŋini ⁴⁴ ale ge ate mbala meena a yaa yik naaruŋku daataŋa a yaase ku ŋanta baai ale kasi a lo la a jueli. Ti meena ale jam nye dii a vuuk a paari kuŋkuŋini la ale la.

28

¹ Ti ale jam paari kuŋkuŋini nalimnyiini la, teŋ kala demma jam weeni a sak ti kama ayen teŋ kala yoi ale Malita. ² Teŋ kala demma a jam tuesi ti kama a te ti zula nna yegayega. Nmoruk a yaa deri jam a ni ate ŋoota boro ate ba yaa jam cheem bolim a te ti. ³ Pɔol yaa tigsidaata ayen wa nyo bolimu po. Wa ale pa boro a nyoro la, bolim wulumu yaa nyɛ ate waab a yaa nyini ti po a chali nyini a meli wa nisa a dom wa. ⁴ Teŋ kala demma ale nya ale waamu meli Pɔol nisimaŋa la, ba yaa weeni chaab ayen, “Nuruwa de ku a fe kama ayen wa ka nuru koorik. Wa baga nyini nyakpeemu po a nyini kama alege tama bogluku a kan nya ase ku magsi ayen wa vuugi la.” ⁵ Alege waamu ale meli Pɔol nisimaŋa la, wa yaa misi si ate waamu lo bolimu po alege wariwari an nyɛ wa. ⁶ Nuruma yaa jam a limsi ale a poli ayen ba nya ale wa nyinŋa fuusiya yaase wa deri kpi dua. Alege ba ale jam a limsi ale a poli ate ku beni alege wari an nyɛ wa la, ba yaa tagri ba popolaŋa ale ge weeni ayen, “Wa ka bogluk.”

⁷ Teŋka naawa yoi a jam ale Pubiliyosi. Naawa de kadugsa ale jam dua moata ti juijui ate ti jam kala la. Wa yaa jam nyɛ ti tia. Daa ŋata meena ti kasim jam bo ka wala yenni ate wa a nya ti zuk nalimnyiini. ⁸ ŋoota ale chaaruk ale jam ta wa kowa ate wa jam dua dɔk po. Pɔol yaa jo ayen wa nya wa a pa wa nisima a vi wa zuk a puusi Naawen te wa ate wa nya nyinyɔgsa. ⁹ Wannide ale ga nyɛ la, yɔgnyeensa meena ale jam bo teŋ kala la, a jam jam kama a nya nyinyɔgsa. ¹⁰ Ba

jam te ti ka tiirinta nna yegayega. Ti ale jam pa njaarun ku choa ayen ti basi ba abe ti nman a chen la, ba jam pa nanta baai ate ti jam a yaali ale nin muna la, a nyo ku po a te ti a magsi ti chelimu.

¹¹ Ti jam goa Malita ka chiisa sita ale ge yaa chen Aroom. Njaarunku de ate ti jam juei la yoi ale “Yibisa Boglutaŋa”. Ku jam ka Alezandiria njaarun. (Ku be jam ka noota wein ate ku jam wari Malita ayen nootaŋa taamu.) ¹² Ti yaa jam paari Sirakusi tenka goa dula da nata. ¹³ A zaani dula a nman a chen a jam paari ten ka choa ate ba a wi ayen Arigiyum. Vari ale ga veenti la, viok yaa nyini yenin a gala gen a fuk. Daa naye dai ate ti yaa nman paari Putiyooli tenka. ¹⁴ Dula jigini ate ti jam nya Kirisita bisa ate ba weeni ti ayen ti dan a yaali ti goa daa nayopoi ale ba. Ti yaa siak a goa daa nayopoiwa ale ba ale ge yaa yiri chen Aroom. ¹⁵ Ti Kirisita bisa suaataŋa ale bo Aroom, ale wom ayen ti cheena la, ba yaa nyini chen paari Apiyas Yabaŋa ale Vuusum Yie Natawa la, a jam tu ti. Pool ale ga nya ba ale ba cheena la, ku yaa te wa nyin pagra ate wa te Naawen jiam.

¹⁶ Ti ale ga paari Aroom la, tenka kpanŋa jam basi ka soji ate wa a nya Pool zuk. Ba jam basi kama ate sojiwa ale wa boro ba dek ba nyiini. Ba an jam lik wa a gum chaab ale ligriba mbala.

¹⁷ Daa nata ale jam taam la, Pool yaa wi Juuma kpanŋa Aroom tenka po ate ba jam ayen wa nye tuka ale ba. Ba ale jam tigi chaab jigi yen la, Pool yaa weeni ba ayen, “M mabisa mi an kaasi tama nuruma wariya a yaase kisitaŋa tii ate ti

tuesi ti kokpiensana jigi la, alege ba yik mu a lik ka Jerusalem tenka a yaa pa mu nyo Aroom demma nisima po. ¹⁸ Ate Aroom demma yaa bek mu bega ale ge a poli ayen ba basi mu, dii nyin la ba nya kama ale mi an kaasi wari a magsi ba ko mu. ¹⁹ Alege Juuma ale ga wom Aroom demma ale biisi nna la, ba yaa zeri ate ku yaa fe mi ate mi weeni ayen mi a yaali ayen m paari ka Nakpionku jigi ate wa wom m le ta dii la. Alege mi jam ka chaab ale m dek nuruma ayen ba kaasi wari ya ate m toarin ba Nakpionku ninna. ²⁰ Dila nyin ate mi wi ni ayen m nya ni abe m weeni a sak ni. Mi be ta choarini de kama dii nyin la mi ta yiila naai me ate Izirali demma meena me a ta la.”

²¹ Ba yaa tulisi wa ayen, “Tama an tuesi gban ate ka nyini Judia a biisi fi wariya. Ti mabisana wanyi me la abe an nyini dula a jam weeni fi wari a sak ti a yaase wa biisi wabiok a magsi chaab ale fi. ²² Alege tama a yaali kama ayen ti wom fi me popola ale ka dii la, dii nyin la, jigi meena nuruba kasim a weeni kama ayen ba kan yaali nuru baai ate fi maa bo ba po la.”

²³ Ba yaa dagi dai yon ayen ba nman nye tuka ale Pool. Dila danni ale jam paari la, ba yaa piisi nna yegayega a tigi chaab juijui ate Pool a goa la. A ta nyini saliuk a jam paari juncai Pool kasim jam a biisi a magsi chaab ale ka Naawen Naamu wie. Wa kasim jam pii ka nyin a biisi a ta a nyini Moosis Sinsanna gbanka po ale Naawen biisiteeroma ale nmarisi Naawen gbanka po ayen ku sak ayen wa ale a biisi dii la ka wensie a magsi chaab ale Yeezu. ²⁴ Ba gela

a jam siak kama ayen wa ale a biisi dii la ka wensie. Ba gela me an jam siak ya. Ba ale jam a nak nampaŋŋa nna la, ba yaa waan̄ chaab. Ba ale diem kan jam waan̄ chaab dii la, ²⁵ Pɔɔl yaa weeni wa dinyi ayen, “Naawen Chiika ale jam basi ate Naawen biisiteerɔwa Azaya a biisi dii a te ni kokpien̄saŋa la sum ka wensie. ²⁶ Naawen Chiika ale jam biisi dii a te wa ayen wa weeni a sak ni la ale nna ayen,

‘Chen̄ ga weeni sak nuruma nna ayen:

Nama le wom, a wom alege ni kan min̄ chagi.

Nama le nya, a nya alege ni kan min̄ chagi.

²⁷ Dii nyin̄ la, nuruma de zeri kama ayen ba kan yaali min̄ chakka,

ba lik ba tuen̄a kama,

a lik ba nin̄a me,

kan daa dila ba nin̄a ate nya ya,

ba tuen̄a me ate wom ya,

ba popola po me, ba ate min̄ chak,

ate ba tagri a basi ba wabaat̄aŋa,

ate m te ba nyinyɔgsa.’ ”

²⁸ Pɔɔl yaa biisi kpeglim a weeni ba ayen, “Dila nyin̄ la, mi a yaali kama ayen ni seba ayen Naawen basi kama ate Varibasika wann̄i de a chen̄ baai ale kan daa Juuba la jigi. Ba be le wom di abe ba tuesi di me.” ²⁹ Pɔɔl ale weeni nna nueri la, Juuma yaa nak nampaga ale chaab a yaa waan̄ chaab. ³⁰ Pɔɔl jam bo dula ka bena n̄aye. Wa jam bo ka yeri dinyi po a tuni ale ge a goa di po. Waai meena nyiem dan jam wa yenni, wa a nyɛ kula nyɔnɔwa tia ka nalimnyini. ³¹ Wa nyiem jam nyini ka peelim a kan chali yɔgsum a sak nuruba Naawen Naamu wie ale a sak ba me

Nyɔnɔwa Yeezu Kirisita wie. Nuru an jam nyɛ
ate wa an baga sak wienja de.

**The New Testament in the Buli language
(Ghana)**

**Buli: The New Testament in the Buli language
(Ghana) (New Testament)**

copyright © 2003 Wycliffe Bible Translators, Inc.

Language: Buli (Ghana)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 3 Mar 2023 from source files
dated 29 Jan 2022

24aad1ee-9f16-5a40-b094-5b16e513253a